

Ex Bibliotheca
majori Coll. Rom.
Societ. Jesu

post 27. K

14-19. B. 25




Ioannis Cassia-

NI VIRI DISERTISSI-

mi, de incarnatione Domini

Libri VII.

iam recens æditi.



ITEM

Beati Cyrilli sermo, de eo quòd
verbum dei factum sit homo.

Coll. Rom. Soc. Jesu B. S. Cat. B.

Ex Legato Mus. Mus. Cocini.

Excusum Parisiis per Petrum Galterum
pro Ioanne Barbæo & Clau-
dio Garamontio.

I S 4 S

THE

LIBRARY

OF THE

UNIVERSITY

OF TORONTO

1877

1878

1879

1880

1881

1882

1883

1884

1885

1886

1887

1888

1889

1890

ANDREAS CRATAN-
der pio lectori salutem.



Hoc Cassiani, viri doctissimi, de incarnatione domini libros, nunc potissimum in lucem ædendos desumpsimus, Christiane lector, quæ passim seculo hoc turbulentissimo repullulare audimus, qui, iuxta apostolivaticinium, spiritibus impostoribus & dæmoniorum doctrinis attendentes, à fide desciscunt: atque (vt diuus Petrus ait) dicunt: Vbi est pollicitatio aduentus eius? Proinde ne huiusmodi pestiferis serpentum sibilis imprudenti imponatur, in primis ad sacrarum literarum anchoram, quæ, vt Pauli verbis vtar, ad salutem erudiunt, confugiendum. Ad hæc, Scriptorum ecclesiasticorum monimenta non oscitanter euoluenda sunt: eorum maximè qui

spiritu sancto afflati, scripturam pure dextreque, & non illotis, ut vulgò dicitur, manibus cōrectarunt, aduersum lethiferas hæreticorū occursiões. Quod genus sunt, præter alios sanctissimos ecclesiæ Christi antistites, Chrysostomus, & illius discipulus Ioã. Cassianus. Cuius libros mihi excudēdos nuper dedit D. Ioan. Sichardus, Iureconsultus, vir nō minus integritate quàm eruditione insignis, & diligētissimus veterum codicum instaurator. In quibus alicubi asteriscis interpositis admonitum te volumus, exemplar, quod vnicum extabat, fuisse mutilum. Præterea Cyrilli Alexā. homiliam eiusdem argumēti subnexuimus, ex multis illius quæ apud nos habentur nondum editis.

Vale.

EORVM QVAE PRAE-
cipuè in hoc libello ha-
bentur, Index.

A	Egritudo quo maior fuerit, hoc instantior debet esse curatio.	pagina 2.
	Agri dominici seges semper lappas tolerauit	2
	Ambrosius eximius dei sacerdos.	176
	Animalia ex atomis nascuntur.	147
	Antiocheni symboli fides	109
	Apes quo pacto procreentur.	147
	Apollinaris hæretici error.	3
	Apostoli omnesq; sancti nihil vnquam in suo, sed Christi nomine fecerunt.	167
	Arrianæ peruersitatis impietas.	2
	Athanasius Alexandrinus eximius constantiæ & virtutis exemplum.	179
	Audientiæ locum non habet qui cunctorum sta- tuta conuellit.	11.
	Augustini episcopi Hipponensis de Christi na- tiuitate sententia.	177
	B	
B	Asilisci serpentes ex ouis volucrum, quas Ibes vocant, gignuntur.	223
	C	
C	Cassianus à beato Chrysostomo in sacrum ministerium adoptatus	182
	Cassianus beati Chrysostomi discipulus.	183
	Christi duplex natiuitas.	241

Christus filius dei per naturam.	85
Christus à prophetis deus prænunciatus.	154
Christi incarnationem doctores sancti testantur.	174
Christus propter vnitatē verbum dicitur.	67
Christo Iesu impropria addere, non minoris erroris est quàm propria derogare.	3
Christi natiuitas in veteri testamento prænunciata.	17
Confessionis perfectæ perfecta virtus quæ	79
Constitutiones constitutori sunt obnoxie, & non constitutionibus constitutor.	143
Credentes in deum, omnes filii dei sunt.	84
Crucis dominicæ nomen & Iudæos offendit, & gentibus risui fuit.	46
Cyrilli Alexandrini de Christo incarnato sermō.	185

D

Deitas sicut nō minuitur, ita nec auget.	30
Dei agnitionē de⁹ ipse homini tribuit.	63
Deus in pphetis & patriarchis locutus est.	83
Deo nihil impossibile.	107. & 149
Dei oīpotētia in creaturis suis noscēda.	142
Diabolus Christum deum cognouit.	155
Diuinitas suis testibus probanda.	163

E

Esaiæ de nati. Christi prænūciatio.	17. & 18
Esse æternitatis est, fieri tēporalitatis	96
Euhomii hæretici prauitas.	2
Excelsū qñq; pro deo scriptura ponit.	88

I N D E X.

F

- F**A&um pro nato ponere scriptura sacra so-
let. 117
- Fides de deo his testibus danda est, quos deus
misit, & in quibus locutus est. 63
- Fidei virtus nescit imminui. 49
- Fides loco non imminuitur. 178
- Fides ecclesię est Petri apost. cōfessio. 51. & 52
- Fides vera & catholica quę sit. 88. & 98
- Fidei symbolum cur tam paucis comprehen-
datur. 110
- Fidei catholicę sacramentum in quo conti-
neatur. 64
- Fidelibus deflenda sunt quę aliis videntur ri-
dicula. 27
- Filius hominis idem est qui verbum dei. 70
- Fotiñi hęresis. 3

G

- G**Ratię deo patri quare agenda. 91
- Gētes indepto christiano nomine, fide &
nomine ad Christū transierunt. 76
- Gregorius splendidissimū scientię ac doctri-
nę iubar. 178

H

- H**Aeresis in ecclesia hydrę similitudinē ha-
bent. 189. (bet. 1)
- Hęreticorū fides, imò pfidia, portę infer-
næ. 189. (ni. 53)
- Hęreticorum mos 189. (ni. 53)
- Hebionitarū hęresis. 2. 5. & 36
- Hieremias ppheta ante sc̃ificat? q̃ nat? 72
- Hieremię de Christo testimonium Ibidem

INDEX.

Hieronimus catholicorum magister	176
Hilarii de Christi incarnationis testimoniū.	174
Hyperbaton figura scripturæ peculiaris,	171

I

I acob patriarcha Christum ex virgine nasci turum cognouit.	154
Iesum qui soluant.	97. & 98.
Impii hodie non minus Christum persequun- tur, quàm si manus in illum iniicerent	46
Infidelitas tenebrosa sibi etiam in luce tene- bras facit.	67
Ioannis Chrysostomi laus.	180. & 183
Ioan. Chrysostomus quid de filii dei incarna- tione senserit.	180
Iudæi deum credunt, sed non filium dei.	76

L

L iber verè fit, qui Christo cœperit esse ca- ptiuus.	139
Leporii hæresis.	171
Leporii Pelagianistæ recantatio.	6
Leporii ad episcopos Gallicanos epistola	7
Leporii confessio.	8
Locustarum ortus,	148

M

M acedonii blasphemia in spiritū sanctū. 3	
Malachiæ de natiuitate Christi prædi- ctio.	20
Martionis error.	36
Martionitarum & Manichæorum error con- futatur.	90. & 98.

I N D E X.

N

- N**Asci ex dissimilibus multa, variis exemplis probatur. 147
 Natiuitas Christi duplex. 160
 Natiuitatem parienti non semper cōsubstantialē esse probatur. 142. & 143

P

- P**Elagianus error. 4. & 80
 Pelagius suo errore omnes impietates vicit. 83
 Petri apostoli fides potestatem diuinam accepit. 53
 Petri apostolorum primi confessio. 51
 Populum à peccato redimere, solius dei est. 78

R

- R**eligio omnes vnit. 178
 Rerum demonstratio sufficit ad dictorum confirmationem. 68
 Res dissimiles ex dissimilib^o substituisse naturis. 144. & 146
 Res eadem non potest esse pia & impia. 28
 Resurrectionis vocabulo scriptura regenerationem nominat. 92
 Rufini de Christo incarnato testimoniū. 177

S

- S**Abellianorum hæresis. 2.
 Saluatoris operibus semper trinitatis virtus adfuit. 105
 Sancti omnes sub lege veteris testamenti per gratiam Christi sunt saluati. 97

I N D E X.

Sapientia dei piis tantum cognita, impiis ignota.	47
Scripta sacra in omni sui parte conueniunt.	33
Scriptura sacra quasi vnum diuini oris testimonium.	61
Sermo diuinus sibiipſi respondere solet.	173
Soluere Iesum quid sit.	98
Spiritū dei omnes sancti habuerūt.	83. & 104
Symbolum vnde dicatur.	110
Synecdoches tropus in scripturis sacris frequens.	135

T

T estimonia sanctorum patrum de Christo incarnato.	174
Testimoniis diuinis intelligentia dæmoniacy spiritus misceri nequit.	165
Theotocos Maria dicitur.	13. & 25
Thomæ apostoli vera de Christo confessio.	55

V

Veneficorum consuetudo.	149
Veritas ventilata plus rutilat.	11
Veritati nudæ credendum.	63
Veritatis indubitatę manifestatio, est vniuersorum autoritas.	10
Veritatem cognitam derelinquere intolerabilius est quàm incognitam negare.	120
Vincula charitatis & coercionis.	76

F I N I S.

IOANNIS CASSIANI

in libros de incarnatione do-
mini, contra Nestorium
hæreticum, ad Leo-
nem Romanæ
urbis episco-
pum, præ-
fatio.



Abolutis dudū
collationū spi-
ritualium libel-
lis, sensu ma-
gis quàm ser-
mone insigni-
bus, quia alto
sanctorum virorum sensui sermo
nostræ imperitiæ impar fuit: cogi-
taram, & propemodum constitue-
rā post illum proditæ in scitiæ pu-
dorem, ita me in portu silentii col-
locare, vt excusare quantum in me

P R A E F A T I O.

ēsset, per taciturnitatis verecundiā,
 loquacitatis audaciam. Sed vicisti
 propositum, ac sententiam meam
 laudabili studio, & imperiosissimo
 affectu tuo, mi Leo venerande, ac
 suspicienda charitas mea Romanę
 ecclesię, ac diuini ministerii decus,
 producens me ex illo præmeditati
 silentii recessu, in publicum formi-
 dādúmque iudicium: & noua sub-
 ire cogis, adhuc de præteritis eru-
 bescentem: cúmque etiam mino-
 ribus impar fuero, par maioribus à
 te esse compellor. Ego enim ne in
 illis quidem opusculis, quibus per
 ingenioli nostri oblatiunculam do-
 mino sacrificauimus, moliri aliqd
 aut vsurpare tētassē, nisi episcopali
 tractus imperio. Creuit itaque per
 te oris nostri & styli dignitas. Nam
 qui iussī antea de dominicis stu-
 diis locuti sumus, nunc id exigis,

P R A E F A T I O.

vt de ipsa incarnatione domini ac
maiestate dicamus. Ita qui prius in
sancta tépli velut per sacerdotalem
manum introducti sumus, nūc du-
ctu tuo atque subsidio quasi in san-
ctorum sancta penetramus. Ma-
gnus honor, sed periculosa progres-
sio : quia obtineri sacrorum pene-
traliū ac diuini præmij palma nō
potest, nisi hoste superato. Exigis
itaque, ac iubes, aduersum recētem
hæresim, ac nouum fidei hostem
conferere imbecilles manus, & cō-
tra pestiferi serpētis graues hiatus
aperto, vt aiunt, ore consistere: sci-
licet vt in resurgentem in ecclesia
dei sinuosis tractibus draconē vis
prophetica, & sermonis euangelici
diuina virtus, me quasi incantato-
re irrūpat. Pareo obsecrationi tuæ,
pareo iussioni : malo enim de me-
ipso tibi quàm mihi credere, ma-

P R A E F A T I O.

ximè quia id tecū amor Iesu Chri-
 sti domini mei præcipit, qui hoc-
 ipsum etiam in te iubet. Superest,
 vt effectum negocij ab ipso postu-
 les, per quem imperasti. Tua enim
 iam hic magis causa quàm mea
 vertitur, tuum magis iudicium
 quàm meum officium periclitatur.
 Me enim, siue par sim tuo impe-
 rio, siue non sim, ipsa aliquatenus
 obedientiæ ratio atque humilita-
 tis excusat: nisi quòd hoc plus me-
 riti est in obsequio meo, si minus
 est in possibilitate. Facile enim cu-
 iuslibet iussioni ex abundantia sa-
 tisfacimus: illius officium grande
 est, & mirabile, qui etiam idem in
 voto habet, quod in viribus non
 habet. Tua ergo hæc res, tuum ne-
 gociū, tui pudoris opus est: ora &
 obsecra, ne imperitia mea pericli-
 tetur electio tua, & opinioni tan-

P R A E F A T I O.

tæ nobis non respondentibus, e-
tiam si ego per obedientiæ ve-
niam bene pareo, tu tamen
per inconsiderantiam
iudicij male
imperasse
videa-
ris.

1875

1875

1875

1875

1875

1875

1875

1875

1875

IOANNIS CASSIANI
DE INCARNATIONE
Christi contra Nesto-
rium, Liber
primus.



Radunt fabulę poetarum, descen-
ditis quōdam hydram capitibus,
numerosius renascentem per sua
damna creuisse. Itaque nouo in-
auditoque miraculo, multiplica-
to mortibus suis monstro, lucri genus esset a-
missio, scilicet dum quicquid ferrum secantis
abscideret, totum id fecunditas prodigiosa
geminaret: donec laborans atque æstuans, cor-
ruptę illius defectionis industrius appetitor, cas-
satis toties inefficaci opere virtutibus, for-
titudinem belli armaret arte consilii, & admo-
tis, ut aiunt, ignibus multiplicem portentuo-
si corporis prolem feruenti gladio defecaret:
ac sic ambustis intrinsecus medullis, cū rebel-
les venas improbæ fecunditatis exureret, tan-
dem parturitio monstruosa cessaret. Ita ergo
etiam hæreses in ecclesiis, illius quam poeta-
rum commenta finxerunt, hydræ similitudinē
gerunt: & istæ enim aduersum nos linguis fe-
ralibus sibilant, & istę virus lethale iaciunt, &
istæ sectis capitibus renascuntur. Sed quia re-
surgente morbo non debet cessare medicina:

& quanto maior fuerit ægritudo, tanto instantior debet esse curatio. Potens est enim dominus de^o noster, vt quod de morte Hydræ illius gētilium falsitas finxit, hoc in ecclesiarum bellis veritas peragat, & ignitus sancti spiritus gladius. Ita in extinguenda nouella hæresi omnes penitus medullas perniciosæ generationis exurat: vt tandem prodigiosa fœcunditas emorientibus venis parere desistat. Non noua enim sunt hæc in ecclesiis monstruosi seminis germina, semper has dominici agri seges lappas sentēsque tolerauit, & adsiduum in ea suffocatricis zizaniæ germen emerisit. Hinc enim Hebionitæ, hinc Sabelliani, hinc Arriani, hinc denique Eunomiani, & Macedoniani, hinc Fotiniani & Apollinaristæ, cæteri que ecclesiarum vepres, & enecātes bonæ fidei frugem tribuli pullularūt. Quorum primus Hebion, dū incarnationem dominicam nimis asserit, diuinitatis eam coniunctione nudauit. Sabellii autem post hunc ex dissimilitudine hæreseos superioris schisma prorumpens, dum in patre ac filio & spiritu sancto distantiam nullā esse contendit, sacram & ineffabilem trinitatem, quantum in ipso fuit, blasphemā confusione permiscuit. Secuta est deinde hunc quem diximus: Arrianæ peruersitatis impietas. Quæ ne videretur sacras miscere personas, diuersas esse dixit, atque dissimiles in trinitate substantias. Eunomius autem post hunc quidem, sed eiusdem admodum prauitatis, licet similem sibi

diuinam esse adseruit trinitatem, diuersam tamen à seipsa esse contendit: admittens similitudinem, excludens paritatem. Macedonius *Macedonius.* quoq; irremediabili in spiritum sanctum impietate blasphemans, licet eiusdem substantiæ patrem & filium dixerit, sanctum tamen spiritum creaturam vocans, reus totius diuinitatis fuit: quia lædi in trinitate aliquid non potest, sine totius trinitatis iniuria. Fotinus *Fotinus.* autem quamuis Iesum, qui ex virgine natus est, Deum dixerit: male tamen cum principio hominis principium esse Dei confinxit. Apollinaris *Apollinaris.* verò hominem vnitum deo inconsideratè intelligens, humanā eum non habuisse animā male credidit. Quia non minoris erroris est Domino Iesu Christo impropria addere, quàm ppria derogare. Quidquid enim de illo non ita dicitur ut est, etiā si honor videatur, iniuriā est. Itā singuli ex sui similitudine hēreseos hēresim procreantes, omnes quidem à se diuersa, sed omnes tamē fidei aduersa senserūt. Nuper quoque, id est in diebus nostris, emeruisse hēresim venenosam, & maxime Beligarum vrbe conspeximus, certi erroris, incerti nominis: quia cū recenti capite ex antiqua Hebionitarū stirpe surrexerit, dubiū admodum est, antiqua magis dici, an recens debeat. Noua enim adsertoribus, sed vetusta erroribus fuit. Solitarium quippe hominem dominum nostrum Iesum Christum natum esse blasphemans, hoc quod ad Dei postea

honorem potestatemque peruenerit, humani meriti, nō diuinæ asseruit fuisse naturæ: ac per hoc eum diuinitatem ipsam non ex proprietate vnitæ sibi diuinitatis semper habuisse, sed postea pro præmio laboris passionisque meruisse: eum vti que dominum saluatoremque nostrum non deum natum, sed à deo blasphemaret adsumptum: confinis scilicet huic hæresi quæ nunc extat, & quasi germana ac consanguinea, quæque tam Hebionitis quàm his recentibus consentanea, tempore quidem inter vtrosque media, sed vtriusque tamen peruersitate coniuncta. Sint quamuis eius nonnulla alia his quæ iam diximus consimilia, sed longum est vniuersa memorare. Neque enim nunc ad dicendum commemorationem præteritorum, sed confutationem nouorum sumpsimus. Illud sanè vnum prætereundum non arbitramur, quod peculiare ac proprium supradictæ illius hæreseos, quæ ex Pelagiano errore descenderat, fuit: quoddam dicentes quidam solitarium hominem Iesum Christum sine vlla peccati cōtagione vixisse, eò progressi sunt, vt assererēt homines si velint, sine peccato esse posse. Consequens enim existimabant, vt si homo solitarius Iesus Christus sine peccato fuisset, omnes quoque homines sine dei adiutorio esse possint quicquid ille homo solitarius sine cōsortio dei esse potuisset. Ac sic nullam facerent inter omnem hominem ac dominum nostrum Iesum Christum esse distan-

Pelagianus error.

tiam: cum idem vtique homo nisu atque industria sua mereri possit, quod Christus studio ac labore meruisset. Quo factum est, vt in maiorem quoque ac monstruosiores insaniam prorumpentes, dicerent dominum nostrum Iesum Christum hunc in mundū non ad præstandam humano generi redemptionem, sed ad præbenda bonorum actuum exempla venisse: videlicet vt disciplinam eius sequentes homines, dum per eandem viam virtutis incederent, ad eadem virtutum præmia peruenirent: Euacuantes quantum in ipsis fuit, omnem diuinæ redemptionis gratiam: cum idem dicerent homines consequi posse viuendo, quod præstitisset deus pro humana salute moriendo. Addiderunt quoque dominum saluatoremq; nostrum post baptismum factum esse Christum, post resurrectionem deum: alterum assignantes vnctionis mysterio, alterum merito passionis. Vnde aduertit nouus nunciam, non nouæ hæreseos autor, qui dominum saluatoremq; nostrum solitarium hominem natum esse contendit, idem se omnino dicere quod Pelagianistæ antè dixerunt: & consequens errori suo esse, vt qui vtique sine peccato solitarium hominem Iesum Christum vixisse asserit, omnes quoque per se homines sine peccato posse esse blasphemet: nec necessariam quoque exemplo illius dicant redemptionem domini fuisse, cum ad cæleste regnum suo tantum homines nisu, vt aiunt, va-

*Lepo-
rius.*

leant peruenire. Nec dubium id est, re ipsa pē-
nitus declarante. Hinc enim illud est, quodd
intercessionibus suis Pelagianistarum quere-
las fouet, & scriptis suis causas illorum adse-
rit: quodd subtiliter his, vel vt verius dixerim,
subdolē patrocinator, & consanguineā sibi
improbitali improbo suffragatur affectu: sciēs
scilicet eiusdem se esse sensus, eiusdem spiri-
tus, & ideo dolens cognitam sibi hāresim ab
ecclesia esse disiunctam, quam scit sibi vtique
peruersitate coniunctam. Sed tamen quia illi,
qui de hac pestilentium spinarum stirpe de-
scenderant, diuina ope iam ac pietate sanati
sunt, orandus quoque etiam nunc dominus
deus noster est, vt quia consentaneā sibi in
quibusdam pristina illa hāresis, & hāc noua:
similibus malorum initiis, similem bonorum
exitum largiatur. Leporius enim tunc mona-
chus, modo presbyter: qui ex Pelagii, vt supra
diximus, institutione, vel potius prauitate de-
scendens, apud Gallias adsertor prædictæ hā-
reseos, aut inter primos, aut inter maximos,
fuit à nobis admonitus, à deo emendatus: ita
malē conceptam persuasionem magnificē cō-
demnauit, vt non minus penē admiranda sit
correctio illius, quā illāsa multorum fides:
quia primum est errorem penitus non incur-
rere, secūdm bene repudiare. Is ergo in se re-
uersus, non solum in Africa, vbi tunc erat, at-
que nunc est, tam errorem suum cum dolore,
quā sine pudore confessus est: sed etiam ad

omnes admodū. Galliaē ciuitates, flebiles cō-
 fessionis ac plāctus sui literas dedit: scilicet vt
 vbi deuiatio eius prius cognita erat, illic etiā
 emēdatio nosceretur: & qui testes erroris an-
 tea fuerunt, iidem postea correctionis essent.
 Ex cuius cōfessione, vel potius deploratione,
 nonnulla inferēda existimauimus, duplici ex
 causa: vt correctio eorū & nobis testimonio,
 & his qui nutant, exemplo essent: quorūque
 errorem sequi non erubuissent, eorum emen-
 dationem sequi non erubescerent: ac sicut si-
 mili aegritudine infirmarētur, ita simili reme-
 dio sanarentur. Is ergo agnita opinionis suæ
 peruersitate, & inspecta fidei luce scribens ad
 episcopos Gallicanos, ita exorsus est: Quid
 in me primum ô domini mei venerandi, &
 beatissimi sacerdotes, accusem nescio, & quid
 in me primum excusem, non inuenio. Sic im-
 peritia & superbia, sic stulta simplicitas cum
 persuasione noxia, sic feruor cum intempe-
 rantia, sic vt verius dicam, cum sui diminu-
 tione debilis fides, simul in me omnia recepta
 viguerunt, vt tot & tantis simul sit & obedi-
 se confusio, & hæc eadem ab animo potuisse
 cedere mihi stupenda gratulatio. Et post pau-
 ca subiungit: Sic ergo minime percipientes
 hanc potentiam dei, sensu nostro & propria
 ratione sapientes, quasi in inferiora se deus
 agere videatur: ita hominem cum domi-
 no natum esse dicamus, vt seorsum quæ dei
 sunt, soli deo demus: & seorsum quæ sunt ho-

minis, soli homini reputemus. Quartam manifestissime introducimus in trinitate personam, & de vno filio dei non vnum, sed facere incipiamus duos Christos, quod à nobis iam ipse dominus & deus Christus auertat. Ergo confitemur dominum ac deum nostrum Iesum Christum vnicum filium dei, qui sibi ante secula natus ex patre est, nobis à tempore de spiritu sancto, & Maria semper virgine factum hominem, deum natum, Et confitentes vtraque substantiam carnis ac verbi vñ eundemque deum atque hominem inseparabilem, semper pia fidei credulitate suscepimus: & ex tempore susceptæ carnis, sic omnia dicimus quæ erant dei, transisse in hominem, vt omnia quæ erant hominis, in deum venirent. Et hac intelligentia verbum factum sit caro, non vt conuersione, aut mutabilitate aliqua cœperit esse quod non erat, sed vt potentia diuinæ dispensationis verbum patris nunquam à patre discedens, homo propriè fieri dignaretur: incarnatusque sit vnigenitus secreto illo mysterio quo ipse nouit: nostrum nãque est credere, illius nosse. Ac sic ipse deus verbum, totum suscipiens quod est hominis, homo sit: & adsumptus homo totum accipiendo quod deus est, aliud quàm deus esse non possit. Non tamen quia incarnatus dicitur, & immixtus, diminutio eius est accipienda substantiæ: nouit enim deus sine sui corruptione misceri, & tamen in veritate misceri; nouit in

se ita suscipere, vt nihil ei crescat augmenti: sicut seipsum totum nouit infundere, vt nihil accadat detrimenti. Non ergo ad intelligentiam imbecillitatis nostræ secundum experientorum visibilia documenta facientes coniecturam de æqualibus se in inuicem ingrediētibus creaturis, putemus deum hominēque commixtū, & tali cōfusione carnis & verbi, quasi aliquod corpus effectum. Absit ita credere, vt conflati quodammodo genere duas naturas in vnam redactā arbitremur esse substantiam: huiusmodi enim commixtio partis vtriusque corruptio est. Deus enim, qui capabilis non capax est, penetrans non penetrabilis, implens non implebilis: qui vbique simul totus est, & vbique diffusus est, per infusionem potentiæ suæ misericorditer naturæ est mixtus humanæ. Et post pauca: Nascitur ergo nobis propriè de spiritu sancto, & Maria semper virgine deus homo Iesus Christus filius dei. Ac sic in alterutrum vnum fit verbum & caro: vt manente in sua perfectione naturaliter vtraque substantia, sine sui præiudicio & humanitati diuina communicent, & diuinitati humana participent. Nec alter deus, alter homo, sed idem ipse deus qui & homo, & vicissim homo qui & deus Iesus Christus vnus dei filius nuncupetur & vere sit: & ideo id agendum nobis semper est & credendum, vt dominum nostrum Iesum Christum filium dei deum verū, quem cum patre semper, & æqua-

lem patri ante secula confitemur, eundem à tempore susceptæ carnis factum deum hominem non negemus: nec quasi per gradus & tēpora proficiētem in deum, alterius status fuisse ante resurrectionem credamus, alterius post resurrectionem, sed eiusdem plenitudinis, atque virtutis. Et item paulò post: Sed quia verbum deus in hominem dignanter hominem suscipiēdo descendit, & per susceptionem dei homo ascendit in verbum, totus deus verbum factus est totus homo. Non enim deus pater homo factus est, nec spiritus sanctus, sed vni-genitus patris: ideoque vna persona accipienda est carnis & verbi: vt ¹ fideliter sine aliqua dubitatione credamus vnum eundem dei filium, inseparabilem semper geminæ substantiæ, etiam gigantem nominatum in diebus carnis suæ, & verè semper omnia gessisse quæ sunt hominis, & verè semper possedisse quæ dei sunt. Quoniam & sic crucifixus est infirmitate, sed viuit ex virtute dei. Hæc ergo eius confessionem, id est, catholicorum omnium fidem, & omnes Africani episcopi, vnde scribebat, & omnes Gallicani, ad quos scribebat, comprobauerunt. Neque vllus adhuc omnino extat cui fides hæc sine infidelitatis crimine displiceret, probatam negare pietatem. Sufficere ergo solus nunc ad confutandam hēresim deberet consensus omnium: quia indubitatæ veritatis manifestatio est autoritas vniuersorum, & perfecta ratio facta est vbi nemo dis-

sensit: Ita vt qui contra hoc sentire nitatur, hu-
 ius prima statim fronte non tam sit audienda
 assertio, quàm damnanda perversitas: quia
 præiudicium secum damnationis exhibuit,
 qui iudicium vniuersitatis impugnat: & au-
 dientiae locum non habet qui à cunctis statuta
 conuellit. Confirmata enim semel ab omni-
 bus veritate, quicquid contra id venit, hoc
 ipso statim falsitas esse noscenda est, quod à
 veritate dissentit: Ac per hoc sufficere ei etiã
 id solum conuenit ad sententiam damnatio-
 nis, quod discrepat à iudicio veritatis. Sed ta-
 men quia rationi non obest sermo rationis, &
 semper veritas ventilata plus rutilat, melius-
 quæ est errâtes disputationis curatione corri-
 gi, quàm censuræ seueritate damnari: curanda
 est, quantum in nobis est, per diuinam opem
 in nouis hæreticis vetus hæresis, vt recepta per
 sacram misericordiam sanitate, medela potius
 eorum det sanctæ fidei testimonium, quàm
 damnatio iustæ seueritatis exemplum. Adsit
 tantum disputationi ac sermoni de se habito
 ipsa veritas, & pietate illa qua deum ex homi-
 ne dignata est, humanis erroribus opituletur,
 qui ad hoc se vel maximè in terris, atque in
 homine nasci voluit, vt falsitati amplius locus
 esse non posset.

IO ANNIS CASSIANI
de incarnatione Domini,
Liber Secundus.



Voniam libello primo quædam præmissimus, quibus nouum hæreticū ex antiquis hæreseos stirpib⁹ pululare adprobarem⁹, sufficere quidem ei ad excipiendā iustæ damnationis sententiam, debet priorum hæreticorum iusta damnatio. Quia cū easdem radices habeat, atque iisdem erroribus emergat, satis iā in authoribus suis ipse damnatus est, maximè cū id ipsum quod ipsi adserunt, etiam hi qui proximè ante hos malè secuti sunt, bene condemnarint, vt sufficere his abundè iam in alterutrum suorum exempla debeant, vel horum scilicet qui emendati, vel eorum qui condemnati sunt. Si enim corrigi queunt, habent in suorum correctionibus medullam: si corrigi non queunt, habent suorum damnatione sententiam: tamē ne præiudicio magis aduersum eos quàm iudicio vti velle existimemur, ipsam eorū in medium pestiferam propositionem, vel potius blasphemātem amentiam proferamus: sumentes in omnibus scutum fidei, & gladium spiritus, quod est

verbum dei, scilicet vt resurgens vetusti dra-
 conis caput, idem diuini sermōis gladius, etiā
 nunc in nouis anguibus defecet, qui prius in
 antiquis serpētibus amputauit. Nam cū idem
 horum error sit, qui illorum fuit: pro defectio-
 ne istorum haberi debet defectio illorum: &
 quia renascentes colubri pestiferos in ecclesia
 domini flatus agunt, & tabescere quosdam fi-
 bilis suis faciunt: vnguenda est propter nouas
 infirmitates antiquis curationibus recēs me-
 dela: vt etiam si illud quod prius actum est, nō
 valet ad languoris damnationem. hoc tamen
 quod nunc agimus, valeat ad languētium sani-
 tatem. Dicis itaque, quisquis es ille hæretice,
 qui deum ex virgine natum negas, Mariā ma-
 ttem domini nostri Iesu Christi theotocon, id
 est matrem dei, appellari nō posse, sed Christo θεοτόκον
 tocon, hoc est Christi tantum matrem, nō dei: Χριστο-
κομ.
 nemo enim, inquis, antiquiorem se parit. Ac
 de hoc quidē tam stulto argumento, quod na-
 tiuitatem dei carnali intelligentia æstimandā
 putas, & mysterium maiestatis humanis cre-
 dis censendum esse rationibus, postea si deus
 adnuct, disputabimus: nunc interim & Chri-
 stum deum, & Mariam matrem dei diuinis te-
 stibus approbemus. Audi itaque loquentem
 ad pastores de dei ortu angelū dei: Natus est, Luc. 2.
 inquit, vobis hodie saluator, qui est Christus
 dominus, in ciuitate Dauid. Ne solum vtique
 in Christo hominem intelligeres, & domini
 tibi & saluatoris nomē adiecit: scilicet vt quē

saluatorem esse cognosceres, deum nequaquā
esse dubitares: & cum saluandi virtus non nisi
diuinæ competeret potestati, diuinæ esse eum
potentiæ non ambigeres, in quo potentiam
saluandi esse didicisses. Sed hoc incredulitati
tuæ parum fortasse videatur: quia eum ange-
lus Dominum potius & saluatorem, quàm
Deum aut Dei filium nominaret: cum utique
impiissime deum neges, quem saluatorem esse
fatearis. Audi quoque archangelum Gabrie-
Lucæ 1. lem Mariæ virgini prædicantem: Spiritus, in-
quit, sanctus veniet in te, & virtus altissimi
obumbrabit tibi: ideo & quod nascetur in te
sanctum, vocabitur filius dei. Vides quemad-
modum natiuitatem dei indicaturus, diuini-
tatis opera præmiserit. Spiritus enim sanctus,
inquit, veniet in te, & virtus altissimi obum-
brabit tibi. Pulcherrime loquens angelus, di-
uinitate verborum, maiestatem diuini operis
explicuit. Spiritus enim sanctus virginis in-
teriora sanctificans, & in his potentia diuini-
tatis suæ spirans, humanæ se inseruit miscuit-
que naturæ: atque id quod alienum à se fue-
rat, suum fecit, virtute id sua scilicet, ac maie-
state præsumens. Ac ne ad introitum diui-
nitatis humana fortasse infirmitas non subsi-
steret, venerandam omnibus virginem virtus
altissimi roborauit: ut corpoream imbecilli-
tatem circumfusa vmbre suæ protectione fir-
maret, & ad consummandum conceptus sacri
inenarrabile sacramētum humana infirmitas

non deficeret, quam diuini obumbratio sustineret. Spiritus ergo, inquit, sanctus veniet in te, & virtus altissimi obumbrabit tibi. Si nasciturus itaque est sancta virgine homo tantummodo solitarius erat, quid tanto agebatur sacri aduentus nuntio? quid tanto diuinitatis ipsius apparatu? Si utique homo ex homine, & caro tantummodo nascebatur ex carne: iussio quippe tantum ad id potuerat, aut voluntas diuina sufficere. Si enim ad fabricandos coelos, fundandam terram, creandum mare, sedes denique & thronos, & angelos, & archangelos, & principatus, & potestates: si ad creandam postremo omnem coelestem militiam, & ad illa innumera diuinorum exercituum milium milia, sola sibi tantum voluntas dei imperiumque sufficit: quia ipse dixit, & facta *Psal. 32* sunt: ipse mandauit, & creata sunt: cur id ad conceptionem, ut tu ais, vnius hominis parum visum est, quod satis ad procreationem diuinorum omnium fuit? & id potentia ac maiestas dei, in ortu vnius infantuli parum credidit, quod ad conditionem terrenorum omnium coelestiumque suffecit. Sed illud utique est, quod illa omnia opera acta fuerant per iussione dei, natiuitas autem agenda non erat, nisi per aduentum: quia & concipi ab homine deus, nisi se donante, & nasci nisi se illabente non poterat: & ideo archangelus superuenturam virgini maiestatem sacram indicabat: videlicet ut quia agi tanta res per hominum officium non valebat, ipsius adfuturam deceret maiestatem in con-

ceptu, qui erat futurus in partu. Et ideo descendit verbum filius; adest maiestas spiritus sancti, virtus obumbrata patris: utique ut in sacramento sacrae conceptionis, omnis esset cooperatio trinitatis. Ideo, inquit, & quod nascetur in te sanctum, vocabitur filius dei. Bene addidit, ideo: ut ostenderet scilicet ideo hæc secutura, quia fuerant illa præmissa: & quia deus superuenisset in conceptione, ideo deus futurus esset in partu. Rationem ergo tantæ rei puellæ reddidit nescienti, dicens: Utique quia spiritus sanctus superueniet, quia virtus altissimi obumbrabit. Ideo & quod nascetur sanctum, vocabitur filius dei. Hoc est dicere: Ne ignores, inquit, hunc tantæ rei apparatus, hoc tanti mysterii sacramentum: ideo in te tota veniet maiestas dei: quia ex te nascetur filius dei.

Quid hic ultra adhuc ambigi, aut quid amplius dici potest? deum dixit superuenturum, dei filium nasciturum. Tu quære nunc, si placet, quomodo aut dei filius deus non sit, aut quomodo quæ deum edidit, theotocos, id est dei mater esse non possit. Sufficere ergo hæc tibi sola, imò sufficere hæc tibi summa deberet. Sed quia testimonia sacrae natiuitatis abundè suppetunt: utpote quæ idcirco omnia scripta sunt, ut ipsius testes essent: inspiciam⁹ in pauxilla aliqua portione, etiam adnunciationem de deo veteris testamenti: ut intelligas futurum ex virgine dei ortum, non tunc tantum cum factus est nunciatum, sed etiam ab ipso admodum mun-

di ortu esse prædictum: reuera vt quia ineffabile opus agendum erat, tolleret quandoque incredulitatem rerum præsentium præmissa semper adnuntiatio futurorum. Ait itaque Esaias propheta: Ecce virgo concipiet, & pariet filiū, Esa. 7.

& vocabunt nomen eius emanuel: quod est interpretatum, nobiscū deus. Quis est hic incredule ambiguitati locus? Cōcepturam propheta virginem dixit, virgo concepit: filium nasciturum, filius natus est: vocandum deum, vocatur deus. Hoc enim appellatur nomine quod natura. Vnde cum vocādum eum dei spiritus deum dixerit, probat se ab spiritu dei vacuum, qui se à consortio reddit diuinæ nuncupationis alienum. Ecce ergo inquit, virgo concipiet, & pariet filium, & vocabunt nomen eius emanuel: quod est interpretatum, nobiscum deus. Sed illud est forsitan quo se infidelis vertat tergiversatio: vt dicat hoc quod vocandum eum deum propheta dixerat, non tam ad maiestatem diuinitatis, quàm ad appellationem nominis pertinere. Sed quid facimus, quod appellatus hoc nomine in euangeliiis Christus omnino non est? & tamen mentitus esse propheta dei spiritus dici non potest. Quid ergo illud est? vt intelligamus vtique prophetiam illam diuinitatis nomen tunc prædixisse, non carnis. Nam cum aliud in euāgelio homo vnitus deo nomen acceperit, necesse est vtique hoc vocabulum hominis fuisse, illud diuinitatis. Sed pergamus vltcrius: & alia ad veritatem

Esa. 9. probandam veritatis testimonia cōuocemus. Vbi enim de deo agitur, nulla re diuinitas melius quàm suis testibus adprobatur. Ait ergo idem propheta alibi: Filius natus est nobis, paruulus datus est nobis: cuius principatus super humerum eius: & vocabitur nomen eius magni consilii angelus, deus fortis, pater futuri seculi, princeps pacis. Sicut superius vtique vocandum eum emanuel propheta dixerat: ita hic vocandum eum & magni consilii nuntiū, & dominum fortem, & patrem futuri seculi, & pacis principem dicit. cum vtique nullo loco eum in euangeliiis vocatum his nominibus legerimus: Vt intelligamus scilicet non carnis esse hæc vocabula, sed diuinitatis: atque illud in euangeliiis nomen esse hominis suscepti, hoc ingenitæ potestatis. Et quia nasciturus in homine deus erat, ita nomina ipsa per dispensationem sacram fuisse diuisa: vt & carni hominis nomē inderet, & diuinitati deus. Vocabitur ergo, inquit, magni consilii nuntius, deus fortis, pater futuri seculi, princeps pacis. Non hic quisquis es, ô hæretice, non hic propheta ille diuino spiritu plenus, exemplo adsertionis tuæ, illum qui natus est, conflatili statux & figmento insensibili comparauit. Filius enim, inquit, natus est nobis, paruulus datus est nobis, cuius principatus super humerum eius: & vocabitur nomen eius magni consilii nuntius, deus fortis. Ne hunc quem adnunciabat, alium quàm illum qui in carne na-

tus est intelligeres, nomen natiuitatis adiecit, dicens : filius natus est nobis, paruulus datus est nobis. Vides quot cognominibus ad demonstrandam corporalis ortus proprietatem propheta vsus sit? & natum enim eum, & paruulum nominauit: scilicet vt euidentius significationem natæ sobolis, nomen exprimeret paruitatis: præuidens absque dubio diuinus spiritus hanc blasphemantium hæreticorum peruersitatem, his omni mundo deum qui nascebatur, rerum ipsarum vocabulis demonstrauit: vt etiam si blasphemare hæreticus quereret, blasphemiae tamen locum penitus inuenire non posset. Filius ergo, inquit, natus est nobis, paruulus datus est nobis, cuius principatus super humerum eius: & vocabitur nomen eius magni consilii nuntius, deus fortis, pater futuri seculi, princeps pacis. Paruulum hunc qui natus est, & pacis principem esse docuit, & futuri seculi patrem, & deum fortem. Quis est tergiuersandi locus? separari paruulus hic qui natus est, à deo qui in eo natus est, non potest. hunc enim quem natum dixit, patrem futuri seculi nominauit: hunc quem paruulum nuncupauit, deum fortem prædixit. Quid est hæretice? quo te conferes? septa & conclusa sunt omnia: non est vsquam penitus exeundi locus. Superest vt errorem quem voluntas noluit intelligere, tandem incipiat vel necessitas confiteri. Sed non contenti his quæ sufficiunt, quid etiam per alium prophetam

Mala. 3. Spiritus sanctus dixerit, inquiramus. Si affiget, inquit, homo deum suum, quia vos affigitis me? ut euentiora utique fierent quæ prophetabantur, quod de passione domini nostri propheta cecinit, quasi ipsius de quo dicebat ore prædixit: Si affiget homo deum suum, quia vos affigitis me? Nonne tibi quæso dixisse hæc dominus deus noster quasi ad crucem ductus videtur? Cur quæso redemptorem vestrum non agnoscitis? Cur deum indutum pro vobis carne nescitis? saluatori vestro necem paratis? autorem vitæ ad mortem ducitis? Deus vester quem suspenditis, deus vester quem crucifigitis. Quis rogo hic error, aut quæ insania est? Si affiget homo deum suum, quia vos affigitis me? Vides quomodo vox hæc ipsarum quodammodo quæ actæ sunt rerum vox sit? Nunquid expressius quicquid aut manifestius quæres? Vides quomodo testimonia sacra natum in carne dominum Iesum Christum, ab ipsis quodammodo incubulis usque ad crucem, quam pertulit, persecuta sint? Cum utique illud quem alibi legis deum in carne nasci, hic deum in cruce videas affigi. Et ideo propheta, & illic ubi natus est, deus dicitur: & illic ubi crucifixus est, deus euidentissime nominatur: ne scilicet in aliquo dignitati diuinitatis præiudicaret carnis assumptio, & honorem maiestatis infringeret vel humilitas corporis, vel contumelia passionis: cum utique augere in nobis affectum eius & cultum debeat vel dignatio tam humilis natiuitatis,

vel pietas benigna patientis : quia maximum
 utique & immanissimum scelus est, ut ideo apud nos minus honoris habeat, quia plus amoris impendit. Sed his omissis, quæ explicari ideo nullo modo possunt, quia sicut immensitas beneficiorum illius, ita & relatio modum non habet: tempus est ut fortissimum de eo, ac manifestissimum testem eius apostolum Paulum consulamus: fidelissime enim nobis omnia de deo dicere potest, & cuius semper pectore locutus est deus. Testatur ergo in hunc modum de gratia atque aduentu dei nostri, missus ad destituendum gentilis superstitionis errorem electus gentium magister: Apparuit, inquit, gratia dei, & saluatoris nostri omnibus hominibus: erudiens nos, Ad tit. 2
 ut abnegantes impietatem, & secularia desideria, sobriè & piè, & iustè vivamus in hoc mundo: expectantes beatam spem, & aduentum gloriæ magni dei, & saluatoris nostri Iesu Christi. Apparuit, inquit, gratia dei saluatoris nostri. Bene congruo ad ostendendum novæ gratiæ, & generationis aduentum sermone usus est. Dicens enim, apparuit, ortum novæ gratiæ ac natiuitatis expressit: quia exinde apparere donum gratiæ novæ cœpit, ex quo deus in mundo natus apparuit. Digna ergo, & congrua hanc novæ gratiæ lucem verbi proprietate, qua si digito indicante monstravit. Hoc enim rectissimè apparuisse dicitur, quod subita

quasi apparitionis luce monstratur. Sicut in euangeliiis apparuisse stellam Magis orientabilibus legimus: & in Exodo, Apparuit, inquit, Moysi angelus in igne flammæ rubi. In omnibus enim & his & aliis visionibus sacris, hoc vtendum vel maxime verbo scriptura existimauit: vt apparuisse hæc diceret, quæ insolita claritate fulgerent. Ita ergo & apostolus sciens aduentum cælestis gratiæ quæ ortu sacre natiuitatis apparuit, verbo eam fulgidæ apparitionis expressit: vt apparuisse utique id diceret, quod nouæ lucis splendore radiaret. Apparuit ergo gratia dei saluatoris nostri. Nūquid causari hic aliquid quasi de ambiguitate nominum potes, vt dicas aliud esse Christum, aliud deum? vt saluatorem à maiestate nominis sui distrahas, & dominum à diuinitate secernas? Ecce hic vir dei ex deo loquitur, & apparuisse ex Maria gratiam dei, euidentissima prædicatione testatur. Ac ne forte non ex Maria deū apparuisse diceres, nomen statim addidit saluatoris: scilicet vt eum natum esse ex Maria deum crederes, quem saluatorem natum negare non possis. Iuxta illud: Quia natus est vobis hodie saluator. O admirabilem, & verè à deo datum gentibus magistrum: qui sciens futuram hanc hæreticæ prauitatis insaniam, quæ in litem vocabula dei verteret, & calumniari deo de suis nominibus non timeret: ne saluatoris vocabulum hæreticus à diuinitate secerneret, nomen dei antè præmisit: scilicet vt præ-

missum dei nomen omnia sibi quæ sequerentur nomina vindicaret: neque ullus in sequentibus solitarium esse hominem Christum crederet, quem in primo statim vocabulo deum esse didicisset. Expectantes, inquit idem apostolus, beatam spem, & aduentum gloriæ magni dei, & saluatoris nostri Iesu Christi. Vidit profecto ille diuinæ sapientiæ doctor, ad insidiosas calliditates diabolicæ captionis, simplicem tantummodo non sufficere doctrinam, nisi sanctam fidei prædicationē munimine cautionis armasset. Et ideo cum superius nomen dei saluatorisque posuisset, hic addidit, Iesu Christi. Licet ne ad significandum dominum Iesum Christum sufficere tibi forsitan nomen solum non crederes saluatoris: & non eundem Iesum Christum deum esse intelligeres, quem saluatorem deum esse cognouisses? Quid ergo ait? expectantes, inquit, beatam spem, & aduentum gloriæ magni dei, & saluatoris nostri Iesu Christi. Nihil hic de nominibus domini nostri deest: & deum hic & saluatorem & Iesum & Christum vides. Sed omnia hæc vidēs, omnia in deo esse perspicis. Audisti enim deū, sed saluatorem. Audisti deum, sed Iesum. Audisti deum esse, sed Christum. Separari hoc appellationis diuersitate non valet, quod diuinitas vnitatis cōiūxit. Quicquid libet de his requisieris, idem inuenies. Saluator deus est, Iesus deus est, Christus de^o est. Omne hoc quod audis plurale est nuncupatione, sed vnum est

sed vnum est potestate. Quia cum & saluator deus sit, & Iesus deus, & Christus deus: intelligere apertum est, quod omnia hæc distinguuntur appellatione, sed iunguntur maiestate. Et cum euidentissime audias quod vnus in singulis nuncupatur deus: intelligere vtique aperte potes, quod est in omnibus vnus deus. Ac sic non licet tibi iam ex dissimilitudine dominicæ nuncupationis quærere discrepantiam potestatis, & pro varietate appellationis diuersitatem facere personæ. Non licet dicere, Christus ex Maria natus est, & non deus, apostolus enim proclamat deus. Nō licet dicere, Iesus ex Maria natus est, & nō deus: apostolus enim testatur, deus, Non licet dicere saluator natus est, & non deus: apostolus enim cōfirmat, deus. Nihil est quo te conferas: quicquid de dominicis vocabulis sumpseris, deus est quod nominaris. Nihil est quod dicas, nihil est quod afferas, nihil quod improba falsitate confingas. Potes habere, in incredulitate impia, quod non credas, non habes in calumniandi occasione quod deneges. Quamquam quia de diuina hac saluatoris domini nostri gratia paulò superius loqui cœpimus, volo vt de eadem re adhuc ex lectionibus sacris aliqua dicamus. Legimus in actibus apostolorum apostolum Petrum eos qui euangelium recipientes, nihilominus tamen iugum vetustæ legis portandum esse censebant, ita redarguentem: Quid, inquit, tentatis deum, imponere iugum super ceruices di-

ſcipulorum, quod neque patres noſtri, neque
 nos portare potuimus? Sed per gratiam domi-
 ni noſtri Ieſu Chriſti credimus ſaluari, quem
 admodum & illi. Donum certè gratiæ huius
 per Ieſum Chriſtum datum apoſtolus dicit.
 Reſponde mihi nunc ſi placet, gratiam hanc
 quæ ad ſalutem omnium data eſt, ab homine,
 an à deo datam exiſtmes? Si ab homine, re-
 clamat tibi vas dei Paulus, dicens: Apparuit
 gratia dei ſaluatoris noſtri. Diuini enim eſſe
 gratiam hanc docet muneris non imbecilli-
 tatis humanæ. Et ſanè etiam ſi ſacrum testi-
 monium non ſuppeteret, ipſa rei veritas te-
 ſtimonio erat: Quia præſtare rem perpetui
 & immortalis boni, fragilia & terrena non
 poſſunt: nec dare quiſquàm alteri valet,
 quo ipſe indiget: aut tribuere illius rei co-
 piam, cuius rei inopiam ſuſtinere fateatur. A
 deo ergo neceſſe eſt gratiam datam non ne-
 ges. Deus ergo eſt qui dedit, data autem eſt
 per dominum noſtrum Ieſum Chriſtum: er-
 go dominus Ieſus Chriſtus deus. Si autem eſt
 ille, vtique vt eſt, deus, ergo illa quæ deū pe-
 perit, theotocos, id eſt genitrix dei. Niſi forte
 ad tã ridiculã blaſphemiam cõtradiçtionẽ ten-
 dere velis, vt illã ex qua deus nat⁹ eſt, dei ma-
 trem neges: cū illū qui nat⁹ eſt, deū negare nō
 poſſis. Sed videam⁹ tamẽ quid de hac eadẽ do-
 mini noſtri gratia etiã euangelii dei ſenſerit:
 Gratia, inquit, & veritas p Ieſū Chriſtū facta
 eſt. Si ſolitari⁹ homo Chriſtus, quomodo hæc

facta per Christum? Vnde in eo virtus diuina, si in eo sola humana conditio? Vnde cœlestis largitas, si terrena paupertas? Nemo enim potest tribuere quod non habet. Dans ergo diuinā gratiam Christus, habuit quod dedit. Neque enim potest harum diuersissimarū inter se rerum quis differentiam sustinere: vt simul & patiatur indigētiam inopis, & habeat munificentiam largientis. Et ideo sciens apostolus Paulus omnes diuitiarum cœlestiū thesauros in Christo esse, recte ad ecclesias scribit: Gratia domini nostri Iesu Christi vobiscum. Qui scilicet sapius iam docuerat eundē deum esse quem Christum: cūctamque in illo maiestatem deitatis esse, & omnem in eo corporaliter plenitudinem diuinitatis habitare, recte vtique iam sine adiectione nominis dei solam precatur gratiam Christi. Quia cū eādem docuerit sapius gratiam dei esse quam Christi, plenissime nunc solam precatur gratiam Christi: quia in gratia Christi omnē scit dei gratiam cōtineri. Gratia ergo, inquit, domini nostri Iesu Christi vobiscum. Interrogo te quisquis es o hæretice, scribens hæc ad ecclesias Paulus, qd his precabatur ad quos scribebat? Gratia enim, inquit, domini nostri Iesu Christi vobiscum. Si homo solitarius Iesus Christus: ergo & ille optans dari ecclesiis gratiam Christi, gratiā dari se optabat: & dicēs, gratia Christi vobiscum, hoc dicebat, gratia hominis vobiscum, gratia carnis vobiscum,

gratia imbecillitatis corporeæ: gratia fragilitatis humanæ. Aut cur omnino nomen gratiæ ipsius nominaret, si gratiâ hominis optaret? quia optandi ratio non subsistebat, ubi non erat quod optaretur: nec precandum erat, ut eius gratia his contingeret, qui substantiam, ut ais, ipsius quæ optabatur gratiæ non haberet. Ergo vides hæc stulta esse penitus & ridicula: imò potius non ridicula, sed flenda: ea enim quæ quibusdam facilioribus sunt ridicula, piis ac fidelibus flenda sunt. Quia in stultitia vestræ infidelitatis illi effundūt lachrymas charitatis, & in sapiētia impietatis alienæ illi habent lachrymas pietatis suæ. Respiciamus ergo aliquādo, & respiremus: quia sensus hic non sapientia tantum, sed etiam spiritu caret: cum sit utique spiritali sapientia vacuus, & spiritu salutis alienus. Sed dicas forsitan gratiam hanc domini nostri Iesu Christi, de qua apostolus scribit, nō cum ipso natam, sed postea ei illapsu diuinitatis infusam: quia & homo ipse à te dominus noster Iesus Christus, quem solitarium dicis, non cum deo natus, sed postea à deo dicatur assumptus: ac per hoc totum homini illi gratiam, quando & diuinitatem datam. Neque nos aliud dicimus quàm q̃ diuina gratia cum diuinitate descēderit: quia & diuina gratia dei sit & largitio quodammodo ipsius diuinitatis, ac donum munificētia gratiarum. Temporis ergo inter nos forsitan putetur magis quàm rei esse di-

stantia: quia diuinitatem quam nos cum domino Iesu Christo natam, tu postea dicas infusam. Sed illud est quod natam cum domino diuinitatem negans, nec postea fideliter confiteri potes: quia non potest vna eademque res in parte esse impia, & in parte probari pia: & eadem in portione fidei, & in portione esse perfidiæ. Primum ergo illud à te requiro: dominum nostrum Iesum Christum, qui ex Maria virgine natus est, hominis tantum filium, an etiam dei dicas filium? Nos enim, id est catholicorum omnium fides, quam omnes utrumque hoc & credimus, & intelligimus, & scimus & confitemur: quod & hominis est filius, quia ex homine natus est: & dei filius, quia ex diuinitate conceptus. Tu ergo utrumque hoc, id est dei filium atque hominis, an tantum hominis esse asseris? Si tantum hominis, reclamant tibi apostoli, reclamant prophete, reclamant denique ipse per quem est facta concepti, o spiritus sanctus: Obruitur impudentissimum os tuum cunctis diuinorum apicum testimoniis: obruitur sacris voluminibus sanctis testibus: obruitur denique ipso dei euangelio quasi diuina manu. Et Gabriel ille magnus, qui in Zacharia vocem incredulam virtute verbi sui coercuit, multo magis in te blasphemam atque impiam suo ipso ore damnavit, dicens ad Mariam virginem dei matrem: Spiritus, inquit, sanctus veniet in te, & virtus altissimi obumbrabit tibi. Ideo & quod

nascetur ex te sanctum, vocabitur filius Dei.
 Vides quòd vt secundum carnem hominis fie-
 ret filius Iesus Christus, antè est fili⁹ dei præ-
 dicatus? Paritura enim dominum virgo Ma-
 ria, sancto in se spiritu descendente, & virtu-
 te altissimi cooperante concepit. Ac per hoc
 intelligis, quòd domini saluatorisq̃ue nostri
 inde est origo vnde conceptus: & cum descē-
 dente in virginem totius diuinitatis plenitu-
 dine natus sit, filius esse hominis non potue-
 rat, nisi prius dei filius fuisset: & ideo missus
 ad adnūtiandam sacri ortus natiuitatem, an-
 gelus dei cum sacramentum conceptionis an-
 tè dixisset, partui ipsi nomen imposuit, dicēs:
 Ideo & quod nascetur ex te sanctum, vocabi-
 tur filius dei: hoc est illius filius nūcupabitur,
 quo generante est generatus. Dei ergo filius
 Iesus Christus: quia & à diuinitate genitus:
 & à diuinitate conceptus. Si autem dei filius,
 ergo indubitāter deus: si autē deus, ergo gra-
 tia dei nō carens: neque enim ea re vnquā ca-
 ruit, quā ipse fecit. Gratia enim & veritas per
 Iesum Christū facta est. Omnis ergo in eo gra-
 tia, omnis virtus, omnis potētia, omnis diui-
 nitas, omnis deniq; diuinitatis ac maiestatis
 ipsius plenitudo cū eo atq; in eo semper fue-
 rūt, siue in cœlo, siue in terra, siue in vtero, si-
 ue in ortu: nihil vnq̃ deo de deo defuit, sēper
 enim cū deo deitas, nō loco vnq̃ ab eo, nō tē-
 pore separata: vbiq; enim deus totus, vbique
 perfectus, non diuisus, non demutatus, non

imminutus est : quia nec addi vnquam deo,
nec detrahi quicquam potest : sic enim immu-
tationē deitatis non habet, sicut nec augmē-
tum. Idem ergo in terris fuit, qui & in cœlis:
idem in humilibus, qui in excelsis, idem in ho-
minis exiguitate, qui in dei maiestate. Et ideo
bene apostolus Christi gratiam nominās, dei
gratiam nominabat : Quia Christus totum
erat quod deus: omnis in ipsa stat hominis cō-
ceptione dei virtus, omnis diuinitas, omnis
diuinitatis venerat plenitudo. Inde enim illi
omnis diuinitatis perfectio, vnde & origo.
Neque enim vnquam sine deo fuerat homo
ille, qui vtiq; hoc ipsum quod erat, esse à deo
cœperat. Hoc itaque primum, velis nolis, ne-
gare nō potes, quod dominus Iesus Christus
filius dei sit : archangelo utique clamante in
euāgeliis: quod ex te nascetur sanctum, voca-
bitur filius dei. Hoc autē posito, scito te quic-
quid de Christo legeris, de Dei filio legeres:
quicquid de domino aut Iesu legeris, ad dei
filium pertinere. Omnia enim hæc illius nomi-
na, dei filium nominant : omnia hæc eius vo-
cabula, filium dei clamant. Et ideo tu in his
omnibus quæcunque audieris, nomen diui-
nitatis agnoscens, cum in omnibus videas te
dei filium intelligere debere, argumentare si
placet, quomodo deum valeas à dei filio sepa-
rare.

IOANNIS CASSIANI
de incarnatione domini,
liber tertius.



Cribens Romanis *Rom. 9.*
diuinus ille eccle-
siarū magister, cum
argueret, inō de-
flecter Iudeorum, id
est fratrum suorum
infidelitatē, his ver-
bis vsus est: Opra-
bā, inquit, anathe-
ma ipse fieri ego à

Christo pro fratribus meis: qui sunt cognati
secundum carnem, qui sunt Israelitæ: quorum
adoptio est filiorum, & gloria, & testamētum,
& legislatio, & obsequium, & promissiones:
quorum patres, ex quibus Christus secundum
carnem, qui est super omnia deus benedictus
in secula. O affectum & fidelissimi apostoli, &
piissimi propinqui: qui inæstimabili charitate
mori vult & pro cognatis vt proximus, & pro
discipulis vt magister. Et quæ tandem causa vt
mori vellet? vna vtique, vt illi viucrent. Vita
autem eorum in quo continebatur? in hoc sci-
licet, vt ipse ait, vt deum Christum secundum
carnem natum ex sua carne cognoscerent. Et
ideo vtique apostolus plus dolebat, quia cum
illi ex Israel natum non intelligerent, qui ex

suis æditum plus amare deberent. Ex quibus
 enim Christus, inquit, secundum carnem, qui
 est super omnia deus benedictus in secula. Eū
 scilicet ex illis Christum natū ait, secundum
 carnē, qui sit super omnia deus benedictus in
 secula. Ex quibus Christus enim, inquit, secū-
 dum carnem, qui est super omnia deus: Chri-
 stum utique secundum carnem natum ex illis
 non negas: sed idem qui ex illis datus est, deus
 est. Quid circumis? quid tergiversaris? Chri-
 stum ex Israel natum secūdem carnem deum
 esse apostolus dicit. Tu doce quando non fue-
 rit. Ex quibus Christus, inquit, secundum car-
 nē, qui est super omnia deus. Vides quia hoc
 apostolus vnitatem coniunxerit, separari omni-
 no non potest deus à Christo. Sicut enim ex
 illis Christum apostolus prædicat, ita deum in
 Christo esse confirmat. Aut utrumque hoc
 neges necesse est, aut utrumque fatearis. Na-
 tus secundum carnem Christus ex illis dici-
 tur: sed idem in Christo deus ab apostolo præ-
 dicatur. Vnde & alibi: Deus enim erat in
 Christo, mundum reconcilians sibi. Diuidi
 hoc ab alterutro nequaquam potest. Aut Chri-
 stum ex illis æditum denega, aut ex virgine in
 Christo æditum confitere. Qui est, inquit, su-
 per omnia deus benedictus in secula. Suffice-
 re quidē fidelibus ad indicandā maiestatem di-
 uinitatis nomen Dei abunde potuit: sed ad-
 dendo, super omnia deus benedictus in secu-
 la, blasphemiam perfidiæ assertionis exclusit:

2. Cor. 5

ne quis scilicet impiorum vocabulum dei interdū etiam hominibus temporarie dono diuinæ dispensationis, indultū, ad iniuriā summæ diuinitatis assumeret, & contumeliosos deo cōpāratiōibus coaptaret, sicut vtique illud, vbi ad Moysen dicit deus: Dedi te deum Pharaoni. aut illud: Ego dixi, dii estis, cū hoc Ps. 81. vtique, euidentissimam indulti nominis habeat significatiōē. Nam vbi dicit, ego dixi: non tā nomen est potestatis, quā sermo dicētis. Sed & illud vbi dicit: Dedi te deum Pharaoni: nō diuinitatem accipientis, sed potestatem dantis exposuit. Nam cum dixerit, dedi, in illo vtique, significata est dei potestas qui dedit, non diuinitatis natura in eo qui accepit. De deo autē ac domino nostro Iesu Christo cū dicitur, qui est super omnia deus benedictus in secula: & res statim p̄batur in verbo, & verbi res demonstratur in nomine: quia dei nomen in dei filio non significatio est adoptionis indultæ, sed veritas proprietatisque naturæ. Itaque inquit idem apostolus: Nos neminē ex hoc nouimus secundum carnem, & si cognouimus secundum carnem Christum, sed nunc iam non nouimus. Bene sibi cūcta sacri sermonis scripta conueniūt, & in omni penitus sui parte: etiā vbi verborum specie non consonant, rerum tamē virtute concordant: sicut in hoc quod ait, & si cognouimus Christum secundum carnē, sed nūc iam non nouimus: testimoniū enim dicti presentis, confirmatio superioris est, quo dixit:

ex quibus Christus secundū carnē, qui est super omnia deus benedict⁹ in secula. Illic enim posuit, ex quibus Christus secundum carnē: hic autem, & si cognouimus Christum secundum carnem: illic, qui est super omnia de⁹: hic autem, Christum secundum carnem, nunc iā non nouimus. Species verborum est alia, sed rei virtus vna: eundem enim quem illic secundum carnem natum deum super omnia prædicat, hic secundum carnem se iam non nosse cōfirmat. Ideo scilicet, quia eundem quē natum in carne nouerat, deum in secula confitetur: & ideo à se eum ignorari secundum carnem, quia super omnia deus. Hoc dicit, Non nouimus iam Christum secundum carnem: & hic, non nouimus iā Christum secundum carnem. Hoc ait, Quia est deus benedictus in secula. Ascendit ergo quodammodo, quasi in altiorē gradum doctrinæ apostolorum prædicationis: licet sibi sensu in vtroque conueniat, sacramentum tamen perfectæ fidei, quasi sententiæ expressionem confirmat, dicens: Et si cognouimus secundum carnem Christum, sed nunc iam non nouimus: videlicet, quia prius eum & hominem scimus & deum, nunc tantum deum. Cessante enim infirmitate carnis, nihil in eo iam nouimus nisi virtutem diuinitatis: quia totum in eo virtus est maiestatis diuinæ, vbi esse desiit infirmitas imbecillitatis humanæ. Omne ergo penitus hoc testimonio mysterium & sumptæ carnis, &

perfectæ diuinitatis exposuit. Dicens enim, Et si cognouimus Christum secundum carnem: sacramentum nati in carne dei locutus est. Adiiciens autem, Nunc iam non nouim⁹: vim depositæ infirmitatis explicuit. Ac per hoc cognitio illa carnis ad significationē pertinet hominis: ignoratio autem ad honorem diuinitatis. Hoc est enim dicere, Cognouim⁹ Christum secundum carnem, ut agnosceretur quod fuit quondam secundum carnem: nunc iam non cognouimus postquam esse desiuit. Natura enim carnis in spiritualem est translata substantiam: & illud quod fuerat quondam hominis, factum est totum dei. Et ideo nō nouimus Christum secundum carnem: quia absorpta per diuinam maiestatem infirmitate corporea, nihil sacro resedit corpori, ex quo imbecillitas in eo carnis possit agnosci. Ac per hoc quicquid fuerat prius substantiæ duplicis, factū est virtutis vnius. Cum utique nō sit dubiū, Christum qui crucifixus est ex infirmitate nostra, totum verè ex maiestate sua diuina. Quod scilicet apostolus omni scriptorū suorū corpore prædicans, bene etiam ad Galatas *Gala. 1.* scribens ait: Paulus apostolus nō ab hominibus neque per hominē, sed per Iesum Christū & deū patrem. Vides quàm bene sibi in prioribus presentibusque cōueniat. Illic enim dicit, nūc iam nō nouimus Christum secundum carnem: hic ait, non ex hominibus, neque per hominē, sed per Iesum Christum. Patet quem

admodum etiam hic idem quod in superiori-
bus doceat. Dicens enim, missum se nō per ho-
minem, hoc dicit, non nouimus Christum se-
cundum carnē: & ideo non per hominem mis-
sum, sed per Iesum: quia per Christum missus,
non per hominem missus sum, sed per deum:
nomen in eo humanitatis iam non est, in quo
totum sibi diuinitas vindicauit. Et ideo cū di-
xisset missum se non ab hominibus, neque per
hominem, sed per Iesum Christum: bene ad-
didit, & deum patrem: hoc est missum se à deo
filio esse designās. In quibus utique licet pro-
pter mysteriū sacræ & ineffabilis generatio-
nis, duplex sit persona, generantis & geniti:
vna tamē est virtus mittentis dei. Et ideo ille
missum se à deo patre & deo filio dicens, in
personis quidem dualem ostendit numerum,
sed in missione vnā docuit potestatem. Sed
per Christum, inquit, Iesum, & deum patrē,
qui suscitauit eum à mortuis. Præclarus uti-
que & admirabilis magister: sciens dominum
Iesum Christum sicut verum deum, ita & ve-
rum hominem prædicandum: ita semper ma-
iestatem diuinitatis in eo prædicat, ut incar-
nationis confessionem penitus nō relinquat,
excludens utique & phantasma Martionis
incarnatione vera, & paupertatem Hebionis
diuinitate perfecta: ne scilicet per alter-
utrum blasphemiae peruersitate dominus Ie-
sus Christus aut homo penitus sine deo, aut
deus sine homine credatur. Bene ergo aposto-

lus missum se sicut à deo patre, ita & à deo fi-
 lio prædicans, confessionem statim domini-
 cæ incarnationis adiunxit, dicens: qui susci-
 tauit eum à mortuis: verum scilicet incarna-
 ti dei corpus, suscitatum à mortuis docens.
 Iuxta illud: Etsi cognouimus Christum se-
 cundum carnem: bene addens, sed nunc iam
 non nouimus. Hoc enim se in eo nosse dicit
 secundum carnem, quòd sit à mortuis suscita-
 tus. In eo vero se eum iam non nosse secū-
 dum carnem, quòd cessante carnis fragilitate, in
 sola eum nouerit dei esse virtute. Fidelis sci-
 licet prædicandæ dominicæ diuinitatis, & sa-
 tis idoneus testis: qui in principio vocationis
 suæ cœlitus castigatus, maiestatem suscitati à
 mortuis domini nostri Iesu Christi, non fide
 tantum animi sui crederet, sed etiam oculis
 corporalibus approbasset. Vnde etiam apud
 Agrippam regem & cæteros mundi iudices Act. 26.
 differens, ita ait: Dum irem Damascum cum
 potestate & permissu principis sacerdotum,
 die media in via vidi rex de cœlo supra splen-
 dorem solis circūfulsisse me lumen, & omnes
 qui mecum simul erant: omnesque nos cum
 decidissemus in terram, audiui vocem dicen-
 tem mihi Hebraica lingua: Saule Saule quid
 me persequeris? durum est tibi contra stimu-
 lum calcitrare. Ego autem dixi: quis es domi-
 ne? Dominus autē dixit ad me: ego sum Iesus
 Nazarenus, quem tu persequeris. Vides quòd
 eum apostolus, quem in tanto maiestatis ful-

gore viderat, rectè iam se secundū carnem nō nosse dicebāt. Cum enim iubar illud diuini luminis quod sustinere non potuit, in ipsa sui prostratione vidisset, vox hæc secuta est: Saule Saule, quid me persequeris? Cui quærēti quis esset, ita euidenti dominus personæ suę significatione respondit: Ego sum Iesus Nazarenus, quem tu persequeris. Te, te inquam hæretice nunc interrogo, te appello: credis de se apostolo, aut non credis? aut si id parum æstimas, credis de se domino, aut non credis? Si credis, finita quæstio est. Hoc enim necesse est quod nos credimus credas. Nos enim iuxta apostolum, & si cognouimus Christum secundum carnem, sed nunc iam non nouimus. Nos Christum contumeliis non affecimus: nos carnem à deo non separamus, & totum quod Christus est, esse in deo credimus. Tu ergo si idem quod nos credimus credis, eadem necesse est fidei sacramenta fatearis. Si autem à nobis dissides: si neque ecclesiis, neque apostolo, neque ipsi denique de se deo credis: ostende nobis in hoc quod apostolus vidit, quid sit caro, & quid sit deus. Ego enim hic discernere nihil valeo. Video ineffabile illuminationem: video inexplicabilem claritatem: video splendorem humanæ fragilitati intolerabile: & supra id quod ferre mortales oculi queunt, inæstimabilem maiestatem dei luce fulgentē. Quæ hic diuisio, quæ hic discretio est? In voce Iesum audimus, in maiestate deum cerni-

mus : quid est aliud nisi vt in vna eademque
 substãtia deum & Iesum esse credamus? Volo
 tamen de hoc eodem adhuc aliquid apud te
 loqui. Dic mihi quæso: Si tibi nunc persequẽ
 ti fidem catholicam id appareret, quod igno-
 ranti apostolo tunc apparuit: si te inopinãtem
 atque securum fulgor ille circundaret, & per-
 cussum atque perterritum splendor immensi
 luminis consterneret, lateresque in tenebris
 oculorum atque errorum tuorũ: quas tibi im-
 mensas & ineffabiles angustias pauor mentis
 augeret? Dic mihi obsecro: cum te imminen-
 tis mortis formido premeret, & terror com-
 minantis desuper maiestatis vrgeret: audires
 quoque illud in tanta mentis confusione di-
 gnum perfidia tua nomen: Saule Saule quid
 me persequeris? & quærenti tibi quis esset,
 responderetur è cœlo: ego sum Iesus Nazare-
 nus, quem tu persequeris: quid diceres? Ne-
 scio, non ad plenum adhuc credo: deliberare
 amplius mecum volo, quem te esse existimem
 qui è cœlo loquaris: qui me fulgore tuæ diui-
 nitatis obruas: cuius vocem audiam, & ma-
 iestatem ferre non possim. Tractandũ mihi de
 hoc negotio est, credendum tibi sit, an nõ cre-
 dendum: Christus sis tu, an deus: si deus solus
 sis, an in Christo: si Christus solus sis, an ï deo.
 Discretionem hanc subtiliter obseruari, &
 diligenter considerari volo, quid credendus
 sis, quid iudicandus sis. Nolo enim aliquid
 de officio meo perdere: vt cum te vt hominem

despiciam, aliquid tibi diuini honoris impen-
dam. Si ergo vt Paulus tunc apostolus iacuit,
prostratus hūmi iaceres, & fulgore diuini lu-
minis obrutus, extremos spiritus ageres: hæc
forſan diceres, hac ocioſa loquacitatis garru-
litate gannires. Sed quid facimus? quod aliud
tunc apostolo viſum eſt. Et cum tremens ac
ſemianimis concidiſſet, diſſimulandum vltra
non cenſuit, deliberandum amplius nō puta-
uit: ſuffecitque ei quod ineffabilibus experi-
mentis quē ignorans hominem eſſe credidit,
admonitus deum eſſe cognouit: non diſſimu-
lauit, non diſtulit: nec male conceptū errorem,
infideli amplius deliberatione ſuſpēdit: ſed
audito è cēlis Ieſum domini ſui nomine, ſub-
dita vt ſamulus, trepida vt flagellatus, deuota
vt conuerſus voce reſpondit: Quid faciā do-
mine? Itaq; paratiſſima, ac deuotiſſima fide id
ſtatim meruit: vt quem fideliter credidit, eo
ipſo iugiter nō careret: & ad quē corde trāſie-
rat, iſ in cor eius ipſe tranſiret: dicēte ipſo de
ſe apostolo: An experimentū queritis eius qui
in me loquitur Chriſti? Quo loco volo hēre-
tice, vt mihi diſſeras, hūc quē loqui apoſtolus
intra ſe dicit, homo ſit an deus? Si homo, quo
modo in corde eius corpus loqui poterat al-
terius? Si deus, ergo iam nō homo Chriſtus,
ſed deus; quia cum locutus in apoſtolo Chri-
ſtus ſit, & loqui in eo non potuerit: niſi deus:
ergo locutus in eo eſt Chriſtus deus. Vides
itaque, nihil eſſe hic iam quod dici queat,

nec disunctionem, aut diuisionem aliquā inter Christum fieri & deum posse: quia totus in Christo deus, & totus in deo Christus. Nulla hic recipi disseparatio potest, nulla discisio: vna tantum est simplex, vna tantum pia & sana confessio, adorare, amare, colere Christū deū. Vis autem adhuc plenius & cumulatius scire nullam inter deum & Christum esse distātiā? & eundem penitus deum intelligendum esse quem Christū? Audi apostolū ad Corinthios 2. *Cor. 5* loquentem: Omnes enim nos, inquit, manifestari oportet ante tribunal Christi, vt referat vnusquisque propria corporis, prout gessit, siue bonum, siue malum. Alio loco ad Romanā ecclesiā, scribens: Omnes, inquit, stabimus *Ro. 14.* ante tribunal dei. Scriptum est enim: Viuo ego *Esā. 45.* dicit dominus: quia mihi flectetur omne genu, & confitebitur omnis lingua deo. Vides ergo vnum atq; idem tribunal dei futurū esse quod Christi? intellige ergo indubitanter Christum deū: & vbi vides inseparabilem penitus Christi ac dei esse substantiam, inseparabilem quoque agnosce esse personam. Nisi fortē quia apostolus, in alia nos manifestandos epistola ante tribunal dei dixit: duo forte tribunalia facias, & alios iudicandos à Christo, alios à deo censeas. Sed hæc friuola & furiosa sunt, & infanientibus infaniora. Agnosce ergo omniū dominum, agnosce vniuersitatis deum, agnosce in tribunali dei tribunal Christi, agnosce in tribunali Christi tribunal dei. Ama vitā, ama

salutem tuam, ama à quo creatus es: metue à quo iudicandus es. Velis enim nolis, manifestādas ante tribunal Christi es, & seposita impietatis blasphemia, ac verborum infidelium cātilena, si aliud putas tribunal dei esse quàm Christi: venies ante tribunal Christi: & inuenies vtique documento inexplicabili, ipsum tribunal dei esse quod Christi, totamque in filio Christo, & filii dei maiestatem, & patris

Ioan. 5. dei potestatem. Non enim pater iudicat quēquam, sed iudicium omne dedit filio: vt omnes honorificent filium, sicut honorificant patrem. Qui enim negat patrem, & filium: omnis qui negat filium, nec patrem habet: qui confitetur filium, & patrem habet. Disce itaque inseparabilem esse patris ac filii honorem, inseparabilem dignitatem: neque honorari filiū sine patre, nec patrem posse sine filio. Honorare autem deum ac dei filium, nisi in Christo vnigenitq; dei filio nullus valet: Quia spiritum ipsum vtq; homo, nisi in spiritu Christi habere non potest, dicente apostolo: Vos autem in carne non estis, sed in spiritu, si tamen spiritus dei habitat in vobis. Si quis autem spiritum Christi non habet, hic

Ibidem. nō est eius. Et iterum: Quis accusabit aduersus electos dei? deus qui iustificat. Quis est qui condemnet? Christus Iesus, qui mortuus est, imò qui resurrexit. Vides ergo iam, etsi non vis, nullā omnino penitus vel inter spiritum dei & spiritum Christi, vel inter iudicium dei,

& iudicium Christi esse distantiam. Tu elige
 vtrum malis: alterum enim fieri necesse est, vt
 aut Christum deum esse fide intelligas, aut in
 Christo deum damnatione cognoscas. Sed vi-
 deamus cætera quæ sequuntur. Scribens ad
 Corinthiorū ecclesiam idem de quo superius
 locuti sumus doctor ecclesiarum omnium Pau 1. Cor. 1
 lus, ita locutus est: Iudæi, inquit, signa petunt,
 & gentes sapientiam quærunt: nos autem præ-
 dicamus Christum crucifixum: Iudæis quidem
 scandalum, gētibus autem stultitiam, ipsis au-
 tem qui salui fiunt, Iudæis atque gentibus,
 Christum dei virtutem, & dei sapientiam. O
 fortissimum fidei magistrum: cui docenti ec-
 clesias, parum etiā hoc loco visum est, vt Chri-
 stum deum esse diceret, nisi crucifixum addi-
 disset: scilicet vt ad exertissimam ac validissi-
 mam fidei doctrinam eundem quem crucifi-
 xum diceret, dei sapientiam prædicaret. Non
 ergo subtilitate aliqua, aut circumitione ver-
 borum vsus est: nec in prædicando domi-
 ni euangelio, crucis Christi nomen erubuit.
 Et licet hoc scandalum esset Iudæis, & stulti-
 tia gentibus, deum audire natum, deum audi-
 re corporeum, deum audire passum, deum au-
 dire crucifixum: nō tamen ille propter Iudæi-
 ci scandali impietatem, virtutem pietatis suæ
 non enarrauit: aut propter alienę stultitię infi-
 delitatē, fidei suæ robur imminuit: sed palàm,
 constanter, fortiter eum quem caro ædiderat,
 homines occiderant, lancea perforarat, crux

distenderat, virtutem dei & sapientiam prædicabat, Iudæis quidem scandalum, gentibus autem stultitiam. Sed tamen hoc quod erat aliis scandalum ac stultitia, aliis erat virtus dei & sapiētia. Pro diuersitate enim personarum, erat diuersitas sensuū: & quod expers sani intellectus, & incapax veri boni diffidentia insipiens denegauerat, id intra ipsos animæ recessus sacrum esse ac salutiferum fides sapiēs sentiebat. Dic mihi ergo hæretice, hostis quidem omnium, sed tuus maxime: cui crux domini nostri Iesu Christi, & cum Iudæis scandalum est, & stultitia cum gentibus: qui sacramenta veræ salutis & illorum respuis scandalo, & istorum non sapis stoliditate: cur Pauli apostoli prædicatio, aut paganis stultitia, aut Iudæis scandalum fuit? nunquid potuerat offendere homines, si Christum vt tu asseris, solitarium esse hominem etiam ipse docuisset? Cui enim natiuitas illius, cui passio, cui crux, cui peremptio incredibilis aut grauis esse potuisset? aut quid noui vel inauditi in se Pauli prædicatio fecerat, si id passum hominem Christum esse dixisset, quod passim quotidie in hominibus conditio humana toleraret? Sed illud vtique erat, quod gentilis stultitia non recipiebat, quod Iudaica infidelitas respuebat: quod Christum vtique, quem illi, vt tu, solitarium hominem arbitrabantur, apostolus deum esse dicebat. Hoc erat vtique quod impiorum sensus refutabat, quod perfidorum aures ferre non poterant: in ho-

mine Iesu Christo dei prædicare natiuitatem, dei asseri passionem, dei annunciare crucem. Hoc utique erat graue, hoc incredibile: quia hoc erat incredulum humanæ audientiæ, quod inauditum fuerat diuinæ contigisse naturæ. Itaque securus es tali hac affirmatione, atque doctrina, quòd nunquam prædicatio tua aut gentibus stultitia, aut Iudæis scandalum erit. Nunquam tu à Iudæis atque gentibus aut cum Petro crucifigêris, aut cum Iacobo lapidaberis, aut cum Paulo capite plectêris. Non enim habet prædicatio tua illorum offensionem. Solitarium hominem natum, solitarium passum asseris. Timere non potes, ne persecutione sua te illi lædant: cum tu eos tua prædicatione cõfirmes. Sed videamus tamen adhuc aliquid de hoc ipso. Christus ergo iuxta apostolum, virtus dei & sapientia dei est. Quid habes quod respondeas? quid habes quo te conferas? Exire hic & progredi nusquam potes. Christus dei sapientia est, & dei virtus. Ille quem Iudæi insectati sunt, quem gentiles riserunt, quem tu cum illis ipse persequeris. Ille inquam, qui & pagani stultitia est, & Iudæis scandalum, & tibi

- vtrunque: ille inquam est dei virtus, & dei sapientia. Quid habes quod agas? claudes fortasse aures ne audias. Hoc & Iudæi apostolo prædicante fecerunt. Quid libet facias, Christus in cœlo est, & in deo, & cum eo, atque in eo in superioribus, in quo & in inferioribus fuit: persequi eum iam cum Iudæis non potes.

Sed facis vnum tamen quod potes : persequeris eum in fide, persequeris in ecclesia, persequeris in opinionis impiæ telo, persequeris prauis dogmatis gladio. Plus fortè aliquid quàm quidam veterum Iudæorum facis: Christum tu nunc persequeris, postquam eum etiam illi qui persecuti fuerant, crediderunt. Sed minoris criminis forsan putas, quod iniicere in eum iam manus non potes. Non minus inquam, nõ minus grauis illa est persecutio, in qua eum in suis impii persequuntur. Sed offendit te dominicæ crucis nomen : hoc & Iudæos semper offendit. Exhorrescis deum audire passum: hoc & gentilis error irrisit. Quæro ergo nunc, in qua ab illis parte dissides, cum in hac tibi atque illis peruersitate cõueniat? Sed ego prædicationem hanc dominicæ passionis non solum imminuo, sed quantũ in voto est ac substantia mea, augeo. Nunc enim qui crucifixus est, non solum virtutem ac sapientiam dei, qua nihil maius est, sed etiam totius diuinitatis ac maiestatis dominum prædicabo. Hoc magis quod in hoc sermo meus doctrina dei est, dicente apostolo: Sapientiam loquimur inter perfectos: sed sapiẽtiam non huius seculi, neq; principum huius seculi, qui destruuntur: sed loquimur dei sapientiam in mysterio, quæ abscondita fuit: quã prædestinauit deus ante secula in gloriam nostram: quam nemo principũ seculi huius cognouit. Si enim cognouissent, nunquam dominum maiestatis crucifixissent. Sed sicut

1. Cor. 2

scriptum est: Quod oculus non vidit, nec auris audiuit, nec in cor hominis ascendit, quæ præparauit deus his qui diligunt eum. Vides quàm breuiter sermo apostolicus quanta dixerit? Sapientiam se loqui dicit, sed sapiētiam quam perfectè tantummodo sapientes sciant, prudentes seculi nesciant. Dei enim hoc ait esse sapientiam, quæ sit diuino tecta mysterio, & ante omnia secula in sanctorum gloriam prædestinata: atque ideo eam his tantum qui deum sapiunt, esse cognitam, principibus autem seculi huius penitus ignotam. Causam autem subdidit, qua vtrunque quod dixerat comprobaret, dicens: Si enim cognouissent, nunquam dominum maiestatis crucifixissent. Sed sicut scriptum est, quod oculus non vidit, nec auris audiuit, nec in cor hominis ascendit, quæ præparauit deus his qui diligunt eum. Vides ergo quòd sapientia dei in mysterio abscondita, & ante secula prædestinata, his fuit incognita qui maiestatis dominum crucifixerunt? his autem cognita qui susceperunt? Bene autem mysterio absconditam dicit dei fuisse sapientiam: quia nullus hoc vnquam hominis vel oculus videre, vel audire auris, vel cor potuit cogitare, quòd maiestatis dominus vel nasciturus esset ex virgine, vel venturus in carne, vel omni afficiendus pœnæ, & contumeliæ passione. Sed hæc vtique dei dona, sicut nemo est qui, cum essent abscondita in mysterio, sapere vnquam per se poterit: ita

beatus est qui reuelata cognouit. Vnde quicūque eam non agnouerunt, necesse habeantur inter principes seculi: qui autem cognouerunt, inter sapientes dei. Non agnoscit ergo deum in carne natum dominum qui negat: ergo & vos non agnoscitis qui negatis. Sed quidlibet faciatis, quamlibet impiè negatis: nos plus apostolo credim⁹. Et quid apostolo dico? plus deo credimus. Ipsi enim per apostolum credimus, quem locutum in apostolo certi sumus. Dominum maiestatis sermo diuinus crucifixū à principibus huius seculi dicit, tu negas: & illi negabant deū se crucifigere qui crucifigebāt. Habēt ergo qui confitentur, cum confitente apostolo partē: habeas tu necesse est cum persecutibus portionem. Quid ergo est hic iam quod dici queat? dominum maiestatis crucifixū apostolus dicit: immuta hoc, si potes: separa nūc, si vales, Iesum à deo. Crucifixum certè à Iudæis Christum negare nō potes. Sed dominus maiestatis est qui crucifix⁹ est: ergo necesse est, aut Christi affixū esse in cruce deneges: aut deū affixū esse fatearis. Sed fortè offendit te, q̃ tandiū vnus vel maximè Pauli apostoli testimoniis loquor. Satis mihi idoneus est quem elegit deus: nec enim erubescō eum fidei meæ habere testem, quem deus voluit mundi totius esse doctorem. Sed tamen vt acquiescam in hoc volūtati tuæ, qui habere me forsā præter ea quib⁹ vsus sum testimonia non arbitraris, audi perfectum humanę salutis & sempiternę beatitudinis sacra-

mentum, Martham in euangelio prædicantē. Quid enim ait? Vtique domine, ego credidi, *Ioan. 11* quia tu es Christus filius dei viui, qui in hunc mundum venisti. Disce à muliere fidem verā: disce æternæ spei confessionem. Habes tamen grande solatium: non erubescas ab ea sacramentum salutis agnoscere, à qua testimonium deus non refutauit accipere. Quod si autoritas tibi forsan personæ maioris placet: quamuis nullius displicere vel persona vel sexus debeat, cui confessio sacramenti autoritatem facit: quia quamlibet conditio cuiusquam aut locus minor sit, virtus tamen fidei nescit imminui. Interrogemus tamen non incipientem aliquem puerulum, cuius institutio rudis: aut fœminam, cuius fides forsitan videatur incipiens: sed summum illum & inter discipulos discipulum, & inter magistros magistrum: qui Romanæ ecclesiæ gubernaculum regens, sicut fidei habuit, ita & sacerdotii principatū. Dic nobis ergo, dic nobis quæsumus princeps apostolorum Petre, dic quemadmodum credere ecclesiæ deum debeant: æquum est enim vt doceas nos, doctus à domino, & aperias nobis ianuam, cuius clauem accepisti. Exclude omnes suffodientes cœlestem domum: & eos qui per adulterinas cauernas, & illicitos intrare aditus moliūtur, auerte: quia certum est quodd nullus ostium regni intrare poterit, nisi cui clavis à te in ecclesiis collocata referarit. Dic ergo quæadmodum credere Iesum Christum

& confiteri communem dominum debeamus. Respondebis utique absque dubio: Quid me consulis qualiter dominus confitendus sit? quum habeas qualiter sim ego ipse confessus. Lege euangelium, & non requires personam meam, cum habeas confessionem meam: imò illic habes personam meam, ubi confessionem meam: quia cum persona mea auctoritatem sine confessione non habeat, auctoritas est personæ meæ ipsa confessio. Dic ergo euangelista, dic nobis confessionem, dic summi fidem apostoli: hominem ne tantum confessus sit Iesum, an deum: carnem in eo tantum esse dixerit, an dei filium prædicarit? Interroganti ergo domino Iesu Christo, quem cum crederet, quem confiterentur esse discipuli, respondet primus apostolorum Petrus, vnus utique pro omnibus: idem enim vnus habuit responsio, quod habebat omnium fides. Sed primum decuit respondere: ut idem esset ordo responsionis qui erat honoris: & ipse antecederet confessione, qui antecedebat ætate. Quid ergo ait? Tu es, inquit, Christus filius dei viui. Simplici & rustica interrogatione ad confutandum te mihi hæretice uti necesse est. Dic mihi quæso, quis ille fuerit, cui Petrus ista respondit? Negare non potes Christum fuisse. Interrogo ergo, Christum quem vocas? hominem an deum? hominem utique absque dubio: hinc enim omnis est tua hæresis, quia negas Christum filium dei. Et ideo etiam Mariam Chri-

stotocon esse, non theotocon dicis: quia Christi
 generatrix sit, non dei. Christum ergo homi-
 nem tantum asseris, non deum: & ideo filium
 esse cum hominis, non dei. Quid ergo ad hæc
 respōdit Petrus? Tu es, inquit, Christus filius
 dei viui. Christum hunc quē tu hominis tantū
 filiū esse asseris, ille testat' filiū dei. Cui vis cre-
 damus? tibi an Petro? opinor nō es tam inpu-
 dēs, vt præponere te audeas primo apostolorū.
 Tamen si quid est quod tu nō audeas? aut quē-
 admodū apostolū nō despicias, qui deū negare
 potuisti? Tu es, ergo inquit, Christus filius dei
 viui. Nunquid hoc ambigui? aut obscuri ali-
 quid in se habet? simplex tantum est & aperta
 confessio, Christum dei filiū prædicat. Ne-
 gas fortasse dictum: sed euangelia testātur. An
 mentiri apostolum dicis? sed detestabilis falsi-
 tas, apostolum falsitatis accusans. An de alio
 Christo aliquo forsan hoc dictum esse cōten-
 dis? Sed nouum prodigiosi commenti genus.
 Quid ergo reliquum est? vnū scilicet, vt cum
 scriptum sit legatur, & verum sit quod legi-
 tur, tandem vel vi vel necessitate constrictus,
 cum falsitatem astruere non valeas, verita-
 tem impugnare desistas. Sed tamen quia sum-
 mi apostoli testimonio vsus sum, quo domi-
 num Iesum Christum coram deo ipse con-
 fessus sit: videamus quemadmodum confes-
 sionem eius is quem confessus est approbarit:
 quia plus est multo quàm quod apostolus di-
 xit, si dictum illius deus ipse laudauit. Dicenti

ergo apostolo: tu es Christus filius dei uiui: quid à domino saluatore responsum est? Beatus es, inquit, Simon Bariona: quia caro & sanguis nō reuelauit tibi, sed spiritus patris mei, qui in cœlis est. Si displicet tibi vti apostoli testimonio, dei vtere: laudādo enim deus quod dictum est, auctoritatem suam apostolico dicto addidit: ita vt etiā si dictum illud apostoli ore prodiit, suum esse hoc tamen deus fecerit qui probauit. Beatus es, inquit, Simon Bariona: quia caro & sanguis non reuelauit tibi, sed spiritus patris mei, qui in cœlis est. Ergo in apostoli dicto & spiritus sancti, & præsentis filii & dei testimonium vides: quid ergo amplius aut quid simile requires? Filius laudauit, pater interfuit: spiritus reuelauit. Apostoli ergo dictū totius diuinitatis est testimonium: quia illius necesse est hoc dictū auctoritatem habeat, quo auctore processit. Beatus ergo es, inquit, Simon Bariona: quia caro & sanguis non reuelauit tibi, sed spiritus patris mei, qui in cœlis est. Ergo si Petro non caro & sanguis reuelauerunt ista & inspirauerunt, iam intelligis qui inspirauerit tibi. Si illum spiritus dei docuit, qui Christum deum esse confessus est: vides quod tu spiritu dæmonis doctus sis, qui negare potuisti? Sed tamē dictum illud domini, quo colaudauit Petrum, quæ dicta alia consequuntur? Et ego, inquit, tibi dico: quia tu es Petrus, & super hanc petram ædificabo ecclesiam meam. Vides quod dictum Petri ecclesiæ fides

est? ergo extra ecclesiam sit necesse est, qui fide ecclesiæ non tenetur. Et tibi, inquit dominus, dabo clauēs regni cœlorum. Fides hæc cœlum meruit: fides hæc clauēs regni cœlestis accepit. Intellige quæ tē maneant. Introire clauis huius ianuam non poteris, qui fidem clauis istius denegasti. Et portæ, inquit, inferni non præualebunt aduersum te. Portæ inferni fides est hæreticorum, imò perfidia. Quātum enim à cœlo inferna distant, tantum ab eo qui Christum deum confessus fuerit, is qui negat. Quæ ligaueris, inquit, in terris, ligata erunt in cœlis: & quæcunque solueris super terram, erunt soluta & in cœlis. Perfecta apostoli fides potestatem quodammodo diuinitatis accepit: ut quæ ligasset vel soluisset in terris, vel ligata essent in cœlestibus, vel soluta. Tu ergo qui contra fidem apostoli venis, cum ligatum te iam in terris videas, superest ut ligatum quoque in cœlis esse cognoscas. Sed longum est ire per singula, quæ prolixissimam & copiosissimam dissertationem numero sui faciunt, etiam si breuiter strictimque memorentur. Sed vnum addere tamen adhuc tibi apostoli testimonium volo: ut intelligas his quæ ante passionem domini acta sunt, ea etiam quæ post passionem sunt secuta congruere. Illapsus in conuentum discipulorum suorum clausis dominus ianuis, cum veritatem corporis sui apostolis declarare voluisset: palpata Thomas apostolus carne illius, tractato latere, exploratisque vulneri-

bus, comperta penitus manifestati corporis
Ioā. 20. veritate, quid proclamauit? Dominus, inquit,
meus & deus meus. Nunquid dixit hoc quod
tu dicis? homo & non deus, Christus & non
diuinitas? Corpus utique domini sui tetigit,
& deum esse respondit. Nunquid discretio-
nem aliquam hominis & dei intulit? aut car-
nem illam theotocon, ut tu ais, id est, susce-
ptricem deitatis imaginem nominauit? vel
more impietatis tuæ eum quem contigit, non
propter se, sed propter eum quem in se rece-
perat, venerandum esse memorauit? Sed sub-
tilitatem hanc discretionis tuæ apostolus dei
fortè non norat: & elegantiam iudicii tui ac
differentiam non habebat? homo videlicet ru-
sticus & imperitus, Dialecticæ artis, nescius,
Philosophicæ disputationis ignarus: cui scili-
cet institutio domini sui abunde sufficiebat:
& qui nihil omnino sciebat nisi hoc quod do-
mino docente cognouerat. Et ideo sermo suus
cælestis doctrina erat: fides sua magisterium
diuinum erat: disiungere, ut tu facis, à corpo-
re suo dominum non didicerat: & diuellere à
seipso deum penitus nesciebat, Sanctus, syncè-
rus, pius: innocentiam, peritiam, fidem illæ-
sam, scientiam incorruptam habens: sensum
cum astutia simplicem, cum perfecta simplici-
tate sapientiam totius mali expertem, totius
corruptionis ignarum, totius hæreticæ per-
uersitatis immunem: & qui formam diuini
magisterii in se exprimens, hoc tantum quod

didicerat tenebat. Itaque ille, vt tu forsitan putas, rusticus & imperit⁹ breui te nūc respōsione cōcludit, paucis sermonis sui cōteret. Quid ergo apostolus Thomas tetigit, cum ad palpā- dum deū accessit? Christū vtiq; absque dubio. Quid autē exclamauit? Dominus, inq̃t, meus, & deus meus. Nūc, si potes, & Christū à deo separa, & muta dictum hoc, si vales. Da Dialecticam disputationem: da prudentiam mundialem, & stultam illam verbosam calliditatem sapientiam. Verte omnes tete in facies, & contrahe. Quicquid siue animis siue arte valeas, quidlibet dicas, quidlibet facias: exire hinc nusquam vales: nisi hoc quod apostolus tetigit, deum esse fatearis. Et quidem si quo modo possis, immutare forsā historię euāgelicę prædicationē velis: vt nec corpus domini Thomas apostolus contigisset, nec Christum dominum deum dixisse legeretur. Sed immutari quod in euangelio dei scriptum est, nequaquam potest. Cēlum enim & terra transibunt, *Mat. 14* verba verò dei non præteribunt. Ecce enim etiam nunc tibi ille qui nunc testatus est Thomas, apostolus clamat: Deus est Iesus quem tetigi, deus est cuius membra palpaui: non ego incorporalia tenui, nec intractabilia tractaui: non spiritum manu contigi: vt de eo tantum credar dixisse, deus est: spiritus enim iuxta domini mei dictum, carnem & ossa non habet. Ego corpus domini mei tetigi: ego carnem & ossa palpaui: ego digitos meos in lo-

cum vulnerum misi: & de Christo meo, quem
 cōpalpaueram, proclamaui: Dominus meus,
 & deus meus. Non enim noui inter Christum
 & deum facere distantiam: inferere sacrilegas
 opiniones inter Iesum & deum nolo; diuelle-
 re à seipso dominum meum nescio. Facesse à
 me quisquis diuersa sentis, quisquis diuersa lo-
 queris. Ego aliud Christū quàm deum esse nō
 noui: hoc cum coapostolis meis tenui: hoc ec-
 clesiis tradidi: hoc gētibus prædicaui: hoc etiā
 tibi clamo, Christus deus est, Christ⁹ deus est,
 Aliud mens sana nō sentit: aliud fides sana nō
 loquitur: diuelli à se diuinitas non potest. Et
 cum utiq; quicquid est Christus, deus est, in-
 ueniri in deo aliud nō potest quàm de⁹. Quid
 ais tu nunc heretice? sufficiuntne hæc testimo-
 nia fidei etiam summæ infidelitati: an aliquid
 adhuc addendū est? & quid vel post prophetas,
 Iac. II. vel post apostolos addi potest? Nisi fortè, vt Iu-
 dæi quondam exposculabant, signum tibi de
 cœlo etiam tu dari postules. Sed petenti hoc
 tibi illud quod respōsum tunc illis est, necesse
 est responderi. Generatio praua & adultera si-
 gnum querit: & signū non dabitur ei, nisi signū
 Ionę prophete. Et vere sufficere tibi signū hoc
 vel cum Iudæis crucifigentibus poterat, vt do-
 minum deum nostrum etiam hac re sola doct⁹
 crederes, quam etiam illi qui persecuti fuerāt,
 crediderunt. Sed tamen quia cælestis signi fer-
 cimur mentionē, ostēdam tibi de cœlo signum:
 & quidem tale, cui nec dæmones vnquam

contradixerūt: dum ipsa veritatis necessitate. licet Iesum corporeum esse cernerent, deū tamen quod erat esse clamabant. Quid ergo ait euāgelista de domino Iesu Christo? Baptizatus autem, inquit, confestim ascendit de aqua. Et ecce aperti sunt ei cœli, & vidit spiritum descendentem sicut columbam venientem super se. Et ecce vox de cœlis dicens: Hic est filius meus dilectus, in quo mihi complacui. Quid ad hæc nunc hæretice ais? Dictum displicet, an persona dicentis? Nec interpretatione certè indiget intelligētia allocutionis, nec commendatione verborum dignitas alloquentis. Deus pater est qui dixit: evidens est quod dictum est. Nunquid aut tam impudentem, aut tam sacrilegam vocem proferre poteris, vt dicas de vnigenito Dei filio nec Deo patri esse credendum? Hic est ergo, inquit, filius meus dilectus, in quo mihi complacui. Si tentabis forsitan dicere, vt est dementia, de verbo hoc, non de Christo dictum fuisse. Dic mihi ergo, quis erat qui baptizabatur? verbum an Christus? caro an spiritus? Negare vtique non potes Christum fuisse. Homo ergo ille ex homine ac deo natus, spiritu sancto in virginem descendente, & virtute altissimi obumbrante conceptus, ac sic hominis & dei filius, ille vtique, vt negare non potes, baptizatus est. Si ergo ille baptizatus est, ille nominatus: quia ille vtique nominatus qui baptizatus est. Hic est, inquit, filius meus di-

lectus, in quo mihi complacui. Nunquid dici significatius aut expressius quicquam potest? Christus baptizatus est: Christus ascendit de aqua: Christo baptizato cœli aperti sunt: propter Christum columba descendit super Christum: in corporali specie spiritus sanctus adstitit: Christum pater appellauit. Hoc si de Christo dictum negare ausus es, superest ut nec baptizatum Christum fuisse, nec spiritum descendisse, nec patrem locutum esse contendas. Sed vrget tamen & premit te ipsa veritas: ut etiam si confiteri eam nolis, tamen negare non possis. Quid enim ait euangelista? Baptizatus autem confestim ascendit de aqua. Qui baptizatus est? Christus utique. Et ecce, inquit, aperti sunt ei cœli. Cui scilicet nisi illi qui baptizatus est, Christo utique? Et vidit spiritum Dei descendantem sicut columbam venientem super se. Quis vidit? Christus scilicet. Super quem descendit? super Christum utique. Et vox facta est de cœlo, dicens: De quo? de Christo scilicet. Quid enim sequitur? Hic est filius meus dilectus, in quo mihi complacui. Ut omnia illa propter quem facta essent ostenderetur, vox consecuta est, dicens: Hic est filius meus dilectus. Hoc est dicere: Hic est propter quem cuncta hæc facta sunt. Hic est enim filius meus: propter hunc cœli aperti sunt: propter hunc spiritus meus venit: propter hunc vox mea facta est. Hic est enim filius meus. Dicens enim, hic est filius meus,

quem designabat? illum utique quem columba tangebatur. Quem ergo columba tetigit? Christum scilicet, Ergo Christus. Impleta est ut reor, sponsio mea. Vides ergo profecto hæretice signum tibi de cælo datum: & quidem non vnum, sed & multa & singularia. Habes enim vnum in apertione cæli, aliud spiritus descensionis, tertium in patris voce. Quæ utique euidentissimè omnia Christum deum esse declarant; quia cum & reseratio cælorum deum indicat, & descensio super eum spiritus sancti deum approbat, & allocutio patris deum esse confirmat. Neque enim vel cælum nisi domini sui honore patuisset: vel spiritus specie corporali nisi super dei filium descēdisset: nec pater filium nisi verè filium declarasset: præsertim cum his diuinæ natiuitatis significationibus, quæ non solum veritatem piæ fidei confirmarent, sed etiam prauitatem impiæ opinionis excluderent. Ineffabili enim diuini dicti magnificentia cum expresse ac significanter dixisset pater: hic est filius meus dilectus: addidit etiam illud quod secutū est: dilectus scilicet, in quo mihi cōplacui. Vtiq; sicut per prophetā deū fortē, & deum magnū iam prædicauerat: ita hic dicens, filius meus dilectus in quo cōplacui, super proprii filii sui nomen etiā dilecti & cōplaciti sibi filii nomē adiecit; ut proprietatē diuinæ videlicet naturæ nominū significaret adiectio: & id ad honorē filii dei peculiariter pertineret, qđ nulli oīno

homini cōtigisset. Itaque sicut illa propria ac
peculiaria in persona domini nostri Iesu Chri
sti fuerunt, quodd cœli aperti sunt, quodd eum
deus pater cunctis videntibus per aduentan
tem atque astantem columbam quasi manu
quodammodo sua tetigit : & quia digito in
dicante monstravit dicens, Hic est filius me
us: ita illud quoque proprium ei ac singulare,
quodd peculiariter patri complacitus nomina
tur : vt peculiarem vtique naturæ signifi
cationem peculiaria additamenta monstrarēt,
& proprietatem vnigeniti filii etiam cogno
minum proprietas confirmaret, quam iam
honor signorum præcedentium comprobaf
set. Sed iam libelli istius finis sit. Neq; enim
dictum hoc dei patris augeri humanis sermo
nibus, aut exæquari potest. Nobis de domino
Iesu Christo filio suo, satis per se ipse deus pa
ter idoneus testis est dicens: Hic est filius me
us. Tu si cōtradicens his Dei patris voci
bus putas: illi à te necesse est contradici, qui
eum euidentissima declaratione filium suum
esse ab omni mundo fecit agnosci.

IOANNIS CASSIANI
de incarnatione domini,
Liber Quartus.



Onsummatis li-
bellis tribus qua-
si fidelissimis atq;
opulentissimis te-
stibus, vt aperte
quorū veritas nō
humanis tantum,
sed etiam diuinis
testimoniis locu-
pletata est, suffice-

re quidem nobis ad causæ probationem, per
diuinam auctoritatem abundè poterant: cum
ipsa vtique per se causæ suæ auctoritas diuina
sufficiat. Sed tamen quia plena est his testimo-
niis sacrorum voluminū series: vbi tot testes
sunt, quot sententiæ: imò vbi ipsa scriptura
sacra, quasi vnum quodammodo diuini oris
est testimonium: adcumulanda quædā adhuc
putauimus, non pro necessitate approbatio-
nis, sed pro facultate rerum & copia: vt quic-
quid necessarium non esset defensionī, totum
proficeret ornatui. Ergo quia superioribus
libris dominum Iesum Christum nō prophe-
ticis tantum atque apostolicis, sed etiā euan-
gelicis testimoniis, cum in carne atque in ter-
ra esset, deum probauimus: nunc eum qui in

- carne natus est, etiam ante carnis susceptionē deum fuisse monstremus: vt intelligas cōsentientibus, & quasi conclamantibus sibi diuinorū voluminū testimoniis, eundē te in natiuitate corporea & hominē debere credere & deum, quē ante natiuitatē corpoream tantum.
- Rom. 8.** deum: & quem post additionē virginis in corpore deum, eundē ante partum virginis verbū deum. Disce ergo primum ab apostolo totius mundi magistro, eum qui est sine exordio deū filium dei, in fine mundi, id est in temporum plenitudine, filium hominis factum esse. Ait enim: At vbi venit plenitudo temporis, misit deus filium suū factum ex muliere, factum sub lege. Dic mihi ergo nunc, antequam dominus Iesus Christus ex matre Maria nasceretur, habuit deus filium, aut non habuit? Negare non potes quin habuerit: neque enim vnquam aut sine patre filius, aut sine filio pater: quia sicut ex patre filius, ita ex filio pater dicitur. Vides ergo quoddā dicente apostolo, misit deus filium suum, suum vtique suum, vt ipsius verbis vtar apostoli, suum filium deus misit. Neque enim aut alienū atque filium misit, quia suū misisse dicitur: aut omnino mittere potuit, si nō erat qui mitteretur. Misit ergo, inquit, filium suū, factum ex muliere. Ergo & quia misit eū, misit qui erat: & quia suū misit, non alienū vtique, sed suū misit. Vbi ergo illud est tuum caliditatis terrenæ argumentū: nemo anteriore se parit? Nunquid enim non antiquior Maria
- Gal. 4.**
- Exo. 4.**

dominus? nūquid non antiquior filio hominis dei filius? nunquid non antiquior denique homine ipso deus? cū vtique nullus hominū non ex deo. Vides ergo quòd nō solum antiquiorē se Maria peperit: non solum inquā antiquiorē se, sed auctore sui, & procreans procreatorem suū. Facta est parentis parens: quia quā promptum vtique fuit deo natiuitatē homini tribuere, tā promptum sibi: quā facile vt hominem nasci faceret, tā facile vt ipse ex homine nasceretur. Neque enim circumscripta est in persona sua potestas dei, vt quod dei in omnibus licet, non liceat in se, & qui vtique in natura deitatis ipsius id habet, vt omnia possit deus, in sua tantū persona id non habet vt sit deus in homine. Sequestratis ergo ac repudiatis friuolis & caducis terrenarū argumentationum stoliditatibus, simplici tantummodo iustificationi ac nudæ credendum est veritati: & his tantum de deo testibus fides accommodanda, quos deus misit, & in quibus ipse de se, vt ita dixerim, prædicauit. Aequum est enim vt de agnitione illius ipsi credamus, cuius scilicet totū est quod de eo nouimus: quia agnosci vtique deus ab homine non potuit, nisi agnitionem sibi ipse tribuisset. Et ideo iustum est vt totum credamus de eo quod scimus, cuius est omne quod scimus: quia si ei non credimus à quo scimus, fit vt omnino nihil sciamus, dum ei non credimus per quem scimus. Itaq; quia superiore testimonio patuit, quòd

deus filium suum misit, & is filius hominis factus est, qui semper filius dei fuit: videamus an idem apostolus alibi simile aliquid testimonio huic dixerit: ut lucens iam per se veritas, duplicata testimoniorum luce plus luceat.

Rom. 8 Ait idem ergo apostolus: Misit Deus filium suum in similitudine carnis peccati. Vides utique apostolum non casu aliquid aut inconsiderata voce dixisse, ut id quod semel dixerat prateriret: quia scilicet nec cadere in eum casus aut inconsiderantia poterat, in quo plenitudo diuini consilii & sermonis habitabat. Quid ergo ait? Misit deus filium suum in similitudine carnis peccati. Idem iterat, idem inculcat dicens: Misit deus filium suum. Eximus utique & admirabilis magister, sciens in hoc totum penitus catholicę sacramentum fidei contineri: ut natus in carne dominus, & missus esse in hunc mundum dei filius crederetur: hoc etiam atque etiam clamat dicens: Misit deus filium suum. Nec mirum si ad euangelizandum dei aduentum peculiariter missus, sic predicauit, cum id etiam ante legem lator legis ipse clamauerit, dicens:

Exo. 4. Obsecro domine, provide alium quem mittas. Quod in Hebræorum voluminibus multo euidenter legitur: Obsecro domine, mitte quem missurus es. Pius utique propheta, & totius in se generis humani affectum habens, cum qui mittendus à patre ad redemptionem ac salutem omnium erat, ut quamcelerrime mitteretur, quasi totius à deo patre humanę carnis

vocibus postulabat, dicens: Obsecro domine,
 mitte quem missurus es. Misit ergo, inquit,
 deus filium suum in similitudine carnis peccati.
 Bene cum missum eum in carne diceret, pec-
 catum ab eo carnis exclusit. Misit enim, inquit,
 Deus filium suum in similitudine carnis pec-
 cati: hoc est, ut in vera carnis susceptioe agno-
 sceretur veritas non fuisse peccati: & quan-
 tum ad corpus, veritas intelligeretur: quan-
 tum ad peccatum, similitudo peccati. Quia
 cum omnis caro peccatrix sit, ille autem sine
 peccato carnem habuerit: similitudinem pec-
 cati carnis in se habuit, dum in carne es-
 set: veritate autem peccati caruit, quia sine pec-
 cato fuit. Misit ergo, inquit, deus filium suum
 in similitudine carnis peccati. Vis scire quam
 bene hoc apostolus predicarit, audi quem-
 admodum hoc in os apostoli, quasi ex ipsius
 dei ore defluerit, dicente domino: Non enim *Ioan. 3.*
 misit deus filium suum in mundum, ut iudi-
 cet mundum, sed ut saluetur mundus per ip-
 sum. Ecce ipse, ut vides, dominus missum se à
 deo patre ad salutem humani generis prote-
 statur. Quod si euidentius declarandum pu-
 tas, quem filium ad saluandos homines Deus
 miserit, quamuis proprius atque vnigenitus
 Dei filius non nisi vnus sit: & cum filium suum
 misisse dicitur, vnigenitum utique suum mi-
 sisse monstratur. Audi tamen David prophe- *Ps. 106*
 tam, eum qui ad salutem humanam missus sit
 euidentissime designatam. Misit, inquit, ver-

bum suum, & sanauit eos. Nunquid vertere
 hoc ad carnē potes? vt dicas ad sanandum hu-
 manum genus hominem tantum à Deo mis-
 sum. Non potes vtique: reclamat enim tibi
 cum omnibus scripturis sacris David pro-
 pheta, dicens: Misit verbum suum, & sanauit
 eos. Vides ergo ad sanādos homines verbum
 missum esse: quia licet per Christum sanitas
 data sit, verbum tamen Dei in Christo fuit,
 quod per Christum cuncta sanauit: ac sic vni-
 to per sacramentum incarnationis Christo
 & verbo dei, factus est Christus & verbum
 dei vnus ex re vtraque filius Dei. Quod vti-
 que apostolus Ioannes declarare aperte vo-
 lens: Misit, inquit, deus filium suum saluato-
 rem mundi. Intelligis quomodo inseparabili
 connexionione deum hominemque coniūxerit?
 Christus enim qui ex Maria natus est, salua-
 tor absque dubio appellatur, secundum illud:
Luc. 2. Quia natus est vobis hodie saluator, qui est
 Christus dominus. Hic autem ipsum quod
 missum est verbum dei, saluatorem nominat,
 dicens: Misit deus filiū suum saluatorem mū-
 di. Patet itaque quod per sacramentum vniti
 cum homine verbi dei, & verbum quod ad sal-
 uandum missum est, saluator dicitur: & salua-
 tor in carne natus, per verbi vtique consortiū
 Dei filius nuncupatur: ac sic indiscreta vtriuf-
 que nominis maiestate, quia vnitus est cum
 homine deus, quicquid est homo & deus, to-
 tum penitus nuncupatur deus. Et ideo idem

apostolus bene subdidit, dicēs: Quisquis cre-
 diderit, quia Iesus est filius Dei, Deus in illo
 manet, & charitas dei in eo perfecta est. Illum
 verē prædicat credere, illum plenum diuina-
 asserit charitate, qui Iesum filium dei credit.
 Filium autem dei verbum dei esse testatur: ab
 per hoc vnum atque idem penitus vult intel-
 ligi vnigenitum verbum dei, & Iesum Chri-
 stum filium dei. Vis autē plenius scire, quāuis
 Christus secundū carnem verē ex homine ho-
 mō natus est: tamen propter ineffabilem sacra-
 mēti vnitatem, qua vnitus cum deo homō est,
 nullam penitus inter Christum, & verbū esse
 distantiam? Audi dominicum euangelium,
 imō potius audi ipsum descendētem deum:
 Hæc est, inquit, vita æterna, vt cognoscant te
 solum verum deum, & quem misisti Iesum
 Christum. Superius audisti verbum dei ad fa-
 nandos homines missum esse: hic autem audis
 eum qui missus, Iesum Christum, esse. Separa
 hoc si potes: cum videas tantā vnitatē Christi
 & verbi esse, vt non solum vnitū cum Christo
 verbum, sed etiam propter vnitatem ipsam
 Christus iam verbū esse dicatur. Sed parum
 hoc elucere forsitan putas: non quia parum lu-
 ceat, sed quia infidelitas tenebrosa semper ip-
 sa sibi etiam in luce tenebras facit. Audi itaq;
 paucis sermonibus omne hoc vnitatis domi-
 nicæ sacramentū apostolum complectentem.
 Vnus, inquit, dominus noster, Iesus Christus,
 per quē omnia. Iesu bone, quāra est autoritas

i. Ioā. 4

Ioā. 17.

i. Ioā. 1

= ab; v *

sid tat

bimpil

i. Co. 8.

- f. m. i

in verbis tuis? tua enim sunt quæ à tuis per te dicuntur. Ecce hoc apostoli dictum quàm paucis quanta complectitur? Vnus, inquit, dominus Iesus Christus, per quem omnia. Nūquid ad prædicandum tanti mysterii sacramentum aliqua circumitione verborum vsus est? aut id quod intelligi à nobis voluit, longæ orationis narratione tractauit? Vnus, inquit, dominus noster Iesus Christus, per quē omnia. Simplici tantum & breui locutione arcanum tantæ maiestatis edocuit: hac scilicet fiducia, qua sciebat sermonem suum in negotio Dei longis argumentationibus non egere, & fidē dictis suis diuinitatem dare. Sola enim ad dictorum confirmationem, rerum sūfficit demonstratio, quando probatio in autoritate dicentis est. Vnus, ergo inquit, dominus Iesus Christus, per quem omnia. Considera vbi hoc de verbo patris legeris, quod de Christo legis.

Ioan. 1.

Omnia, inquit euangelium, per ipsum facta sunt: & sine ipso factum est nihil. Apostolus dicit, per Christum omnia: euangelium dicit, per verbum omnia. Nunquid repugnant sibi sermones sacri? Non vtique, sed vnum atque eundem intelligi voluit & apostolus Christū per quem omnia creata dixit, & euangelista

* Vide-
tur hic
aliquid
deesse.
Ioan. 3.

verbum per quod omnia facta esse memorauit. Oportuerat itaque quisquis es. * Audi inquam quid ipse de se verbum dei deus pronunciarit. Nemo, inquit, ascendit in cœlum, nisi qui de cœlo descendit, filius hominis qui

est in cœlo. Et iterum: Si videritis, inquit, ^{Ioan. 6.} filium hominis, ascendentem vbi erat prius. Filium hominis è cœlo descendisse memorauit. Quid est? quid mussitas? Negato hoc, si hoc vales. Sed rationem dicti quæris: non reddo interim: Deus hoc dixit: deus locutus est, verbum illius summa ratio est. Remoueo argumenta, remoueo disputationes: sola mihi ad credulitatem sufficit persona dicentis. Non licet mihi de fide dicti ambigere, nō licet deliberare. Quid mihi quærere quomodo verū sit quod deus dixit: cum dubitare non debeā, quin verum sit quod deus dixerit? Nemo, inquit, ascendit in cœlum, nisi qui descendit de cœlo filius hominis, qui est in cœlo. Verbum vtique patris semper in cœlo fuit: & quomodo ille filium hominis semper in cœlo fuisse memorauit? Intellige ergo quod cum filium hominis esse docuit, qui semper dei filius fuit: cum vtique cum qui filius hominis nuper exiit, in cœlo semper fuisse confirmet. Huc accedit maius aliud, quod eundem filium hominis, id est verbum dei quod descendisse de cœlo dixit, etiam tunc cum in terra loquitur, in cœlo esse testatur. Nemo, enim inquit, ascendit in cœlum, nisi qui de cœlo descēdit filius hominis, qui est in cœlo. Quis quæso est qui hoc loquitur? Christus vtique. Vbi autem tūc erat cum loqueretur? in terra scilicet. Et quomodo se & è cœlo cum natus est descendisse, & cum loquitur, in cœlo esse testatur: & eun-

dem filium hominis esse dicit? cum utique & è cælo nisi deus descendere non potuerit: & cū in terra loquitur, in cælo utique nisi per Dei infinitatem esse non possit. Aduerte ergo tandem & percipe, quod idem est filius hominis qui verbum dei: quia & filius est hominis, dū ex homine vere nascitur: & verbum dei, dum idem qui in terra loquitur, manet semper in cælo. Ac sic humanæ est natiuitatis, quod filiū se hominis vere dicit: diuinæ autem infinitatis, quod è cælo penitus non recedit. Et ideo bene apostolus instar diuinorum verborū docens: *Eph. 4.* Qui enim, inquit, descendit, ipse est & qui ascendit super omnes cælos, ut impleret omnia: & ipsum descendisse dicit quem ascendisse. Descendere autem è cælo nō potuit, nisi verbum dei. Quod utique cum in forma dei esset, exinanīuit semetipsum, formam serui accipiens, in similitudinem hominum factus, & habitu inuentus ut homo: humiliāuit semetipsum, factus obediens vsque ad mortem, mortem autem crucis. Descendit ergo è cælo verbum dei: ascendit autem filius hominis: ipsum ait ascendisse quem descendisse. Ergo vides quod idem & filius hominis qui verbum dei. Et ideo secundum diuini verbi magisterium intrepidè iam & incūctanter & filius hominis è cælo descendisse, & dominus maiestatis crucifixus esse dicendus est: quia secundū suscepti corporis sacramentum, & filius dei factus est fili⁹ hominis, & in filio hominis crucifixus

est dominus maiestatis. Et quid plura? lōgum est de singulis multa dicere: dies enim me deficiet, si omnia quæ ad hanc rē afferri possunt, conquirere aut explicare tentauero. Reuoluēda enim hoc volenti scriptura omnis, ac relegenda est. Nam quæ sunt quæ non pertineant ad hoc? cum omnia scripta sint propter hoc. Breuiter ergo ac strictim nōnulla dici necesse est, vt dici possint: & enumeranda quædā magis quàm explicanda, ac damnis, vt ita dicā, damna redimenda. Cum propter hoc vtique conueniat aliqua transcurri, necesse sit propè cuncta reticeri. Venit ergo, inquit saluator in *Luc. 19* euangelio, venit filius hominis saluare quod perierat. Et apostolus: Fidelis, inquit, sermo, & omni acceptione dignus: quòd Iesus *1. Tim.* Christus venit in mundum peccatores saluos *1.* facere, quorum primus ego sum. Sed & Ioannes euangelista: In propria, inquit, venit, & *Ioan. 1.* sui eum non receperunt. Vides ergo quòd scriptura alibi filium hominis, alibi Iesum Christum, alibi verbum Dei in mundum venisse prædicat? Intellige itaque dissimilitudinem appellationum esse, non rerum: & in diuersa nominum specie vnā esse virtutem. Nam licet venisse in mundum nunc filius hominis, nunc dei nominetur, id est verbum: vnus tamen in vtroque nomine designatur. Nā cum vtique secundum euangelistam is in mundum venerit, per quem ipse factus est mundus: & filius hominis factus sit, qui est mūdi creator

Deus: nō interest quid in singulis nominetur qui deus in omnibus intelligitur. Non præiudicat enim diuinitati dignatio aut voluntas sua: cum hoc utique magis diuinitatem ipsam cōprobet: quia quicquid voluit, hoc fuit. Ergo & quia voluit, in mundū venit: & quia voluit, homo natus est: & quia voluit, filius hominis appellatus est. Omnia enim sicut vocabula sunt, ita virtutes dei. Nō iminuit in illo dissimilitudo nominis vim potestatis. Quicquid libet dictus fuerit, in cunctis vnū est: sit licet in specie vocabulorū aliqua diuersitas, non est in virtute nominū nisi vna maiestas. Verū, quia hætenus euāgelicis vel maximè atque apostolicis quasi nouis testibus vsi sumus: nūc de prophetis veteribus proferamus: admiscentes interdū antiquis noua: ut intelligant omnes, scripturā sacrā venturū in carne dominū, toto quodāmodo suo corpore, quasi vno ore clamasse. Ait itaque eximius ille & admirabilis tam munere Dei diues, quàm testimonio, cui vni admodum contigit sanctificari antequam nasci, Hieremias propheta: Hic est, inquit, Dominus noster: non reputabitur alius præter eum: qui inuenit omnem viam disciplinæ, & dedit eam Iacob puero suo, & Israel dilecto suo. Post hæc in terris visus est, & inter homines conuersatus est. Hic est, ergo inquit, deus noster. Vides à propheta deum quasi manu indice ostendi, & quasi digito significante monstrari?

Baru. 3

Hic est, enim inquit, deus noster. Dic mihi ergo, quem deum his signis propheta tunc atque; indiciis demonstrabat? nunquid nam patrem? Et quid necesse erat ostendi eum quem se omnes nosse credebant? Non enim Iudæi deum tunc ignorabant: quia sub dei lege vivebant. Sed id agebatur utique, ut filiū deum noscerent. Et ideo bene propheta eum qui omnem disciplinam inuenisset, id est, legem dedisset, videndum in terris, id est, venturum in carne dicebat: ut quia eum qui legem dedisset, deum esse Iudæi non dubitarent: eum qui in carne venturus esset, deum esse cognoscerent: cum eum utique quem legislatorem deum crederent, videndum inter homines per susceptionem humanæ carnis audirent: eodē ipso quoque scriptura sacra per prophetam aduentum proprium pollicēte: Quia ego ipse qui loque- Esa. 52. bar, ecce adsum. Nō reputabitur, inquit, alius præter eum. Pulchre his propheta præuidens peruersa dogmata, omnem sensum hæreticæ peruersitatis exclusit, dicens: Non reputabitur alius præter eum. Hic est enim vnus ex deo in deum natus: cuius iussione vniuersitatis opus secutum est: cuius voluntas rerum ortus est: cuius imperium mūdi fabrica est: qui cuncta dixit, & facta sunt: cuncta mādauit, & creata sunt. Hic ergo vnus est ad patriarchas loquens, in prophetis manens, ex spiritu conceptus, natus ex virgine Maria: in mundo visus, inter homines conuersatus, affigēs ligno cru-

cis chirographum peccatorum, triumphans in semetipso, aduersarias nobis inimicasque virtutes morte occidens, resurgendi fidem omnibus tribuens, gloria sui corporis corruptionem humanæ carnis interimens. Vni ergo hæc domino Iesu Christo peculiaria sunt: & ideo non reputabitur alius ad eum: quia vnus in hac gloriæ ac beatitudinis singularitate deus ex deo natus est. Id ergo prophetica doctrina tunc agebatur, vt vnitus à cunctis dei patris filius disceretur: & cum ad filium non reputari deum alterum audirent, vnum vtique in patre ac filio deum esse cognoscerent. Post hæc, inquit, in terris visus est, & cum hominibus conuersatus est. Vides quòd euidenter hic aduentus domini ac diuinitatis designatur? Nunquid enim pater vnquam, qui non nisi filio tantum visibilis esse legitur, aut in terris visus est, aut in carne æditus, aut inter homines conuersatus est? Non vtique. Intelligis ergo quòd omnia hæc de filio dei dicta sunt. Nam & cum videndum in terris deum propheta dixerit: & alius præter filium non sit visus in terris: non de alio hoc absque dubio propheta dixit, quàm in quo dictum postea res probauit. Cum enim videndum vtique deum dixerit, non de alio hoc verè dicere potuit, quàm qui verè postea visus fuit. Sed de hoc satis hætenus: nunc ad alia transeamus.

Esa. 45. Labor, inquit Esaias propheta, labor Aegypti & negociatio Aethiopiæ, & Sabaim viri sub-

limes ad te trāsibunt, & tui erunt: post te ambulabunt, vincti manibus pergent, & te adorabunt, teque deprecabuntur: quoniam in te est deus, & non est prāter te deus. Tu es enim deus noster, & nesciebamus, deus Israel saluator. Quām bene sibi diuina semper scripta conueniunt. Superior enim propheta dixit, hic est deus noster: iste autem, tu es deus noster. In illo vtique diuina doctrina, in hoc humana confessio est. Alter personam magistri docētis, alter personam populi confitentis explicuit. Pone enim nunc docentem quotidie in ecclesia, sicut facit, Hieremiam prophetam, ac dicentem de domino Iesu Christo, hic est deus noster: quid aliud vtique responderet cuncta ecclesia, sicut facit, quām id quod alius propheta ad dominum Iesum dixit, tu es deus noster? Ita vt bene prāsenti cōfessionī etiam prāterita ignorantia possit adiungi, dicente populo: tu es deus noster, & nesciebamus. Bene enim hi qui prius dāmonicis superstitionibus occupati, ignorabant deum, conuersi ad fidem dicere possunt: tu es deus noster, & nesciebamus. Quod si ex Iudæorum magis persona prōbari tibi idipsum cupis: cōsidera post infœlicem ignorātiā, & impiam persecutionem conuertentes se ad fidem, & agnoscētes deum passim populos Iudæorum: & vide an recte dicere possint: tu es de⁹ noster, & nesciebamus. Sed ego addo aliud: vt tibi nō ex confitentibus tantūmodo Iudæis, sed etiam

ex negantibus probem. Interroga enim eos qui perdurant adhuc in sacrilegio Iudæos, an sciant vel credât deum. Scire utique se, & credere confitebuntur. At contrâ interroga an credant filium dei: negabunt profectò & blasphemabunt. Vides ergo quòd de eo hoc propheta dixit, quem Iudæi & nescierunt semper, & adhuc nesciunt: non de eo quem utique & credere se putant & confiteri. Et ideo bene hi qui ex Iudæis ad fidem post ignorantiam veniunt, dicere possunt: tu es deus noster, & nesciebamus. Recte enim hi qui post ignorantiam credunt, nescisse se dicunt, quem adhuc non credentes se nescire contendunt. Palàm enim est, quòd eū nescisse se prius dicunt, post ignorantiam confitentes, quem adhuc nesciunt denegantes. Labor, inquit, Aegypti & negotiatio Aethiopiæ, & Sabaim viri sublimis ad te transibunt. In his diuersarum nationum vocabulis aduentum creditur harum gentiū significari: nemini dubium est. Transisse autem ad Christū gētes, negare nō vales: vtpote quæ nomine Christianitatis indepto, non fide tātum ad dominū Iesum Christū, sed etiā ipso nomine transierūt. Quia cum idē quot sunt vocentur, factū est quod erat fidei opus, nominis sacramentū. Ad te, inquit, transibūt, & tui erūt: post te ambulabunt, vincti manicis pergent. Sicut sunt vincula coercionis, ita sunt vincula charitatis: secundum illud quod ait dominus:

Osee 11 Attraxi eos in vinculis charitatis. Verè enim

magna sunt hæc vincula, & ineffabilis charitatis: quibus qui alligantur, gaudet catenis suis. Vis scire hoc verum esse? audi apostolum Paulum gaudentem & exultantem vinculis suis, cum ait: Obsecro vos ego vinctus in domino. Et il- *Eph. 4.*
 lud obsecro: cum sis talis ut Paulus senex, nunc autem & vinctus Christi Iesu. Vides quantum gaudebat vinculorum suorum merito, quorum etiam nos deus prouocabat exemplo. Non dubium est autem, in quibus est domini amor, vnum esse dominicæ vinculationis affectum, secundum illud: Multitudinis autem credentium erat cor vnum *Act. 4.*
 & anima vna. Te, inquit, adorabunt, teque deprecabuntur: quoniam in te est deus, & nec præter te deus. Dictum prophetæ & apostolus eui denter exposuit dicēs: Quoniam deus erat in *2. Cor. 5*
 Christo, mundum reconcilians sibi. In te ergo est deus, inquit, & non est præter te deus. Bene propheta dicens, in te est deus, non tantum cum qui præsens esset, sed etiam cum qui esset in presenti monstrauit: habitantem scilicet ab eo in quo habitaret, naturæ significatione, non vnitatis abnegatione distinguens. Tu, inquit, deus, & nesciebamus, deus Israel saluator. Quamuis multis iam scriptura & euidentibus signis, de quo loqueretur, ostenderet: expressit tamen manifestissime in saluatoris nomine Christi nomen: quia idem saluator utique qui Christus, dicente angelo: Quia natus est vobis hodie sal- *Luce 2.*
 uator, qui est Christus dominus. Iesum enim Hebraicè saluatorem interpretari nemini du-

- bium est: sicut angelus sanctæ Mariæ virginis protestatur; dicens: Et vocabis nomen eius Iesum: ipse enim saluum faciet populum suum à peccatis eorum. Ac ne forte eum hoc modo saluatorem diceret prædictum, quo de aliis dictum est: Et suscitauit eis dominus saluatorem Othoniel filium Cheniez. & iterum: Suscitauit eis dominus saluatorem Aod filium Gera. adiecit: Ipse enim saluum faciet populum suum à peccatis eorum. Non autem humanæ opis redimere populum à captiuitate peccati: quod illi soli vtique possibile est, de quo dictum est: Ecce agnus dei, qui tollit peccata mundi. Cæteri enim non suum populum, sed dei: & non à peccatis, sed ab hostibus saluauerunt.
- Iudic. 3.* Tu, ergo inquit, deus noster, & nesciebamus, deus Israel saluator. Quos magis putas hoc dicere? quibus hoc magis putas cōuenisse? Iudæis an gentibus? Si Iudæis: Iudæi vtique Christus non cognouerunt, secundum illud: Israel autē me non cognouit, & populus mē non intellexit. Et illud: Et mundus per ipsum factus est, & mundus eum non cognouit: in propria venit, & sui eum non receperunt. Si autem gentibus: palam est quod Christum gentilitas idolis occupata nesciuit: quamuis illa nec patrem scierit: sed tamen etiam si nunc nouit. Vides ergo quod siue ex gentibus sit credens populus, siue ex Iudæis, bene pro se vterque dicit: Tu es deus noster, & nesciebamus, deus Israel saluator. Quia & gentes colentes prius idola,
- Ibidem.*
- Ioan. 1.*
- Esa. 1.*
- Ioan. 1.*

ignorabant deum: & Iudæi negantes dominū,
 ignorabant filiū dei. Ac per hoc bene de Chri-
 sto tam illi quàm isti dicūt: Tu es deus noster,
 & nesciebamus. Quia tam illi nesciebant deū
 qui non credebant, quàm illi filium qui nega-
 bant. Sic ergo Christus credendus est, vt veri-
 tas loquitur, vt diuinitas protestatur, vt Chri-
 stus denique ipse prædicat, qui vtrunque est.
 Quid interserere te infœlix furor inter deum
 & Christū niteris? quid separare corpus suum
 à filio dei appetis, & ipsum à se deum diuidere
 conaris? vnita dissecas, & coniuncta discernis.
 Verbo dei de deo crede: nulla enim re melius
 confiteri diuinitatē dei omnino poteris, quàm
 ea ipsa de se sicut diuinitas docuit, voce fatea-
 ris. Scitote enim iuxta prophetam: quia domi-
 nus ipse est deus, qui inuenit omnē viā disci-
 plinæ: qui vtique & in terris visus est, inter ho-
 mines conuersatus est. Ipse lumen fidei in mū-
 dum intulit: ipse lucem salutis ostendit. Deus *Psal.*
 enim dominus, & illuxit nobis. Hūc ergo cre- *107.*
 de, hunc dilige, hunc confitere. Quia quando *Phil. 2.*
 ei, vt scriptum est, omne genu flectetur, cæle-
 stium & terrestrium & infernorum: & omnis
 lingua confitebitur, quia dominus Iesus Chri-
 stus in gloria est dei patris: velis nolis, negare
 non poteris, quia dominus Iesus Christus in
 gloria est dei patris. Hæc enim perfectæ con-
 fessionis perfecta virtus est, deum ac domi-
 num Iesum Christū semper in dei patris glo-
 ria confiteri. Amen.

IOANNIS CASSIANI
de incarnatione domini,
liber quintus.



Diximus libro primo hæresim Pelagianæ hæreses disciplinā atq; imitricem, id omnib⁹ modis tētassee atq; pugnasse, vt dei filius dominus Iesus Christus, natus ex virgine, homo tantūmodo solitarius crederetur: & arrepta postmodum virtutis via id cum piē religioseq; viuendo obtinuisse, vt dignus per hanc vitę sanctimoniam fieret, cui se maiestas diuina sociaret: ac sic exclusa ab eo penitus sacrę originis dignitate, sola ei tantummodo meritorum relinqueretur electio. Id adnitentes vtique ac laborantes, vt eo quasi in plebem omnium misso, & velut in turbam humani generis aggregato, id per bonorum actuum cōuersionem mereri omnes homines posse dicerent, quicquid bene viuendo ille meruisset. Pestifera scilicet ac lethalis assertio: quæ & deo vera derogans, & hominibus falsa promittens, in vtroque esset damnabilis mendacii: dum & sacri legii iniuria deum afficit, & hominem in spem

falsæ præsumptionis inducit. Peruersissima scilicet atque impiissima assertio, mortalitati donans quod non erat, deo tollens quod erat. Huius ergo perniciosæ ac mortiferæ prauitatis hæc quæ nunc orta est recens hæresis, quasi rediuiuos quodammodo suscitans cineres, in veteribus fauillis nouum mouit incendiū. Solitarium quippe hominem natum esse asserit dominum Iesum Christum. Et ideo quid necesse est vt requiramus, an in consequentibus eius peruersitatis sit quæ est in capite ipso sceleris vnus? Superfluum quippe est expectare in posterioribus qualis sit, quæ expectandi omnino causas iam in principio non reliquit. Quæ enim ratio est explorare, an in similitudinem superioris hæreseos eadem promittat homini, quæ (quod immanissimum scelus est) eadem tollit deo? Ita vt penè impium sit, cum videamus quid præcesserit, requirere quid sequatur: quasi vero aliqua in consequentibus causâ afferri possit, qua se probet non esse impium qui negaret deum. Ait ergo, vt sæpe iam diximus, noua hæresis, dominum Iesum Christum hominem tantummodo solitarium, ex virgine natum esse: & ideo Mariam Christotocon, non theotocon esse appellandam: quia sit Christi mater, non dei. Addit præterea sacrilegæ assertioni quàm praua argumenta, tam friuola, dicēs: Nemo anteriore se parit. Quasi verò vnigeniti dei natiuitas à prophetis prædicta, à seculis prænuntiata, humanis sit tra-

Etanda aut æstimanda rationibus. Aut vero ipsa, quisquis es ô hæretice, cui de partu suo calumniaris, virgo Maria propriis hoc quod actum est egerit consummaritque virtutibus: vt ei in tanta re, ac tanto opere imbecillitas obiiciatur humana. Si quid itaque in hac re per hominis opus actum est, humanas quære rationes. Si autem totum quod actum est, dei virtus est: quid impossibilitatem expectas humanam, vbi efficientiam vides esse diuinam? Sed de hoc tamen plenius postea. Nunc quod paulò antè dicere cœpimus exequamur: vt omnes sciant in Pelagianis cineribus ignes quærere se, & nouis sacrilegorum flatibus fauillas veteres excitare. Dicis ergo Christum hominem tantummodo solitarium natum esse: Hoc vtique & illa quam in primo libro eui denter ostendimus, Pelagianæ impietatis hæresis prædicauit, Christum hominem tantummodo solitarium natum esse. Addis præterea, dominum ipsum omnium Iesum Christum theotocon imaginem appellandum, id est non deum, sed susceptorem dei: scilicet vt eum non propter se quia sit deus, sed quia deum in se suscipiat, honorandum putas. Hoc vtique illa etiam quam ante dixi hæresis assererat, Christum non propter se colendum, videlicet quia deus esset, sed quia bonis ac piis actibus deum in se habere meruisset. Ergo vides Pelagianum te virus vomere, Pelagiano te spiritu sibilare. Vnde conuenit, vt de te non tam iudi-

candum quàm iudicatum esse videatur : quia cum eiusdem erroris sis , necesse est eiusdem quoque etiam damnationis esse credaris . Vt non dicam illud interim , quòd imperiali statuae comparans , in tantam sacrilegii impietatem ac blasphemiam prorupisti , vt recte admodum etiam Pelagium , qui penè omnes impietates vicerit , hac amentia vicisse videaris . Ais ergo Christum theotocon imaginem appellandũ , id est , non propter se eũ quia sit de⁹ , sed quia deum in se suscepit honorandum . Hoc modo ergo nihil inter eum & omnes qui fuerunt sanctos homines esse asseris : quia omnes utiq; sancti homines deũ in se habuerunt . Siquidẽ & in patriarchis deũ fuisse , & in prophetis deũ locutũ non ignoramus . Omnes deniq; nõ dico apostolos , martyres , sed omnes quoque sanctos dei , & seruos dei habere in se spiritum dei credimus , secundum illud : Vos ^{2. Cor. 6} estis templum dei viui , sicut deus dixit : Inhabitabo in eis . Et iterum : Nescitis quia tem- ^{1. Cor. 3} plum dei estis , & spiritus dei habitat in vobis ? Et per hoc omnes theotoci sunt : ac sic hoc modo cunctos admodũ Christo similes , & deo pares dicis . Sed absit hæc abominandi erroris impietas , vt facturæ suæ factor , vt famulis suis dominus , vt terrenæ fragilitatis deus terrestrium & celestium cõparetur : & hæc ei ex beneficiis suis iniuria fiat , vt qui habitatione sua dignatur hominem , idcirco idem quod homo esse dicatur . Quinimò hoc inter illum

interest & sanctos omnes, quod inter habitaculum & habitatorem : quod utique ut habitetur non habitaculi est, sed habitatoris, in cuius scilicet arbitrio est & ædificatio habitaculi, & usus: id est vel ut velit habitaculum ipsum facere, vel ut cum fecerit, dignetur habitare.

2. Cor. An experimentum quæritis, inquit apostolus, eius qui in me loquitur Christi? & alibi: Nescitis quia Christus Iesus in vobis est? nisi forte reprobi estis. Et iterum: In interiore inquit homine habitare Christum per fidem in cordibus vestris. Vides quid intersit inter doctrinam apostolicam & blasphemiam tuam? Tu in Christo deum velut in homine habitare dicis: ille Christum ipsum in hominibus habitare testatur. Quod profectò, ut tu ais, caro & sanguis facere non possunt : scilicet ut ex hoc ipso quo eum deum tu esse negas, deus probeatur. Nam cum eum qui in homine habitat deum non neges, necesse est ut eum quem in hominibus habitare cognoscimus, euidentissime deum esse credamus. Omnes ergo siue patriarchæ, siue prophetæ, siue apostoli, siue martyres, siue denique sancti omnes, habuerunt quidem in se deum, & omnes filii dei facti sunt, & omnes theotoci fuerunt : sed diuersa utique multò dissimiliq̃ue ratione. Omnes enim credentes deum, filii dei sunt per adoptionem, vnigenitus autem filius per naturam: qui non ex materia aliqua est à patre genitus : quia omnis res, & omnis rerum materia, per vni-

genitum dei filium est, non ex nihilo, quia ex patre : non quasi partus , quia nihil in deo vacuum atque mutabile : sed ineffabiliter atque inæstimabiliter deus pater in his quæ ingenta in se erant, vnigenitum suum genuit : ac sic ab ingenito summo & sempiterno patre, vni-
 genitus summus & sempiternus est filius: idem habendus in carne, qui habetur in spiritu: idē credendus in maiestate, qui nasciturus in carne. Non diuisionem aliquam aut discissionem sui fecit, vt se ex parte aliqua non nascēte pars sui aliqua nasceretur: aut aliquid in eo diuinitatis postea superueniret, quod in eo natum ex virgine non fuisset. Omnis enim, iuxta apostolum, omnis in Christo plenitudo diuinitatis habitat corporaliter. Non quia aliquando habitauerit, & aliquando non habitauerit : nec quia postea fuerit, & antè non fuerit. Alioquin ad illam Pelagianę hæreseos impietatem deuoluimur: vt dicamus ex certo tēpore habitantem in Christo deum: tum in eum superuenisse, quādo ille vita & conuersatione id promeruerit, vt in se virtus diuinitatis habitaret. Hominum ergo hominum sunt hæc, non dei: vt inquantum humana imbecillitas valet, deo se humilient, deo subdant, dei se habitaculum faciant, & habere hospitem atque habitatorē deum fide & pietate mereantur. Quia prout quis idoneus munere dei fuerit, ita eum diuina gratia muneratur. Prout si quis dignus putatur deo, ita dei fruitur aduentu, secundū illā

Col. 2.

Ioā.14. domini promissionem: Si quis diligit me, sermonem meum seruabit: & ego & pater meus veniemus ad eum, & mansionem apud eum faciemus. Longè autem alia de Christo res atq; ratio est: in quo omnis plenitudo diuinitatis habitat corporaliter: & qui ita diuinitatis plenitudinem in se habet, vt cunctis de sua plenitudine largiatur: qui inhabitante in se diuinitatis plenitudine, ita ipse in singulis sanctorum habitat, prout eos dignos suo putarit habitaculo: & ita omnibus de plenitudine sua tribuit, vt ipse in plenitudine sua iugiter perseueret: qui vtique etiam cum in corpore suo in terra esset, animabus tamen sanctorum omnium inerat: celos, terras, mare, omnem deniq; vniuersitatem infinitate potentiæ suæ ac maiestatis implebat: & ita totus in seipso erat, vt eum tamen mundi vniuersa non caperent. Quia quamlibet magna sint & ineffabilia quæ facta sunt, nulla tamen tam capacia & immensa sunt, quæ ipsum possint capere factorem. Iste ergo est de quo propheta dicit: Quoniam in te est deus, & non est præter te deus. Tu es enim deus noster, & nesciebamus, deus Israel saluator: qui in terris vtique postea visus est, & cum hominibus cōuersatus est. De quo etiā
 Psal.21. David propheta ex persona ipsius dicit: De ventre matris meæ deus meus es tu. Ostendēs vtique quòd nunquam homo ille dominicus sine vnitatem dei fuerit: in quo ipso statim virginis utero plenitudo diuinitatis habitaret.

Sicut & alibi idem propheta: Veritas, inquit, Psal. 84
 de terra orta est, & iustitia de cælo prospexit.
 Vt intelligeremus scilicet prospiciente è cælis
 filio dei, id est adueniente ac descendente, iu-
 stitiam natam esse è carne virginis: non phan-
 tasmam corporis, sed veritatem. Ipse est enim
 veritas, secundum illud ipsius testimoniū ve-
 ritatis: Ego sum veritas, & vita. Ergo quia an- Ioā. 14.
 terioribus libris veritatem hanc, id est domi-
 num Iesum Christum natum ex virgine deum
 probauimus: nunc vt libello abhinc proximo
 instituimus, eum qui ex virgine nasciturus es-
 set, semper deum prænunciatum esse doceamus.
 Ait itaq; Esaias propheta: Quiescite ab Esa. 2.
 homine, cuius spiritus in naribus eius: quia in
 quo reputatus est ipse. vel vt (atque euidētius)
 in Hebræo est: quia excelsus reputat⁹ est ipse.
 Pulchre autē dicēs, quiescite, verbo vim pro-
 hibentis inquietudinē persecutionis expres-
 sit. Quiescite, inquit, ab homine, cuius spiri-
 tus in naribus eius: quia excelsus reputatus
 ipse est. Nunquid non vna eademque senten-
 tia & humani corporis susceptionem, & dei
 locutus est veritatem? Quiescite, inquit, ab
 homine, cuius spiritus in naribus eius: quia
 excelsus reputatus est ipse. Nōne tibi quæso
 palām alloqui persecutores domini videtur,
 dicens; Quiescite ab homine, quem persequi-
 mini: quia hic homo dei est? Et licet in humi-
 litate humanæ carnis appareat, in celsitudine
 tamen diuinæ magnificentiae perseverat. Bene

autem dicēs propheta: Quiescite ab homine, cuius spiritus in narib⁹ eius: certissima humani corporis significatione hominē demonstravit. Intrepide utiq; ac fiducialiter: utpote qui tam cōstāter veritatē hominis assereret quā dei: quia hæc fides vera est & catholica, credere dominū Iesum Christum ita substantiā veri corporis, sicut veritatem perfectæ diuinitatis habuisse. Nisi fortē in illo aliquid ambigēdum putes, quia excelsum pro deo posuit: cum utiq; hic mos scripturæ sacræ sit excelsum pro deo dicere, sicut illud prophetæ: Dedit vocem suam excelsus, & mota est terra. Et, Tu solus excelsus, super omnem terram. Esaias quoque *Esa. 51.* qui hæc dicit; Excelsus & sublimis habitans æternitatē. In quo manifeste intelligendū est: cum illic excelsum sine vlla adiectione dei posuerit, quod etiam hic deum in excelsi nomine nuncuparit. Ergo quia euidenter per prophetam sermo diuinus dominum Iesum Christum & hominem & deum prænunciavit: videamus an veteribus testimoniis etiam nunc *1. Ioā. 1.* conueniant & concordent noua. Quod fuit, inquit apostolus Ioannes, à principio, quod audiuius, quod vidimus oculis nostris, quod perspeximus, & manus nostræ palpauerunt de verbo vitæ, & vita manifestata est: & vidimus, & testamur, & annunciamus vobis vitam æternam, quæ erat apud patrem, & apparuit nobis. Vides quemadmodum vetera recentibus roborentur, & antiquam præ-

nunciationem nouæ prædicationis confirmatio cōsequatur? Esaias dixit: Quiescite ab homine, cuius spiritus in naribus: quia excelsus reputatus est ipse. Ipse Ioannes autem: Quod fuit, inquit, à principio, quod audiui⁹, quod vidimus oculis nostris, quod perspeximus & manus nostræ palpauerunt. Ille persequendū à Iudæis hominem esse dixit: hic palpatū hominem humanis manibus prædicaui. Ille eūdem quem hominem annunciarat, Deum excelsum prædixit: hic eum quem palpatum ab hominibus esse docuit, deū in principio semper fuisse memorauit. Ergo euidentissimum est, quòd ambo dominum Iesum Christum & hominem manifestarunt & deum: quia eundem postea hominem quem semper deum: ac per hoc hominē & deum, quia hominē ipsum deum. Quod fuit ergo, inquit, in principio, quod audiui⁹, quod vidim⁹ oculis nostris, quod perspeximus, & manus nostræ palpauerunt de verbo vitæ, & vita manifestata est: & vidimus, & testamur, & annunciamus vobis vitam æternam, quæ erat apud patrem, & apparuit nobis. Vides quot indiciis, quot modis, quàm variis, quàm multiplicibus dilectissimus ille ac deuinitissimus deo apostolus, sacramentum diuinæ incarnationis insinuet? Iā primū quòd eum qui in principio semper fuerit, visum in carne esse testatur. Deinde ne id quod auditum ac visum dixerat, parum incredulis videretur, palpatum quoque, id est ta-

Etum atque tractatum tam suis quàm cæterorum manibus confirmavit. Bene utiq; per manifestationē assumptę carnis, opinionē Martionitarum, ac Manichæi errorem excludens: ne quis phantasiam ab hominibus visam crederet, cùm palpatam corporis veritatem à se apostolus prædicasset. Deinde addit, verbum vitæ, & vitā manifestatam; hoc se vidisse, hoc annūciare, hoc protestari, simul scilicet & exequens officium fidei, & ingerens terrorē incredulitati: ut cum ille utique protestatur se prædicare, sibi nō imputaret periculum suum qui noluiſſet audire. Annunciamus vobis, inquit, vitam æternā, quæ erat apud patrem, & apparuit nobis: hoc quod apud patrē semper fuit, hominibus apparuisse: hoc quod in principio semper fuit, ab hominib⁹ visum esse: hoc quod verbum vitæ sine exordio erat, palpatum humanis manibus docuit esse. Vides quot modis, quàm variis, quàm multiplicibus, quàm indiuiduis, quàm apertis ita sacramentum vitæ cum deo carnis exposuit, ut nemo alterutrum dicere omnino possit, qui non vtrunque memoraret. Quod ipse quoque apostolus alibi eidentissime: Iesus enim, inquit, Christus heri & hodie, ipse & in secula. Hoc est illud utique quod superiore testimonio dixit: quod erat à principio, hoc manus nostræ palpaerunt. Non quia palpari spiritus per se possit: sed quia verbum scilicet caro factum in homine quodammodo, cui vnitum fuerat, pal-

Heb. 13.

pabatur. Et ideo idem Iesus heri & hodie: id est idem ante exordium mundi, qui in carne: idem in præterito, qui in præsentī: idem quoque etiam in secula, quia idem per omnia qui ante omnia. Et hoc totum domin⁹ Iesus Christus. Et quomodo idem ante mundi ortum, qui nuper ortus scilicet? quia idem in homine nuper ortus, qui ante ortum omnium deus. Et ideo Christus totū nominatur quod deus: quia tāta est Christi & dei vnitas, vt nemo vti que iam omnino possit vel Christum dicens, non deum in Christi nomine dicere: vel deum dicens, non Christum in dei nomine nuncupare. Ac sic vnito sibi penitus per maiestatem sacræ natiuitatis vtriusque substantiæ sacramento, quicquid erat, scilicet homo & deus, factum est totum deus. Vnde apostolus Paulus videns reuelatis fidei oculis totum in Christo inexplicabilis maiestatis arcanum, ita locutus est, inuitans ad referendam deo gratiā agnoscentes beneficia dei populos: *Gratias, Colos. 1* inquit, agētes patri, qui dignos nos fecit portione sortis sctōrū in lumine, qui eripuit nos de potestate tenebrarū, & transtulit in regnū filii dilectionis suæ: in quo habemus redemptionem per sanguinem ipsius, remissionem peccatorum: qui est imago dei inuisibilis, primogenitus vniuersæ creaturæ: quia in ipso cōdita sunt vniuersa in cælis & in terra, visibilia & inuisibilia, siue throni, siue dominationes, siue potestates: omnia per ipsum & in ipso

creata sunt, & in ipso constant. Et ipse est caput corporis ecclesiæ, qui est principium, primogenitus ex mortuis, vt sit in omnibus ipse primatum tenens: quia in ipso complacuit omnem plenitudinem habitare, & per ipsum reconciliare omnia in ipsum, pacificans per sanguinem crucis eius, siue quæ in cælis, siue quæ in terris sunt. Nunquid & hoc aliqua interpretationis adiectione indiget? cum ita copiosè & euidenter expressum sit, vt in se non solum rerum fidem, sed etiam expositionis habeat claritatem. Gratias enim agere nos patri iubet: magna vtique causæ agendæ gratiæ adiecta: quia dignos nos fecerit portione sanctorum, & ereptos de potestate tenebrarum trāstulerit in regnum filii dilectionis suæ: in quo habeamus redemptionem & remissionem peccatorum: qui sit imago dei inuisibilis, primogenitus vniuersæ creaturæ: quia in ipso ac per ipsum creata sint omnia: quorum vtique sicut factor ipse, ita etiam gubernator sit. Et quid post hæc? Ipse est, inquit, caput corporis ecclesiæ: qui est principium, primogenitus ex mortuis. Resurrectionem quasi generationem scriptura nominat: quia sicut generatio vitæ creet, ita resurrectio generet ad vitam. Vnde etiam resurrectio ipsa regeneratio nūcupatur, secū-

Mat. 19 dum illud domini testimonium: Amen dico vobis, quod vos qui secuti estis me, in regeneratione cū sederit filius hominis in sede maiestatis suæ, sedebitis & vos super sedes duode-

cim iudicantes duodecim tribus Israel. Ergo
 primogenitum ex mortuis eum dicit, quem su-
 perius inuisibilem Dei filium atq; imaginem
 prædicauit. Quis autē imago inuisibilis dei?
 nisi vnigenitus verbum dei. Et quomodo is
 resurrexisse ex mortuis dicitur, qui imago ac
 verbum dei inuisibilis nominatur? Et quid ta-
 men adhuc additur? Vt sit, inquit, ipse prima-
 tum tenens: quia in ipso complacuit omnem
 plenitudinem habitare, & per ipsum reconci-
 liare omnia in ipsum, pacificans per sanguinē
 crucis eius, siue quæ in cælis, siue quæ in terra
 sunt. Nunquid indiget primatu vniuersorum
 creator omnium? aut principatu eorū quæ à
 se facta sūt, ipse qui fecit? Aut nūquid dici de
 verbo potest, vt in eo qui sit primogenitus ex
 mortuis, complacuerit omnem plenitudinem
 habitare? qui vtique vnigenitus filius dei, &
 verbum dei ante vniuersa rerum exordia, pa-
 trem inuisibilem in se habens, ita prius omnē
 plenitudinem in se habuit, vt esset ipse omniū
 plenitudo. Et quid postremo? Omnia, inquit,
 pacificans per sanguinem crucis eius, siue quæ
 in terra, siue quæ in cælis sunt. Manifestauit
 utiq; apertissimè de quo diceret, quē primo-
 genitum ex mortuis nominasset. Nunquid e-
 nim per verbi aut spiritus sanguinem recon-
 ciliata ac pacificata sunt omnia? Non vtique.
 neque enim in naturam cadere impassibilem
 res vlla potuit passionis, aut fundi sanguis va-
 luit nisi hominis, aut mori alter quàm homo

& tamen idē qui in sequentibus mortuus dicitur, superius imago dei inuisibilis prædicatur. Quomodo ergo & hoc? scilicet quia id omni modo ab apostolis cautum est, ne aliqua videretur in Christo esse diuisio, & vnitus in filio hominis filius dei inciperet per erraticas interpretationes duas habere personas, ac per prauas atque impias opiniones, qui esset scilicet in se vnus, duplex fieret in nobis. Et ideo pulchre ac mirabiliter ab ipso vnigenito filio dei vsque ad vnitum filio dei filium hominis prædicatio apostolica descendit: vt sicut ipse rerum ordo, ita etiam doctrinæ sermo decurreret. Ita cuncta inseparabili connexionē, & quasi quodam ponte continuans, vt sine vlla penitus diuisione & interuallo eum quem in principio mundi legeres, in fine temporis inuenires: neq; vlla omnino distractione impiæ discessionis admissa, vnū in carne atque alium in spiritu filium dei crederes. Cum ita apostolicum magisterium, deum pariter atque hominem per sacramētum corporeæ natiuitatis vnisset, vt eundem tibi reconciliantē in cruce omnia demonstraret, quem ante exordiū mundi imaginē dei inuisibilis prædicasset. Quod quidem apostoli dictū sit: tamen doctrina domini est. Idem enim hoc in apostolo ad Christianos, qui consimile illud in euangelio ad Iudæos per se locutus est, dicēs: Nunc autē queritis me interficere hominem, qui veritatem vobis locutus sum, quam audiui ab eo. Neque

enim ego à me venio: sed ille me misit. Et deũ
 vtique se & hominem esse indicans. Homi-
 nem in hoc, quòd hominem esse se prædicat.
 Deum in hoc, quòd missum se esse confirmat.
 Apud eũ enim necesse est semper fuerat à quo
 venerat: & ab eo venerat à quo se missum esse
 dicebat. Vnde etiã illud fuit, quod dicentibus
 ad se Iudæis: Quinquaginta annos nondũ ha-
 bes, & Abraham vidisti? Conuenientissima *Ibidem.*
 æternitatis ac maiestatis suæ voce respondit,
 dicens: Amen amen dico vobis, priusquam
 Abraham fieret, ego sum. Quæro ergo, cuius
 dictũ hoc velis esse? Christi vtique absque du-
 bio. Et quomodo qui natus recenti tempore
 fuerat, ante Abraham se esse dicebat? Per illũ
 scilicet cui vnitus erat penitus, verbũ dei, vt
 intelligerẽt omnes quanta esset Christi ac dei
 vnitas: cum quicquid deus in Christo diceret,
 totum iam sibi diuinitatis vnitas vindicaret.
 Bene autẽ cõsciũs æternitatis suę, illa in cor-
 pore tunc Iudæis voce respondit, qua quõdã
 Moyši locutus fuerat in spiritu. Hic enim ait: *Exo. 3.*
 Priusquã Abraham fieret, ego sum. Moyši au-
 tem: Ego sum qui sum. Admirabili vtique di-
 uinæ naturæ æternitatem sermonis magnifi-
 centia prædicauit: quia nihil de deo tam con-
 ueniens dici potest, quàm vt semper esse di-
 catur: quia esse nec præterit initium, nec
 futuri terminum habet. Et ideo aptissimè
 hoc de æterni dei natura dicitur, quod æ-
 ternitati optimè coaptatur. Quæ quidẽ

dicat, dicens : Neque tentemus Christum, sicut quidam illorum tentauerunt, & à serpentibus perierunt. Omnes quoque sanctos qui vixerunt sub lege veteris testamenti, beatus apostolus Petrus per gratiam domini nostri Iesu Christi prædicat esse saluatos. Exi itaque, effuge hinc si potes, tu quisquis ille es qui rabido ore ac blasphemio spiritu furens, nihil interesse admodum inter Adam & Christum putas, & qui eum etiam post partum virginis deum 1. Io. 4. denegas. * Ioannes : Omnis, inquit, qui sol- * *Desideratur*
 uit Iesum, ex deo non est, & hic est Antichri- *deratur*
 stus. Agnoscisne eum heretice? Agnoscis de te *hic quæ*
 iam palam & designanter dixisse? Nemo enim *dam.*
 ita soluit Iesum quàm qui non confitetur deum.
 Cum enim in hoc omnis ecclesiæ fides, & omnis cultus sit, Iesum deum verum fateri : quis magis venerationem eius & cultum soluere potuit, quàm qui totum in eo quod omnes colimus, denegauit? Caueas ergo obsecro caueas, ne quis etiam te Antichristum dicere queat. Conuiciari me, aut maledicere putas? Non meum est quod loquor, ecce euangelista dicit: Omnis qui soluit Iesum, ex deo non est, & hic est Antichristus. Si non soluis Iesum, & deum non negas, Antichristum te nullus dicere potest. Si autem negas, quid accusas quod Antichristum te quisquam esse dicat? Tu hoc de te, tu inquam dum negas, ipse dixisti. Vis scire hoc verum esse? Dic mihi Iesum cum ex virgine nasceretur, quid velis, hominem

fuisse an deum? Si deum tantum, soluis utique Iesum: qui in eo hominem unitum deo fuisse deneges. Si autem hominem, soluis utique nihilominus: qui solum tantummodo, ut facis, hominem natum esse blasphemes. Nisi fortè existimas quòd nō soluas Iesum, qui fuisse deum in eo denegas: qui solueris utique etiam si natum cum deo hominem denegares. Sed exemplis forsàn hoc manifestius velis fieri, accipe de utroque. Manicheus extra ecclesiā est, qui Iesum deum tantū fuisse asserit: Hebion, quia hominem. Vterque enim negavit ac soluit: alter solum dicēdo hominem, alter tantummodo solum deum. Quia licet diuersa dixerint, par tamen est ipsius diuersitatis impietas. Nisi quod si vlla inter malorū magnitudinem potest esse discretio, iniuriosior blasphemia tua est, quæ solum hominem asserit, quàm illa quæ solum deum: quia licet vtrunque malum sit, contumeliosius tamen est diuina domino quàm humana rapuisse. Fides ergo hæc tantū catholica hæc tantum vera est, dominū Iesum Christū sicut deum ita hominē, & sicut hominem ita & deū credere. Omnis enim qui soluit Iesum, ex deo non est. Soluere autem hoc est, quod unitum est in Iesu, velle rumpere: & quod indiuiduū, separare. Quid autem in Iesu unitū & indiuiduum? Homo utique & deus. Ergo ille Iesum soluit, qui hæc separauerit atque diruperit. Alioquin si non dirumpit ac separat, ergo nec soluit. Si autē separat atque dirum-

pit, ille utique soluit. Et ideo omni homini in hanc blasphemiam atque insaniam prorumpenti, ipse pro se in euāgelio dominus Iesus illud quod ad Phariseos locutus est, clamat, ac protestatur: Quod deus coniunxit, homo non separet. Quod licet illic ubi à deo dictum est, ad causam aliam responsum esse videatur: tamen profunditas dei, quæ nō magis de carnalibus quàm de spiritualibus loquebatur; cum de illo hoc, tū magis de hoc voluit intelligi: quia credentibus tunc Iudæis id quod tu dicis hominem tantummodo Iesum sine deo esse, cum de societate coniugii dominus interrogaretur: nō de eo tantum, sed etiam de hoc edocuit: & de minoribus consultus, etiam de altioribus maioribusque respondit, dicens: Quod deus coniūxit, homō non separet. Hoc est: Nolite id separare quod in me deus iunxit: non separet humana impietas, quod in me vniuit diuina maiestas. Vis autem plenius scire hoc ita esse, audi apostolum de his ipsis de quibus tunc saluator docuit, differentem, qui utique utpote magister à deo missus, ut capere tunc auditorum imbecillitas poterat, ea ipsa quæ deus in mysterio prædicarat, exposuit. Cum enim de coniugio carnali, vnde interrogatus in euāgelio saluator fuerat, disputaret, replicauit ea ipse quibus ille vsus tunc fuerat legis veteris testimonia, scilicet ut intelligeretur quòd eādem rem exponeret qui iisdem testimoniis vteretur. Adiciēs præterea, ne deesse causæ ali-

Mat. 19

quid videretur, etiam carnale coniugium mulieris quoque ac viri nomen, quos ad mutuum adhortabatur affectum, ita posuit: Viri diligite vxores vestras, sicut & Christus ecclesiam. Et iterum: Ita & viri debēt diligere vxores suas vt corpora sua. Qui vxorē suā diligit, seipsum diligit. Nemo vnquā carnē suam odio habuit, sed nutrit & fouet eam, sicut & Christus ecclesiam: quia membra sumus corporis eius. Vides quemadmodum Christi atque ecclesiæ nomina viri ac mulieris nominibus adiungat? Omnes à carnali audientia ad spiritua-lem intelligentiam traxit. Cū enim omnia ista dixisset, subdidit ea quibus in euangelio dominus vsus fuerat testimonia, dicens: Propter hoc relinquet homo patrem suum & matrem suam, & adiungetur ad vxorem suam: & erunt duo in carne vna. Et quid post hæc? quasi cum magna clamoris protestatiōe subiecit: Sacramentum, inquit, hoc magnum est. Remouit vtique de hoc omnino & amputauit carnalem intellectum, vbi sacramentum penitus dixit esse diuinum. Et quid tamen post ista subdidit? Ego autem dico in Christo & in ecclesia. Cū dixisset, sacramentum hoc magnum est: non dixit, hæc est expositio sacramēti. Sed quid? Ego autem dico in Christo & in ecclesia. Hoc est dicere: Illud quidem magnum est sacramentum: sed ego in Christo dico & in ecclesia. Hoc est, vt quia capere illud ad præsens forsitan oēs nō queunt, vel hoc capiant, quod

tamen ab illo non discrepat, nec diuersum est: quia vtrunque de Christo est. Sed quia profundiora illa nō capiūt, hęc saltē faciliora cognoscant: vt cū promptiorem intellectum cœperint capere, ad altiorem valeant peruenire: & planioris nunc rei adipiscentia, sit postea profundioris via. Quod ergo magnum illud est sacramentum, quod sub viri atque vxoris nomine designatur? Apostolum ipsum interrogaemus: qui ad docendam eandem rem alibi verbis rei ipsius vsus est, dicens: Et manifestè ma-
1. Ti. 3.
 gnum est pietatis sacramentum, quod manifestatum est in carne, iustificatum est in spiritu; apparuit angelis, prædicatum est gentibus, creditum est in mundo, assumptum est in gloria. Quod ergo magnum est illud sacramentum, quod manifestatum est in carne? Deus scilicet natus è carne, deus visus in corpore. Qui vtique sicut palàm est manifestatus in carne, ita palàm est adsumptus in gloria. Hoc ergo magnum est sacramentum, de quo ipse ait: Propterea relinquet homo patrem suum & matrē, & adhærebit vxori suæ: & erunt duo in carne vna. Qui fuerunt ergo dúo in carne vna? deus scilicet atque anima. In vna enim ea quæ vnita deo est carne hominis, deus est atq; anima, secūdum illud ipsius domini: Nemo po-
Ioan. 10
 test à me tollere animam meam: sed ego pono eam à meipso. Potestatem habeo ponendi eā, & potestatem habeo iterum sumendi eam.

Tria ergo nunc in hoc vides, Deum, carnem, animā: deus est qui loquitur: caro, in qua loquitur: anima, de qua loquitur. Propterea ergo homo ille, de quo propheta dicit; *Psalm. 48.* Frater nō redemit, redimet homo? Qui, ut dictum est, *Ioan. 3.* ascēdit vbi erat prius, & de quo legimus; Nemo ascendit in cēlum, nisi qui de cēlo descendit filius hominis, qui est in cēlo. Propter hoc inquā relinquet patrem suū & matrem: id est Deum ex quo natus est, & Hierusalem illam quæ est mater omniū nostrum: & adhæsit humanę carni quasi vxori suę. Et idcirco de patre expresse dixit: Relinquet homo patrē suū; de matre autem non dixit, suā, sed tantūmodo matrē posuit: quia non tam ipsius erat mater, quā m vniuersorū credentiū, id est omniū nostrum. Et adiūctus est vxori suę: quia sicut vir & mulier vnū corpus sunt, ita maiestas diuinitatis, & caro hominis vniūtur, & facti sunt duo, id est deus atq; anima in carne vn2. Quia sicut caro illa habitatorem in se habuit deū, ita animā quoque in se cohabitātem deo. Hoc ergo magnū est illud sacramentū, quod inquirendum nos admiratio apostoli vocat, & adhortatio diuinitatis inuitat: non alienū utiq; etiam à Christo & ab ecclesia, ut ipse ait: Ego autem dico in Christo & in ecclesia. Quia & caro ecclesię caro Christi est, & in carne Christi deus est atque anima; ac si idem in Christo quod in ecclesia: quia sacramentum quod in Christi carne creditur, etiā fide in ecclesia cō-

tinetur. Hoc ergo sacramentum, quod & manifestatū est in carne, & apparuit in mūdo, & gentibus prædicatur, multi sanctorū veterum sicut præuidebāt in spiritu, ita videre etiā in carne voluerūt. Amen enim, inquit dominus, Mat. 13
 dico vobis: quia multi prophetæ & iusti cupierunt videre quæ vos vidistis, & non viderunt: & audire quæ audistis, & nō audierunt.
 Et ideo Esaias propheta: Vtinam, inquit, domine disrumperes cēlos, & descenderes. Sed Esa. 64
 & Daudid: Domine inclina cēlos, & descende. Psa. 143
 Moses quoque: Ostēde, inquit, mihi teipsum, Exod. 3
 vt manifeste videā te. Nemo admodū propius q̃ Moyses legē capiens, alloquentē è nubibus deū, atq; ad ipsam admodū præsentia maiestatis accessit. Et quomodo cū nemo propiora q̃ ille de deo cerneret, adhuc manifestiora poscebat, dicens: Ostende mihi, inquit, teipsum, vt manifeste videā te? scilicet quia hoc ille fieri precabatur, quod iisdem admodū verbis apostolus factū esse dicebat: id est vt palām dominus manifestaretur in carne, palām appareret in mundo, palām adsumeretur in gloria: & omnia oculis tandē carnalibus sancti cernerēt, quæ spiritualibus præuidebāt. Alioquin si, vt heticus ait, deus futurus in domino Iesu Christo erat, velut in statua & in organo, id est vt habitaret tātū quasi in homine, & loqueretur quasi per hominē: non vt ipse esset qui habitaret, atque ex se & ex suo corpore loqueretur deus: iam vtique sic & habitaret in sanctis, &

locutus fuerat è sanctis . In his quoque ipsis, quos suprà dixi, qui aduentum ipsius precabatur, sic erat ac loquebatur . Et quid necesse erat vt hoc omnes poscerent quod habebant, si petebant quod iam acceperant ? aut quid videre oculis cuperèt quod corde retinebant ? præsertim cū plus sit eadem rem habere quēpiam intra se, quàm videre extra se . Aut si sic habitaturus erat in Christo deus , sicut in sanctis omnibus : cur magis Christum videre omnes sancti cuperent quàm seipsos ? Et si eandem rē visuri in domino Iesu erant, quam in se habebant : cur non plus multò arbitrarentur eandem rem in se habere quàm in altero videre ? Sed erras infelix furor, non intelligens vt apostolus ait, & quæ loquaris, & de quibus adfirmes ; Omnes enim prophetæ , & omnes sancti portionem quandam diuini spiritus, prout capere poterant, à deo acceperunt . In Christo autem omnis plenitudo diuinitatis habitauit atque habitat corporaliter . Et ideo longè de eius plenitudine sunt, ex cuius plenitudine ali quid accipiunt, quorū adimpletio Christi munus : quia vacui vtique omnes erant, nisi ipse esset omniū plenitudo . Hoc ergo sancti omnes optabāt, hoc precabantur, hoc sic videre oculis desiderabāt, sicut animo ac mente sapiebāt . Et ideo Esaias propheta : Vtinā, inquit, disrumperes cēlos, & descēderes . Sed & Habacuc idē adnuntians quod ille optans : Dum adpropian, inquit, anni , ostenderis, in aduentum

1. Ti. 1.

Hab. 3.

temporum demonstraberis. Deus de Theman,
 siue illud: Deus ab Austro veniet. David quo- Ps. 49.
 que: Deus manifeste veniet. Et iterum: Qui Ps. 79.
 sedes super Cherubin, appare. Alii aduentum
 eius quem mundo præstitit, adnunciabant:
 alii postulabant. Nonnulli specie dispari, sed
 affectu pari: intelligentes utique aliquatenus
 quãtã rem precaretur, ut deus in deo habitãs,
 in forma dei ac sinu permanens, semetipsum
 exinaniret, formã serui acciperet, & se usque
 ad suscipiendas omnes passionum acerbitates
 contumeliasq; submitteret, subiret pœnã pro
 beneficiis: & quod intolerabilissimum est &
 indignissimum, ab his ipsis mortem exciperet,
 pro quibus ipse moreretur. Intelligentes ergo
 hoc aliquatenus sancti omnes: aliquatenus in-
 quam intelligentes: quia quantum sit nemo
 intelligit: consona omnes aduentum dei voce,
 & quasi conceptum mutuo postulabant. Sciẽ-
 tes utique in hoc spem omnium consistere, in
 hoc salutem omniũ contineri: quia nullus sol-
 uere vinctos possit, nisi immunis à vinculis:
 nullus eximere peccatores, nisi peccato carẽs:
 nemo liberare aliqua re quenquam potest, nisi
 ea re ipse liber sit qua re alius liberatur. Et
 ideo cum in omnes mors pertransisset, omnes
 vita indigebãt: ut in Adã scilicet, moriẽtes in
 Christo viuerent. Quia quamuis multi sancti,
 multi electi ac familiares admodũ deo fuerũt:
 nulli tamẽ potuerũt per se penit⁹ esse salui, nisi
 fuissent aduẽtu domini & redẽptione saluati.

IOANNIS CASSIANI
de incarnatione domini,
liber sextus.



Egimus in euange-
lio, appositis iubē-
te domino quinque
panibus innumerā
dei plebem esse sa-
turatā. Et quomo-
do id tamen factum
sit, nec enarrare ser-
mo, nec colligere ē-
stimatio, nec intel-

ligere sensus potest. Tanta & tam incompre-
hensibilis diuinæ vis potestatis est: vt cum ha-
beamus in nobis facti ipsius cōscientiam, im-
possibile tamen nobis sit facti scire rationem.
Iamprimum enim quis comprehendere queat,
quomodo tam exiguus panum numerus, non
dicam ad esum ac saturitatem, sed etiam ad di-
uisionem ipsam appositionemque sufficeret?
Cum plura multò milia hominum fuerint,
quàm panes ipsi: plura penè conuiuia quàm de
tot panibus fragmenta esse possunt. Nata est
ergo ex verbo domini rerum copia. Creuit in
actu opus. Et cum parum esset quod videba-
tur, factū est inæstimabile quod dabatur. Nul-
lus ergo hic coniecturæ, nullus humanæ æsti-
mationi aut rationi locus. Solum est quod in

tali re fidelium ac sapientium menti scire liceat: ut quamlibet magna sint quæ à deo fiunt atque inæstimabilia, etiam si ea ipsa sensu non capiant, impossibilia tamen deo nulla esse cognoscant. Sed de his tamen tam ineffabilibus diuinæ virtutis actibus, quod rectissime ineffabilib⁹ sacri ortus miraculis coaptatur, quia ita res poscit, plenius postea. Interim quia quinque panum fecimus mentionem, non incongrue, ut reor, quinque eos libris quos iam euoluimus, comparamus. Si enim numero pares sunt, specie non dissimiles. Nam cum illi hordeacii fuerint, & hi quantum ad ingenium nostrum pertinet, hordeacii dici possunt: quâuis testimoniis sacris locupletati, despicabilibus inuolucris salutiferas opes contegant. Etiam in hoc scilicet ab illis non discrepantes: quia sicut illi cum essent pauperes specie, facti sunt diuites benedictione: ita hi quoque cum ingenio nostro viles sint, sunt tamen sacra admixtione preciosi: & cū præferant in se ex sermone nostro hordei vilitatē, habēt tamē intrinsecus ex domesticis testimoniis panis viui saporem. Superest ut ad exemplum illorum, per diuini muneris gratiam, innumeris ex seminibus salutiferos cibos præbeant. Et sicut illi corporalem dederunt edentibus fortitudinem; ita ii spiritalem legentibus tribuāt salubritatem. Potens est autem dominus, cuius etiam hoc donum est, sicut illud fuit, ut qui per cibum fecit non deficere in via saturos,

per hunc faciat non deuiare saturatos. Sed tamen quia illic vbi paruo quidem esu, sed magno munere innumera plebs dei pasta est, additi quinque illis panibus duo pisces leguntur: par est vt nos quoque qui offerri per nos omnibus sequentibus deū populis spiritalis prædii cupimus, quinque illis libris quasi quinque panibus, duos adhuc libellos quasi duos pisces adiiciamus. Te orantes domine, te obsecrantes: vt videns nisum officii, ac voti nostri, des pio conatui opus efficax. Et cum nos pro obsequio affectuque nostro numerum illum panum ac piscium, libellorum numero exæquare cupiamus, tu virtutem benedictionis illius in hæc transferas: & qui scriptiunculam nostram numero euangelico muneraris, numerum quoque ipsum euangelico fructu expleas, tribuasque hæc ad sanctum & salubrem cibum cunctis ecclesiæ tuę populis, omni ætati, & omni sexui. Et si qui fortè iam letifero illo virosi anguis spiritu adflati sunt, corruptoque animarum ac mentium statu, pestiferos venis languentibus morbos trahunt: des cunctis sani sensus vigorem: des plenam fidei sanitatem: vt tribuēs per scripta hæc nostri operis, tui muneris saluatorem, omnibus curam ad instar penitus sanctificati in euangelio à te cibi, sicut per esum illū corroborasti esuriētes, ita per hunc sanari iubeas tabescentes. Igitur quia neganti deū hæretico abunde iam, vt reor, cūctis superioribus scriptis diui-

norum testimoniorū autoritate respōdimus:
 nūc ad fidem Antiocheni symboli virtutem-
 que veniamus. In quo cum ipse baptizatus sit
 ac renatus, suis eum professionibus argui, suis
 (vt ita dicā) armis cōteri oportet: vt his testi-
 moniis sacris, etiā seipso (vt ita dicā) teste su-
 peretur. Neq; enim aliis iam reb⁹ cōtra eū agi
 necesse erit, cum palām se & euidenter ipse cō-
 uicerit. Textus ergo ac fides Antiocheni sym-
 boli hæc est: Credo in vnum & solum verum
 deum patrem omnipotentem, creatorem om-
 nium visibilium & inuisibilium creaturarum.
 Et in dominū nostrum Iesum Christū, filium
 eius vnigenitum, & primogenitū totius crea-
 turæ, ex eo natum ante omnia secula, & non
 factum, deū verum ex deo vero, homousion pa ὁμοούσιον
 tri. Per quem & secula compaginata sunt, &
 omnia facta. Qui propter nos venit. Et natus
 est ex Maria virgine: & crucifixus sub Pontio
 Pilato, & sepultus: & tertia die resurrexit secū-
 dum scripturas: & in cœlos ascēdit: & iterum
 veniet iudicare viuos & mortuos. Et reliqua.
 In symbolo, quod ecclesiarum omnium fidem
 loquitur, seire opto quid sequi malis, hominū
 auctoritatem an dei? Quamuis ego tecum non
 censorie aut seuerè agam, vt tibi eligēde tantū
 alterius rei copiam tribuā: vt vnum perimēs,
 alterum negem: vtrunque enim de vtroq; cō-
 cedo. Et quid concedo? dicā, ad vtrunq; te etiā
 si nolis traho: vtrunque enim in symbolo esse
 si vis, oportet sapias voluntarius: si non vis,

Rom. 9.

neceſſe eſt cōpellaris inuitus. Symbolū quippe, vt ſcis, ex collatione nomen accepit. Quod enim Græcè *σύμβολον* dicitur, Latine collatio nominatur. Collatio autem ideo, quia in vnū ab apoſtoliſ domini, totius catholicæ legis fide quicquid per vniuerſum diuinorum voluminum corpus immēſa funditur copia, totum in ſymboli colligitur breuitate perfectā: ſecū-
 dum illud apoſtoli: Verbum, inquit, conſummans & breuians in æquitate: quia verbum breuiatum faciet dominus ſuper terram. Hoc eſt ergo breuiatum verbum quod fecit dominus, fidem ſcilicet duplicis teſtamenti ſui in pauca colligens, ſed ſenſum omnium ſcripturarum in breuia concludens, ſua de ſuis condens, & vim totius legis cōpendioſiſſima breuitate perficiens. Conſulens ſcilicet in hoc, vt piſſimus pater, vel negligentia quorundam filiorum ſuorum, vel imperitia: vt non laboraret vtique quāuis ſimplex & imperita mens capere, quod poſſit facile etiam memoria cōtineri. Vides ergo in ſymbolo autoritatem dei eſſe: verbum enim breuiatum faciet dominus ſuper terram. Sed hominum fortasſe quæriſſe ne id quidem deeſt, per hominē enim id deus fecit. Sicut enim immenſam illam ſcripturarum ſacrarum copiam per patriarchas & prophetas maxime ſuos condidit: ita ſymbolum per apoſtolos ſuos ſacerdoſque conſtituit. Et quicquid ille per ſuos larga ac redūdātī copia dilatauit, idē hic per ſuos plenifſima bre-

uitate concludit. Nihil ergo in symbolo deest, quod ex scriptis dei per apostolos dei conditum, totum in se, quantum ad autoritatē pertinet, habet quicquid vel hominū est, vel dei. Quamuis etiam quod per homines factū est, dei existimandum sit: quia non tam illorum per quos factum est, quā illius credendū esse qui fecit. Credo, ergo inquit symbolum, in vnum verum solum deum, patrem omnipotentem, creatorem omnium visibilium & inuisibilium creaturarum: & in dominum nostrum Iesum Christum filium eius vnigenitum, & primogenitum totius creaturæ: ex eo natum ante omnia secula, & non factum. Deum verum ex deo vero, homouision patri, per quem & secula compaginata sunt, & omnia facta. Qui propter nos venit, & natus est ex Maria virgine, & crucifixus sub Pontio Pilato & sepultus. Et tertia die resurrexit secundum scripturas, & in cēlos ascendit. Et iterum veniet iudicare viuos & mortuos. Et reliqua. Si Arrianæ aut Sabellianæ hæreseos adsertor esses, & non tuo ipso symbolo tecum vterer, cōuincerem te: tamen testimoniorum sacrorum autoritate conuincerem, legis ipsius voce conuincerem. Denique probata per vniuersum mundum symboli veritate, dicerem te, etiamsi expers intelligentiæ ac sensus esses, oportere tamen sequi saltem consensum generis humani: nec pluris facere debere paucorum improborum peruersitatē quā ecclesiarum omniū

fidem : quæ utique à Christo fundata, ab apostolis tradita, non aliud existimanda esset quam vox atque autoritas dei, quæ haberet in se utique & vocem & sensum dei . Et quid tandem si sic apud te agerem, quid diceres? quid responderes? nonne obsecro illud? Non ita te imbutum, non ita institutum esse: aliud tibi à patribus , aliud à magistris atque autoribus tuis traditum? Non hoc te in conuenticulo illo paterni dogmatis , nec in ecclesia vestræ professionis audisse : aliud postremo textum ipsum atque sermonem traditi tibi atque insinuati symboli continere. In eo te baptizatum, in eo te renatum esse . Hoc tenere quod accepisses: & in eo te fidere diceres, in quo regeneratum esse didicisses . Nonne quæso dicens hæc, fortissimo te etiam contra veritatem scuto uti arbitrareris? Et verè in negotio quamuis improbo , non importuna defensio : & quæ non absurde causam erroris diceret, si pertinaciam non sociaret errori. Nam cū hoc teneres quod à paruo accepisses, plus haberet in te emendatio quod de præsentī errore corrigeret , quàm seueritas quod de præterito vindicaret. Nunc autem cum in catholica vrbe natus, catholica fide institutus, catholico baptismo regeneratus sis: nunquid agere tecum quasi cum Arriano aut Sabelliano possum? Qui utinā fuisses, minus dolorem in malis æditum quàm de bonis lapsum, minus fidem nō habitam quàm amissam, minus veterē hēreticum quàm nouū

apostatam : minus enim intulisses cunctæ ecclesiæ vel labis vel pestilentia: minus denique esses vel acerbus ad dolorem, vel grauis ad exemplum: si popularis potius tentare quàm sacerdos ecclesiam posses. Ergo, vt supra dixi, si Sabellianæ aut Arrianæ, vel cuiuslibet hæreseos discipulus atque adsertor esses: tueri vtique te parentum exemplo velis, magistrorum institutione, plebis societate, symboli fide. Non iniquum autem hæretice, non iniquū aut graue aliquid postulo. Hoc fac in catholica fide æditus, quod fueras pro peruersitate facturus. Tene parentum institutionem: tene ecclesiæ fidem: tene symboli veritatem: tene baptismatis salutem. Quod genus in te prodigii, quod genus monstri est? Pro te tu non facis, quod alii etiam pro errore fecerunt. Sed progressi satis in altum sumus: & pro cognatę vrbis affectu sequentes doloris impetum quasi ventum feruentem, dum cupidi cursus sumus, tenorem admodum recti itineris excessimus. Symbolū ergo hæretice, cuius superius textū diximus, licet omnium ecclesiarū sit, quia vna omnium fides: peculiariter tamen Antiochenę vrbis atque ecclesiæ est, id est, illius in qua tu æditus, in qua institutus, in qua renatus es. Huius te itaque perduxit symboli fides ad vitę fontem, ad salutis regenerationem, ad eucharistię gratiam, ad domini communionem. Et quid plura? Omniū grauis & luctuosa conquestio, ad ministerii etiam officium, ad pres-

byterii culmen, ad sacerdotii dignitatem. Facile hoc infœlix furor aut leue esse arbitraris? non vides quid egeris? in quod te barathrum præcipitaris? Perdens symboli fidẽ, totũ quod fueras perdidisti: sacramenta enim sacerdotii ac salutis tuæ symboli veritate cõstabant. Negare te tantummodo illud putas? tete inquam ipsum negasti. Sed negare te forsitan non putas. Videamus symboli textum: vt si ea dicis quæ prius, non arguaris: sin autem multo alia & contraria, non expectes iam vt à me confuteris, cum te tu ipse damnaueris. Si enim & aliud nunc adseris quàm in symbolo est, & aliud quàm prius dixisti: quid reliquum est, nisi vt nulli præterquàm tibi imputes animaduersionem tuam? cum eandem esse videas sententiam in te omnium, quam tuam. Credo, inquit symbolum, in vnum deum, patrẽ omnipotentem, creatorem omnium visibilium & inuisibilium creaturarum. Et in dominum Iesum Christum filium eius vnigenitum totius creaturæ, ex eo natũ ante omnia secula, & non factum. Iam primum ad hæc respondere te cõuenit: Confitearis hoc de Iesu Christo dei filio, aut neges? Si confiteris, sana sunt omnia. Sin minus, quomodo nunc negas quod ipse antè confessus es? elige ergo quid malis: alterum enim è duobus fieri necesse est: vt eadem te via ipsa confessio, si permanet, sola liberet: aut si negatur, prima cõdemnet. Credo enim, dixisti in symbolo, in dominũ nostrum Iesum

Christū filium eius vnigenitū, & primogenitum totius creaturæ. Si vnigenitus & primogenitus totius creaturæ dominus Iesus Christus, ergo tua ipsa cōfessione indubitāter de^o. Neq; enim alius vnigenitus & primogenitus totius creaturæ, nisi vnigenitus dei filius, sicut primogenitus creaturarū. Ita & creator omniū deus. Et quomodo solitariū hominē ex virgine natum asseris, quē deum ante secula fuisse cōfessus es? Deinde ex eo, inquit symbolū, id est ex patre natū ante omnia secula, & non factū. Quod utiq; non nisi vnigenito tantū dei filio cōpetit: vt natiuitas illius factura non sit, & natus tantūmodo non factus esse dicatur: quia cōtra rationē rei ipsius atq; honorē est, vt factor omnium factura esse credatur: & sic ipse autor cōptorū omniū cōperit, sicut ab eo cūcta cōperūt. Et ideo natus, non factus dicitur: quia singularis ei est natiuitas, non factura cōmunis. Et cum sit deus ex deo natus, totū necesse est habeat diuinitas geniti quicquid magnitudo generantis. Sequitur autem in symbolo: Deū verum ex deo vero, homouision patri: per quē & secula cōpaginata sunt, & omnia facta. Et cum hoc totū dixeris, memēto de domino Iesu Christo te cuncta dixisse. Hoc enim in symbolo habes: Credere te in dominum Iesum Christū, filiū dei vnigenitū, & primogenitum totius creaturæ. Et post hæc atque alia: deū verū ex deo vero, homouision patri: per quē & secula compaginata sunt. Quomodo ergo

idem deus & non deus, idem deus & idem statua, idem deus & idem organum? Non cōcordant sibi hæc ô hæretice in aliquo nec conueniunt, vt eundem cum volueris dicas deū, cum volueris putes figmentum. Dixisti in symbolo, verum deum: nunc dicis, hominem solitarium. Quomodo hæc sibi competere & coaptari queunt? vt idem summa sit virtus, idem sit sola infirmitas: idem summa maiestas, idem sola mortalitas. Non conueniunt hæc sibi in vno eodemque domino: vt eundem in cultum & in contumeliam diuidens, ex parte qua vis facias honorem, ex parte qua mauis facias iniuriam. Dixisti in symbolo, cum sacramētum veræ salutis acciperes: dominum Iesum Christum, deum verum ex deo vero, homouision patri, creatorem seculorum, factorem omnium. Vbi es ô dolor? vbi es ille qui tunc fuisti? vbi illa fides? vbi illa confessio? In portenta nunc atque prodigia recidisti. Quæ te stultitiæ, quæ amentitiæ perdidit? deum totius potētitiæ ac maiestatis ad inanimā materiā, & figmēta insensibilia transtulisti? profecit videlicet fides tua tēpore, profecit ætate, profecit sacerdotio? deterior senex quàm quondam paruulus: nūc pēior veteranus quàm tyrūculus, deterior episcopus quàm incipiens factus es: nec discipulus postquam magister esse cœpisti. Sed videamus cætera quæ sequuntur. Dicens ergo symbolum: dominum Iesum Christum, deum verum ex deo vero, homouision patri, per quem

secula compaginata sunt, & omnia facta : hoc inseparabili statim connexionione subiūxit: Qui propter nos, inquit, venit, & natus est ex Maria virgine. Ille ergo qui verus deus, qui hominibus patri, qui creator seculorū, qui factor omnium: ille inquam venit in mundum, & natus ex Maria virgine. Secundum illud scilicet Pauli apostoli: At ubi venit plenitudo temporum, misit deus filium suum factum ex muliere, factum sub lege. Vides quomodo scripturis sacris symboli sacramenta conueniunt? Apostolus filium dei missum à patre prædicat, symbolum venisse confirmat. Hoc enim erat consequens utiq; , vt quem missum apostolus edocuerat, fides confiteretur nostra venisse. Deinde apostolus ait, ex muliere factū : symbolum autem, ex Maria procreatum. Aduertis itaque quòd ipsa in symbolo scriptura loquitur, à qua symbolum ipsum se descendisse testatur. Bene autem apostolus, factū inquiring ex muliere, factum pro nato posuit, diuini eloquii cōsuetudine, qua factus pro nato ponitur, secundum illud : Pro patribus tuis facti sunt tibi filii. Vel illud: Priusquam Abraham fieret, ego sum. In quo scilicet euidenter dixisse noscitur: priusquam nasceretur, ego sum : facti nomine rem natiuitatis ostendens : quia efficientiam facti habet quicquid non indiget vt fiat. Qui propter nos, ergo inquit, venit, & natus est ex Maria virgine. Si homo solitarius ex Maria natus est: cur venisse dicitur? Neq; enim venit

Gal. 4.

Ps. 44.

Ioan. 8.

nisi qui habet idipsum in essentia, vt venire possit. Quia autē nondū idipsum acceperat vt esset: quomodo id habere poterat vt veniret? Homo autē ante cōceptum omnino non fuit: ergo in se non habuit vt venire possit. Deum ergo venisse certū est: cui in vtraque re preposita & esse suppetit & venire. Qui vtique & quia erat venit, & quia venire semper potuit, semper fuit. Sed quid de verbo argumētamur, cum res eluceant? & in symboli textu indicia rerū quærimus, cum ipse in eo sit sermo rerū? Repetamus cōfessionem symboli, & tuam: tua enim quæ illius; quia cōfessionem illius tuam confitendo fecisti, vt intelligas præuaricatū te non tantum à symbolo, sed & à te. Credo ergo inquit symbolū, in vnum solum verum deum, patrem omnipotentem, creatorē omniū visibilium & inuisibilium creaturarum. Et in dominū Iesum Christū filium eius vnigenitū, & primogenitū totius creaturæ: ex eo natū ante omnia secula, & nō factum; deum verū ex deo vero, hominū non patri: per quem & secula cōpaginata sunt, & omnia facta. Qui ppter nos venit, & nat⁹ est ex Maria virgine. Propter nos ergo, inquit symbolum, dominus noster Iesus Christ⁹ venit, & natus est: & crucifixus est sub Pontio Pilato: & sepultus, & resurrexit secundum scripturas. Confiteri hoc ecclesias nō pudet, apostolos prædicare non puduit. Tu ipse, tu inquā ipse, cuius nunc omnis vox sacrilegiū est: qui nihil admodū non negas: hæc tamē om-

nia negasti, deū utiq; natū, deū passum, deum
 resurrexisse. Et qđ post hęc? quod deuolutus es:
 quid effect? in quę redať? quid ais? quid euo-
 mis? quod ipse scilicet, ut quidam ait, non sani
 esse hominis non sanus iuret Orestes. Quid
 enim dicis? Quid est igitur, quia Christotocō
 natus est filius dei: ut puta si dixerim: credo in
 deū verbū filiū dei, vnigenitū ex patre natum,
 homouision patri: qui descēdit, & sepultus est:
 non statim auditus ipse accepit plagam: deus
 mortuus. Et iterum: nec fieri, inquis, potest, ut
 qui ante omnia secula natus est, secūda vice na-
 scatur, & hoc deus. Si fieri omnia hęc omnino
 nō potuerūt: quomodo ecclesiarū symbolū fa-
 cta esse dicit? Quomodo etiam tu ipse dixisti?
 Cōferamus enim cum his quę ante à te dicta
 sunt, ea quę nunc à te dicuntur. Dixisti prius:
 Credo in deū patrē, & in Iesum Christū filium
 eius, deū verum ex deo vero, homouision patri:
 qui propter nos venit: & natus ex Maria vir-
 ginē: & crucifixus est sub Pontio Pilato, & se-
 pultus est. Nunc autē quid ais? Si dixerimus:
 Credo in deū verbū filium dei vnigenitum, ex
 patre natū, homouision patri: qui descendit, &
 sepultus est: nō statim auditus ipse accepit pla-
 gam. Acerbitas quidē atq; impietas dicti tui
 cogere nos ad immoderatū ac feruidū respon-
 dendi impetum potest: sed restringēda paulu-
 lum pii doloris sunt retinacula. Te inquā er-
 go te ipsum cōsulo: dic mihi quāso, si Iudæorū
 quispiā aut paganorū catholicę fidei symbolū

neget, num audiendum eum existimes esse? nõ
vtique. Quid si id ipsum hæreticus aut apostata?
multo certe minus: quia intolerabilius est
veritatem cognitam derelinquere, quàm inco-
gnitam negare. Duos igitur in te videmus, ca-
tholicũ & apostatam: & prius quidem catho-
licum, nunc apostatam. Quod ergo nobis se-
quendum putes, ipse constitue: alterum enim
præponere in te non potes, nisi alterum in te
ipse damnaueris. Dicis ergo damnari à te eum
qui prius fueris, damnari catholicum à te sym-
bolum, damnari omnium confessionem, dam-
nari fidem. Et quid igitur? ô indignum faci-
nus, ô intolerabilis dolor. Quid facis in eccle-
sia catholica, catholicorum præuaricator? Cur
cœtum populi polluis: qui fidem populi dene-
gasti? Insuper & cõsistere in altario, & conscẽ-
dere tribunal, & offerre impudentissimum ac
perfidissimum os tuum populo dei ausus es:
occupare cathedram, præsumere sacerdotium,
profiteri magistrum. Vt quid doces Christia-
nos, Christum non credens? cum ipsum in cu-
ius dei templo sunt, deum neges; & post hæc
omnia, ô insania, ô furor. Decorem te & epi-
scopum putas? cum eum ipsum vtique, ô infœ-
lix cæcitas, eum ipsum inquam deũ deneges,
cuius te esse adseras sacerdotem. Sed efferi-
mur præ dolore. Quid ergo inquit symbolum?
vel quid tu in symbolo ipse dixisti? Dominum
vtiq; Iesum Christum, deum verũ ex deo ve-
ro, homouision patri; per quem secula creata

sunt, & omnia facta. Hunc eundē propter nos
venisse, & natum esse ex Maria virgine. Cū
ergo deum natum ex Maria dixeris, quomodo
Mariā dei matrem negas? Cū deum venisse
dixeris, quomodo deū nunc negas esse qui ve-
nit? Dixisti in symbolo: Credo in Iesum Chrī-
stum filium dei: credo in deum verū ex deo ve-
ro, homouision patri: qui propter nos venit, &
natus est ex Maria virgine, & crucifixus sub
Pontio Pilato, & sepultus est. Nunc autem di-
cis: Si dixerimus: Credo in deum verbum filiū
dei vnigenitum, ex patre natum, homouisiō pa-
tri: qui descendit, & sepultus est: non statim au-
ditus ipse accepit plagam. Vides ergo destrue-
re te penitus atque eradicare omnem catholi-
ci symboli, omnē catholici sacramenti fidem?
ô scelus, ô portentum, vt ille ait, in vltimas ter-
ras asportandum: quia hoc rectius de te dici-
tur, vt in illam scilicet solitudinem transeas,
vbi nullum valeas inuenire quem perdas. Fidē
ergo salutis nostræ, sacramentū spei ecclesiasti-
cæ tu auditus tui atque auriū plagā putas. Et
quomodo quōdam cū ad baptismum curreres,
sanis hæc sacramenta auribus audiebas? quo-
modo cū te magistri ecclesiarum docerent, au-
res tuæ non vulneratæ sunt? sine vlla tunc cer-
tē plaga duplici oris atque aurium fungebaris
officio: cū & audita ab aliis dicerēs, & ipse
te dicentem dictor audires. Vbi erāt tunc hæc
aurium tuarum vulnera? vbi hæc auditus tui
plaga? Cur con contrā dixisti, & reclamasti?

Sed videlicet pro arbitrio ac libidine tua, cū vis, discipulus es ecclesiæ: cū vis, hostis: cū vis, catholicus: cū vis, apostata. Dignus nimirum autor, qui in quamlibet partem te contuleris, ecclesias post te trahas: cuius voluntas lex vitæ nostræ sit, qui mutabilitate tua humanū genus mutes: & quia tu esse nolis quod omnes sunt, quod tu velis. Præclara videlicet autoritas: vt quia tu quod eras non es, esse mundus desinat quod fuit. Sed paruulum te forsità cū renascereris fuisse dicis: & ideo nec sapere tunc, nec reclamare valuisse. Verum est, obstitit tibi infantia ne contradiceres, qui mori vir contradicendo potuisses. Quid enim si in illa fidelissima ac deuotissima Christi ecclesia, cū sacerdos symbolum respondententi & adclamanti populo dei traderet, mutire tu in aliquo aut reclamare tentasses? Audiendus fortasse fueras, ac non statim vt nouum prodigii monstri genus in pestem aliquam exterminiumque mittendus. Non quia piissima illa ac religiosissima plebs dei cōtaminari vel impiissimi cuiusquā sanguine velit: sed quia in magnis plerunque vrbibus feruens dei amore populus, cū exurgere contra deum suum quempiam viderit, calorem fidei retinere non nouit. Sed esto, infans, si tamen ita est, contradicere ac reclamare symbolo non potueris: cur adultior iam robustiorque tacuisti? Creuisti certè & vir factus, & ministerio ecclesiastico insertus es. Per tot ergo ætates, per tot officii ac dignitatis gra

dus, nūquam intellecta à te fides est, quam tã-
 diu antè docuisti? Diaconum certè eius te &
 presbyterum fuisse nosti: si displicebat tibi sa-
 lutis regula, cur suscipiebas eius rei honorem,
 cuius non approbabas fidem? Sed prouidus vi-
 delicet vir & simplex religiosus, ita temperare
 te inter vtrunque voluisti: vt teneres & sacrile-
 gii p̃fidiā, & catholici dignitatē. Plaga er-
 go auditus tui, & vulnus aurium tuarū est de⁹
 natus, & deus passus. Et vbi illud tuum est Pau-
 le apostole: Nos autem prædicamus Christum
 crucifixum, Iudæis quidem scandalum, Genti-
 bus autem stultitiam: ipsis autem vocatis Iu-
 dæis & Græcis Christum dei virtutem & dei
 sapientiam. Quid est sapientia & virtus dei?
 deus vtrique. Christum autē qui crucifixus est,
 dei virtutem & sapientiam prædicat. Ergo si
 absque dubio sapiētia dei Christus, ergo abs-
 que dubio Christus de⁹. Nos ergo, inquit, præ-
 dicamus Christum crucifixum, Iudæis quidem
 scandalum, Gentibus autem stultitiam. Crux
 itaq; domini, quæ stultitia Gētib; & Iudæis
 scandalū fuit, tibi vtrunque est. Neque enī aut
 stultitia vlla maior est, q̃ non credere: aut ma-
 ius scandalum, quàm audire nolle. Vulneraban-
 tur ergo illorum aures ad prædicationē ac pas-
 sionē dei, sicut nunc vulnerantur tuę. Plagā es-
 se hoc auditus sui putabant, sicut tu putas. Et
 hinc erat quòd ad nomen dei ac domini Iesu
 Christi, prædicante Christum deum Paulo a-
 postolo, claudabant illi capitis sui aures, sicut

1. Cor. i

tu claudis animi. Par in hac parte vtriusque vestrum videri potest impietas: nisi quod hoc maius est crimen tuum, quod illi eum negabant, in quo adhuc passio ostendebat hominē: tu eū denegas quem etiam resurrectio iam probauit deum. Ac per hoc illi eum persequebantur in terra: tu persequeris & in cælo. Nec solum id, sed hoc utique crudelius & scelestius, quod illi negabant per ignorantiam, tu post fidē: illi nescientes dominū, tu confessus deum: illi sub emulatione legis, tu sub professione antistitis: illi eum à quo se arbitrabātur alienos, tu eum cuius sacerdos es. O facinus indignum & inauditum: eū ipsum persequeris insectatione, cuius adhuc vteris dignitate. Sed magno videlicet perfidiæ atque impietatis tuæ argumento ad negandum ac persequendum dominum deū vteris, dicens: homouſios patri debet esse natiuitas. Nondū ad plenum dico, ac profero in dei natiuitate penitus hoc non esse seruandū: quia non parientis fuit natiuitas ipsa, sed nati: & ipse natus est ut voluit, cuius fuit hoc ipsum ut nasceretur. Interim quia homouſion parienti dicis natiuitatē esse debere: ego dominū Iesum Christū homouſion dico fuisse & patri patri & matri. Pro personarū enim diuersitate reddidit parienti vnicuique similitudinē suā. Secundum diuinitatem enim homouſios patri: secundum carnē autem homouſios matri fuit. Non quod alter qui homouſios patri, alter qui homouſios matri: sed quia idē dominus Iesus

Christus & homo natus & deus, vtriusque in
separētis habuit proprietatem : dum & in eo
quòd homo est, humanæ matris reddidit simi-
litudinē:& in eo quòd deus, dei patris habuit
veritatē. Alioquin si nō idem Christus ex Ma-
ria est qui ex deo natus, duos absq; dubio Chri-
stos facis: secundum illud scilicet Pelagianę im-
pietatis scelus : quæ solitarium hominē ex vīr-
gine natum adserens, eruditorē eum dixit hu-
mani generis, magis quàm redemptorem fuisse:
quia non redemptionē vitæ hominibus, sed
viuendī dederit exemplum: videlicet vt sequē-
tes eum homines dum similia agerent, ad con-
similia peruenirent. Vna ergo impietatis ve-
stræ origo, eadem errorū radix est. Illi solitariū
hominem ex Maria natum adserunt, & tu idē.
Illi filiū hominis à filio dei separant, & tu idē.
Illi saluatorem aiunt per baptisma Christum
esse factum, tu in baptismo templum dei factū.
Illi eum deū non negant factum post passionē,
tu negas eum etiā post ascensionem. In vno er-
go admodum tantū distat vestra peruersitas, q̃
illi in terris blasphemare videntur dominū: tu
& in cælo. Vicisti ac supergressus es, non nega-
mus, quos imitaris. Illi quasi aliquādo desināt
deum negare, tu nunquam. Quāquam nec illo-
rum habenda sit ad plenum vera confessio, qui
saluatori post passionem tantū honorem diui-
nitatis impertiunt:& cū eum ante deū negent,
postea confitentur : quia (vt mihi videtur) in
deo qui partē denegauerit, totum negat:& qui i

non semper fuisse confessus fuerit ; semper negat. Sicut & tu, etiam si hodie in cælo dominum Iesum Christum , qui ex Maria virgine natus est, verum deum diceres: tamē nisi semper deū diceres, non verē confitereris. Sed videlicet nō vis mutare in aliquo , aut variare sententiam: quem natum hominem solitarium dicis, etiam hodie deum non esse contendis. O noua & singularis impietas: quem cum hæreticis hominē esse asseris , deum nec cum hæreticis confiteris. Sed tamen vt dicere institueram, duos à te absque dubio Christos fieri, id ipsum dilucidandum est. Dic mihi quæso, tu qui Christum à filio dei separas , quomodo in symbolo Christū ex deo natum esse fatearis? Ais enim: Credo in deum patrē , & in Christum Iesum filium dei. Dicis autem ex Maria non eundem filium dei natū. Ergo alter ex deo Christus, alter ex Maria. Duo ergo in sententia tua Christi sunt. Qui cum in symbolo Christum non neges, alterum ex Maria Christum asseris , quā eum quem in symbolo confiteris! Sed dicis forsan Christum non esse ex deo natum, & quomodo in symbolo ais : Credo in Iesum Christum filium dei? Aut negatur⁹ es ergo symbolum, aut confessurus filium dei Christum. Si autem cōfiteris in symbolo Christum filium dei, necesse est vt eundem ex Maria confitearis Christum filium dei . Aut si alium ex Maria Christum adseris, duos vtique Christos esse blasphemus . Sed tamen etiam si peruerfitas ac perfi-

dia tua hac symboli fide non concludatur :
 nōne quæso ratione ipsa, ac luce veritatis ob-
 rueris? Dic mihi quæso quisquis ille es hæreti-
 ce. Trinitas certè est quam credimus, quam
 confitemur, pater & filius & spiritus sanctus.
 De maiestate patris ac spiritus nulla quaestio
 est. Filio calumniaris, eo quòd non eundem ex
 Maria dicas æditum, quem ex deo patre gene-
 ratum. Dic mihi ergo: cū filium dei vnigeni-
 tum natum ex deo non negas, hunc qui ex Ma-
 ria natus est quem velis esse? Dicis hominem
 solitarium, iuxta illud quod ipse dixisti: quod
 natum est ex carne, caro est. Sed appellari ho-
 mo non potest solitarius, qui sola non est hu-
 manæ creationis lege generatus! Quod enim
 in ea est, inquit angelus, de spiritu sancto est.
 Et hoc tamen etiam tu ipse, qui omnia admo-
 dum sacramenta salutis negas, negare non au-
 des. Cū ergo ex spiritu sancto natus sit: & di-
 ci homo non queat solitarius, qui est deo inspi-
 rante conceptus: si ille non est, qui iuxta apo-
 stolum semetipsum exinaniuit, formam serui
 accipiens: & verbum caro factum est: & humi-
 liauit semetipsum factus obediēs vsque ad mor-
 tem: & qui propter nos egenus factus est, cū
 esset diues: dic mihi ergo, quis ille est qui & ex
 spiritu sancto æditus, & deo obumbrante con-
 ceptus? Alterum absque dubio esse dicis. Duo
 ergo sunt, id est, & ille qui est ex deo patre in
 cælo genitus, & ille qui ex Maria deo inspiran-
 te conceptus. Ac per hoc quartus est hic, quem

introducis: quem intantū cum verbis hominē solitarium dicas, re ipsa solitarium non fuisse confirmas: vt eum etiā si non ita vt debes, tamen & honorabilē & venerandum & adorandum esse fatearis. Ergo cū & adorandus sit vti que dei filius, qui ex patre natus: & adorandus qui per spiritum sanctū ex Maria procreatus: duos ergo & honorabiles tibi & venerabiles facis, quos intantū à se diuidis, vt peculiariter suo quenque honore venereris. Ac per hoc intelligis, quòd negando ac separando à se filiū dei, totum quantum in te est sacramentum diuinitatis euertis. Dum enim quartam in trinitate personā conaris inferere, vides te totā trinitatem penitus denegasse. Quę cū ita sint: negans ergo vnum Iesum Christum filiū dei, negasti omnia. Nam & hæc ratio ecclesiastici sacramenti, & catholicæ fidei est: vt qui partē diuini sacramenti negat, diuini partem non valeat confiteri. Ita enim sibi connexa & cōcorporata sunt omnia, vt aliud sine alio stare non possit: & qui vnum ex omnibus denegauerit, alia ei omnia credidisse non profit. Itaq; si negas deum dominū Iesum Christum, necesse est vt filium dei denegans, etiam patrem neges. Quia iuxta ipsius patris vocem: Qui non habet filium, nec patrem habet: qui autem habet filium, & patrem habet. Negans ergo genitū, etiam genitorem negas. Negans quoque filiū dei in carne natum, consequēs est vt etiam in spiritu natum neges: quia idem nat⁹ in carne,

qui prius natus in spiritu. Non credēs ergo in carne æditum, necesse est etiam passum esse nō credas. Non credens autem illius passionem, quid reliquum est, nisi etiam resurrectionē neges? quia fides suscitati ex fide mortui est. Nec stare potest ratio resurrectionis, nisi fides mortis antē præcesserit. Negās ergo passum & mortuum, negas quoque ab inferis resurgentem. Consequens utique est, ut neges etiam ascendentem: quia ascēsis sine resurrectione esse nō potuit. Et qui resurrexisse non creditur, necesse est nec ascendisse credatur, dicente apostolo: Qui enim descendit, ipse est & qui ascendit. Ergo quantū in te est, dominus Iesus Christus neque ab inferis resurrexit, neque cælum ascendit, neque ad dexteram dei patris sedet, neque ad illum qui expectatur examinationis ultimæ diem veniet, nec viuos ac mortuos iudicabit. Intelligis itaque ô infœlix & furiosa peruersitas, euacuasse te penitus omnem symboli fidem, omnem spei sacramentique virtutem. Et in ecclesia insuper stare ausus es, & esse te sacerdotem putas: cū illa omnia denegaue-
ris, per quæ sacerdos esse cœpisti. Redi ergo ad viam rectam: recipe sensum pristinum: resipisce tandem si aliquando sapuisti. Regredere ad temetipsum, si tamen habuisti in te quondam aliquid quo nūc regrediaris. Agnosce sacramēta salutis tuæ, per quæ innouatus, per quæ renatus es. Non minus tibi nūc opus sunt quā tūc fuerunt: ut te per pœnitentiā nunc rege-

Ephe. 4

nerent, quę per fontem antè generarunt. Tene plenum symboli ordinē: tene perfectam fidei veritatem. Crede in deum patrem, crede in filium deum: in vnum genitorem, & vnum genitum, & eundem tamen vnigenitum & primogenitum, dominum omnium Iesum Christum, homouision patri: natum in deitate, natū in corpore: duplicis quidem natiuitatis, sed vnus maiestatis. Qui creator omnium creaturarum, idem fuerit natus ex patre, qui postea natus ex virgine. Hoc enim quod ex carne atque in carne venit, ortus eius fuit, non immutatio: & natus tantum est, non demutatus.

Quia licet in forma dei manens, formam serui assumpserit, infirmitas tamen habitus humani non infirmauit naturam dei: sed incolumi utique atque integra diuinitatis virtute in carne hominis totum quod actum est, profectus fuit hominis, non defectio maiestatis. Nam cū æditus in carne humana deus est, nondum est in carne natus: ne deus in se maneret, sed vt deo in se manente homo deus esset. Et ideo Maria cum carnalibus oculis hominem cerneret, spiritalibus tamen deum confitebatur, dicēs: Vti que domine, ego credidi quia tu es Christus filius dei viui, qui in mundum venisti. Ideo Petrus reuelante spiritu sancto, cū extrinsecus filiū hominis aspiceret, dei tamen filium prædicabat, dicens: Tu es Christus filius dei viui. Ideo Thomas cū carnem tangeret, deum tetigisse credebat, dicens: Dominus meus & deus

Ioan. 11

Mat. 16

Ioā. 20.

meus. Vnū enim Christum omnes confitebantur, ne duos facerent. Hunc ergo crede: & ita crede dominum omnium Iesum Christū, vni-
 genitum & primogenitum, eundem rerū crea-
 torem, quem hominum conseruatorem: eundē
 prius conditorem totius mundi, quem postea
 redemptorem generis humani. Qui cum pa-
 tre atque in patre permanens, hominibus pa-
 tri: & iuxta apostolum, formam serui accipiēs,
 humiliavit se vsque ad mortem, mortem autē
 crucis: & iuxta symbolum, natus est ex Maria
 virgine, crucifixus sub Pontio Pilato, & sepul-
 tus. Et tertia die resurrexit secundum scriptu-
 ras, & in cælum ascendit: & iterum veniet iu-
 dicare viuos & mortuos. Hæc est enim fides
 vestra: hæc est salus vestra: deum ac dominum
 Iesum Christum, eundem & ante omnia cre-
 dere, & post omnia. Quoniā, vt scriptū est, Ie-
 sus Christus heri & hodie, ipse & in secula. In Heb. 13.
 heri enim omne præteritum tempus ostendit,
 in quo ante principium natus à patre est.
 In hodie autem seculi istius sapientiæ, in quo
 rursus ex virgine natus est, passus est, resur-
 rexit. In eo vero quòd ipse in secula dicitur, om-
 nis futura æternitas & immensitas designa-
 tur. Sed dicis forsitan: si eundem in fine tem-
 porum natum dicam ex virgine, qui ante om-
 nia natus fuerit ex deo patre, carneum me
 etiam ante mundi initia deum dicere: qui ip-
 sum dicam postea hominem, quem semper de-
 um: ac per hoc hominem illum qui natus sit,

postea semper fuisse . Nolo te hac ignorantia^e cecitate atque hac errorum nocte confundi, vt putes me hominem qui ex Maria nat⁹ est, ante exordia rerum asserere, & deum etiam ante principia m^udi semper corporeum prædicare. Non ita inquam, non ita dico: quòd priusquã nasceretur, homo in deo fuerit: sed quòd postea in homine natus deus sit. Non enim caro illa quæ ex carne virginis nata est, semper fuit: sed deus qui semper fuit, ex carne virginis in carne hominis aduenit . Verbum enim caro factum, non carnem secum exhibuit, sed carni se hominis dignatione diuinitatis vniuit. Dic enim mihi, quando, vel vbi verbum caro factū est, aut vbi exinaniuit semetipsum formam serui accipiens: aut vbi egenus factus est, cum esset diues? nisi in illo sacro virginis vtero: vbi dum incarnatur, verbū dei caro dicitur factū: dum æditur, formā serui in veritate suscepit: cum humana conditione patibulo affigitur, fit egenus: & pauper redditur passione carnali, cū esset maiestate diuina diues. Alioquin, si vt ipse ais, post hæc in eum vt in vnum prophetarum atque sanctorum diuinitas venit: ergo & in illis in quibus habitare dignatus est, verbum caro factum est: ergo per vnumquēque illorum, exinaniuit semetipsum formam serui accipiens. Ac per hoc nihil nouum nec præcipuum in Christo factum est, nihil singulare, nihil mirabile nec conceptio ipsius habuit, nec natiuitas, nec mors. Et tamen vt ad superiora

redeamus: cū hæc ita sint omnia, sicut diximus: quomodo Iesus Christus, quem cū hominem tantummodo esse asseris, etiam antequā ex virgine nasceretur, semper fuisse legitur, & a prophetis atque apostolis dei etiam ante secula prædicatur? dicente Paulo: Vnus dominus Iesus, per quem omnia. Sed & alibi: Quo-
1. cor. 8
Colos. 1
 niam in Christo, inquit, creata sunt omnia in cælis & in terra, visibilia & inuisibilia. Symbolum quoque & humana pariter & diuina auctoritate contextum: Credo, inquit, in deum patrem, & in deum Iesum Christum filiū eius vnigenitum & primogenitum totius creaturæ. Et post alia: Deum verum ex deo vero: per quem & secula compaginata sunt, & omnia facta. Et item: Qui propter nos venit, & natus est ex Maria virgine, & crucifixus, & sepultus. Quomodo ergo cū ipsa confessione nostra ante virginis partum atque conceptum dominicus homo omnino non fuerit, Christus tamē, qui à te homo solitarius dicitur, deus in scriptis sanctis sine exordio prædicatur? & tanta hominis ac dei vnitas legitur, vt & homo deo semper antè coæternus, & postea homini deus compassus esse videatur? Cū vtique nec ininitabilis homo, nec passibilis deus credendus sit esse. Illud est vtique quod iā superioribus scriptis testati sumus, quod vnitus homini, id est, suo corpori deus, nullā fieri patiatur inter hominem ac deum humana opinione distātiā. Nec admitti omnino voluit, vt alius à quoquā

filius hominis, alius filius dei crederetur. Sed ita omnibus scriptis sacris dominicum hominem connectit deo atque concorporat, ut nec in tempore admodum hominem is à deo, nec in passione possit deum ab homine discernere. Si enim ad tempus respicis, inuenies semper filium hominis cum filio dei. Si ad passionē, inuenies semper cum filio hominis dei filium: ita scilicet vnitum & indiuiduum sibi Christum filium hominis, ac dei filiū, ut quantum ad vocem diuinæ scripturæ pertinet, nec homo separari à deo tempore, nec ab homine deus omni

Ioan. 3. no valeat passione. Hinc enim illud est: Nemo ascendit in cælum, nisi qui de cælo descendit filius hominis, qui est in cælo. Vbi cum filius dei loqueretur in terris, filium esse hominis testabatur in cælis, & eundem filium hominis quē ascensurum dicebat in cælum, descendisse quo

Ioan. 6. que antea testabatur è cælo. Vel illud: Si videritis filium hominis ascendentem vbi erat prius: cum eum qui ex homine natus est nominet, in supernis tamen semper fuisse testatur. Sed & apostolus, si ad tempus respicitur per Christū

1. cor. 8 oīa prædicat: Vnus enim, inquit, dñs Iesus Christus, per quem omnia. Si autem ad passionem maiestatis, dominum crucifixum esse de-

1. Cor. 2 signat. Si enim, inquit, cognouissent, nunquam dominum maiestatis crucifixissent. Et ideo etiam symbolum vnigenitum & primogenitum dominum Iesum Christum deum verum ex deo vero, hominison patri: & creatorem

omnium dicens , natum ex virgine , & crucifixum , postea & sepultum esse testatur. Ita incorporans scilicet dei & hominis filium , & vniens hominem ac deum , vt nec in tempore fieri vlla valeat , nec in passione diuisione. Cùm idem vtique dominus Iesus Christus , & per æternitatem temporis deus , & per tolerãtiam passionis homo esse doceatur : ac scilicet nec homo ininitiabilis , nec deus passibilis dici debeat . In vno tamen domino Iesu Christo & homo antè perpetuus , & deus mortuus prædicatur. Vides ergo quòd Christus omnia est , & nomen illius significatio vtriusque naturæ : quia & homo & deus natus : ita & in se cuncta complectitur , vt in eius nomine nihil deesse noscatur . Non ergo ante partum virginis eadem in præterito eternitas hominis quæ dei : sed quia in vtero virginis vnitus est deus homini , factum est vt in Christo omnino non possit alterum sine altero nominari. Quicquid ergo de domino Iesu Christo dixeris , totum dicis : & in dei filio filium hominis , & in hominis filio dei filium nuncupabis : tropo scilicet synecdoches , quo & à parte totum intelligitur , & à toto portio nominatur. Docentibus id vtique etiam scriptis sacris : in quibus dominus sæpe hoc tropo vtens , dū de aliis sic docet , sic etiam de seipso voluit intelligi . Neque enim in diuinis voluminibus aliter vel dies interdū , vel res , vel homines , vel tēpora designantur. Sicut illud , quòd quadringentis Israellem

annis seruiturum Aegyptiis deus prædicat, dī
Gen. 15. cens ad Abrahā: Sciens scito, quia peregrinum
erit semen tuum in terra non sua: & seruituti
eos subiicient, & affligent eos annis quadrin-
gentis. Cū si, omne tempus ex quo deus locu-
tus est, consideretur, plus sint quàm quadrin-
genti: si autem illud tantum quo seruierūt, mi-
nus. Quod scilicet tempus nisi hoc tropo intel-
ligatur, mentitus forsitan, quod absit à Chri-
stianis sensibus, dei sermo videatur. Sed dū vti
que à tempore diuinæ vocis & totū vitæ tem-
pus annos plus quàm quadringentos, & serui-
tutis minus multò quàm quadringētos habet:
ita fit, vt vel à toto pars, vel à parte totum va-
leat intelligi. Non dissimilis quoque etiam de
diebus interdum ac noctibus significatio est:
vbi cum in vtroque tempore vnus dies intelli-
gatur, in parte vnus temporis tempus vtrūq;
monstratur. Hoc siquidem modo etiam illud
quod de tempore dominicæ passionis obscurū
videtur, aperitur. Cū enim sub exemplo Ionę
prophetæ futurū filium hominis dominus in
corde terre tribus diebus & tribus noctibus ef-
se prædixerit: & post sextam sabbati, qua cru-
cifixus est, nō nisi vna tantū apud inferos die,
& duabus noctibus fuerit: quomodo diuini ser-
monis veritas inuenitur? Tropo scilicet synec-
doches, id est vt ad diē qua crucifixus est, nox
præterita: & ad noctem qua resurrexit, dies fu-
tura referatur; ac sic additis & nocte quæ præ-
cessit diē suę, & diē qui subiectus est nocti suę,

nihil defuisse integro tēpori noscitur, quod à
 fui parte impletur. Scatēt his rationibus exē-
 plis scripturæ sacræ: sed longum est vnīuersa
 memorare. Sic enim dicente psalmo: Quid est *Psāl. 8.*
 homo q̄ memor es eius? à parte totū intelli-
 gitur, dum vno homine nuncupato plenitudo
 humani generis demonstratur. Sic etiam illud
 vbi Achab peccauit, peccasse plebs dicitur: dū
 vniuersitate appellata, à toto portio designa-
 tur. Ioannes quoq; p̄cessor domini, Post me, *Ioan. i.*
 inquit, venit vir, qui ante me factus est: quia
 prior me erat. Quomodo igitur post se vētu-
 rum indicat, quem ante se fuisse designat? Si
 enim de homine hoc qui postea natus est intel-
 ligitur, quomodo ante ipsum fuit? Si de ver-
 bo, quomodo vir post me venit? nisi quòd in
 vno dño Iesu Christo & posteritas hominis,
 & verbi antiquitas demōstratur. Ac sic fit, vt
 vnus idemq; dñs ante illū & post illū venerit:
 quia & secūdum carnem est Ioanne posterior,
 & secundum diuinitatem omnibus prior. Et
 ideo ille virū tātummodo nominās, & homi-
 nem demōstrauit, & verbū: quia cum dominus
 Iesus Christus filius dei, & homine cōsumma-
 tus fuerit & verbo, vnum de eo dicens omnia
 demōstrauit. Et quid plura? Dies me, vt reor,
 deficiat, si omnia quæ de hoc dici possunt, col-
 ligere aut enarrare tētauerō. Et satis hæc quæ
 nunc diximus, in hac negotii parte duntaxat,
 & ad symboli sunt expositionem, & ad causæ
 officium, & ad libri modum.

IOANNIS CASSIANI
de incarnatione domini,
liber septimus.



Vod euenire his so-
let qui cum pelagus
iā euaserint, aut præ-
tentas portibus syr-
tes, aut vicina litori-
bus saxa formidant:
mihi hoc admodum
accidit, vt reseruatis
ad vltimum quibus-

dam hæreticorum calumniis, cum iam ad ex-
acti laboris terminum venerim, cum ipsum fi-
nem incipiam metuere, ad quem desiderau-
eram peruenire. Sed vt propheta ait: Dominus
mihi adiutor est, non timebo quid faciat mihi
homo: non timeamus prætentas hæreticorum
insidiantium foueas, & obseptas spinis passim
horrentibus vias: quæ cum asperent magis iti-
nera quàm claudant, de emundatione nobis
potius labor, quàm de possibilitate formido.
Quia cum nobis agentibus rectum iter infir-
miter se obiciant, & horreant ambulantibus
magis quàm obsint: plus habet officium atq;
opus nostrum in purgatione quod agat, quàm
ex difficultate quod timeat. Igitur ad mon-
struosum illud lethiferi serpentis caput mittē-
tes manum, & pertractare omnia admodum il-

ligata ingentibus spiris tortuosi corporis mē-
 bra cupientes: te, quem semper precati sumus,
 etiam atque etiam domine Iesu precamur: vt
 des nobis verbū in apertione oris ad destruē-
 das omnes munitiōum cogitationes, & om-
 nem altitudinē extollentem se aduersum sciē-
 tiam dei: vt captiuemus omnem intellectum
 in obedientia tua: quia vere ille liber fit, qui
 cœperit tibi esse captiuus. Adesto ergo tu of-
 ficio tuo operi, tuis pro te supra mensuram vi-
 rium connitentibus. Da hiantia noui serpen-
 tis ora, & tumentia lethalibus venenis colla
 conterere: qui facis supra serpentes & scorpio- *Luc. ii.*
 nes illæfos credentium pedes ingredi, ac super
 aspidem & basiliscum ambulare, & conculca- *Pf. 90.*
 re leonem & draconem. Tribuasque per in-
 trepidam innocentiaē constantis audaciam, vt
 delectetur infans ab vbere super foramine a- *Es. 4. ii.*
 spidis: & in cauernam reguli, qui ablaetatus
 fuerit, manum suam mittat. Da ergo & nobis
 in cauernas huius immanissimi ac scelestissi-
 mi reguli, innocuas manus mittere. Et si in fo-
 raminibus quibusdam iam, id est in sensu hu-
 manorum latebris aut cubile habuit, aut oua
 posuit, aut squamosi tractus semitam dereli-
 quit: aufer ab vniuersis perniciosissimi anguis
 sordidum & fendale contagiū. Extrahe illatas
 perfidię immūditias: & obfessas redolēti cœno
 animas ventilabro sacre purgationis emunda:
 vt speluncæ latronum domus orationum sint.
 Et in quibus nunc, vt scriptum est, diuersorū *Es. 34.*

ericii & onocentauri, & pilosi, & diuersorum prodigiorum monstra versantur: in his sancti spiritus dona, id est fidei ac religionis decora respondeant. Ac sicut eiectis quondam idolorum cultibus, exterminatisque simulachris, fecisti ex phanis dæmonum templa virtutum: inferens in cauernis serpentum & scorpionū, fulgentis luminis radios: & ex ouilibus errorum ac turpitudinum, domus ornamentorum ac pulchritudinū reddidisti: Ita omnib⁹ quorum oculos caligo hæreticæ peruersitatis obsedit, lucem misericordiæ tuæ ac veritatis infunde: vt incarnationis tuæ magnum ac salutiferum sacramentum tandem ac puro lumine contuentes, ita te ex sacrosancto illo immaculato virginis vtero æditum mundo verum hominem esse intelligāt, vt verum tamen deum semper fuisse cognoscāt. Ac priusquam de his rebus loqui incipio, quas necdum libris superioribus prælibaui, æquum arbitror adnitar exoluere quæ iam ante promisi: vt expleta penitus expositione, liberius de intactis dicere ordiar, cum de pollicitis satisfecero. Ait ergo ad destruendam sacre natiuitatis fidem sibilans in dei ecclesia nouus coluber: Nemo anteriorem se parit. Primum ergo te non solum quid dicas, sed etiam vnde dicas nescire arbitror. Si enim scires aut intelligeres vnde diceres, nequaquam vnigeniti dei natiuitatē mortalis opiniunculæ ratione censeris: neq; ei qui extra conceptum humanæ originis natus est,

humanis definitiunculis præiudicare tentares: aut terrenas impossibilitates diuinæ omnipotentiae obiiceret, si deo impossibile nihil esse cognouisses. Nemo ergo, inquit, anteriorem se parit. Dic mihi quæso, de quibus te loqui cauis, de quorum animatum æstimas definire naturis? hominibus te an feris, auibus an pecudibus legem ponere putas? Ista enim sunt & alia huiusmodi, de quibus hæc dici possunt. Nemo enim ex his anteriorem se gignere valet: quia ea quæ orta iam fuerint, redire in id rursum non queunt, ut noua creatione generentur. Et ideo nemo anteriorem se parere, quoniam nec anteriorem gignere potest. Vnde venit causa pariendi, nisi ex possibilitate generandi? Tu ergo id in natiuitate omnipotentis dei, quod in ortu terrenorum animalium considerandum putas? & ei naturam humanæ conditionis obiicis, qui est autor ipse naturæ? Vides ergo, ut supra dixi, nescire te vnde aut de quo dicas: qui facturas factori comparas: & ad æstimandam dei omnipotentiam earum rerum exemplo vteris, quæ ipse utique non essent, nisi id ipsum ex deo essent quod sunt. Deus ergo ut voluit, & quando voluit, & ex qua voluit aduenit. Nec tempus ei, nec persona, nec consuetudo hominum, nec exempla rerum præiudicarunt: quia obistere ei non potuit lex creaturarum, qui est creator ipse cunctorum. Et posse ei quod voluit promptum fuit: quia potestas adfuit voluntati. Vis scire aliqua-

creationes respicis, vel maxime ita euenit. Sin autem ad ortū dei, quid in natiuitate eius naturæ exēpla cōsideras? quia constitutiones cōstitutori sunt obnoxie, non constitutionibus cōstitutor. Vis autem plenius scire, quàm non solum impiæ, sed etiam ineptæ sint hæ calumniæ tuæ, & non videntis penitus dei omnipotentiam? Dic mihi quæso tu, qui non nisi ex paribus paria nasci putas: vnde inexplicabilis illa quondā in eremo coturnicum innumero- Num. 11. sitas ad pastum Israeliticę plebis repente nata sit? Non enim eas antè in aliquo loco genitricibus suis æditas, sed subito aduentu legimus illatas. Cibus deniq; ipse ille cēlestis, vnde per Exo. 16. quadraginta annos in Hebræorum castra defluxit? nunquid mannam manna generauit? Sed hæc de vetustis rerum miraculis: quid de nouis? Paucis panibus ac pisciculis innume- Mat. 14. ras populorum sequentium turbas in eremo Et 15. non semel paut. Satietatis ratio in cibis non fuit: quia esurientes causa inuisibilis & arcana saturauit, qua causa ac etiam miraculo natum in Galilæa vinum de aquis legimus. Dic mihi, Ioan. 1. quomodo disparem à sui qualitate substantiam dispar natura generauit? præsertim cum id quod dominicæ natiuitati maxime conuenit, nobilioris admodū rei ortus ex inferiore pcesserit. Dic mihi quomodo ex illa aquæ simplicitate egregi⁹ vini & admirabilis sapor nat⁹ sit? quomodo aliud sit haustū, aliud infusum? Nunquid cisterna illa vel puteus hanc naturam

habuit? cum plus multò superfuerit quàm satis etiam fuerit esuritioni. Qua ratione hoc totum est, vt cum satietatem edentes caperēt, augmentis ineffabilibus cibis ipse dehisceret, vt aquas ex se sumptas in optima vina mutaret? Aut nunquid vasorum id qualitas, aut ministrorum egit industria? nihil vtique horū.

Et quomodo facti ratio cogitatione cordis non comprehenditur: cum facti tamen veritas

Ioan. 9. conscientiae firmitate seruetur? Cæco super oculos in euangelio lutum positum est, & oculi abluto nati sunt. Nunquid aut aqua hanc naturam habuit, vt oculos pareret? aut lutum, vt lucem crearet? nihil vtique horum, præsertim cum aqua cæco nihil conferat, lutum autē vidētibus etiam obesse possit. Et quomodo res nocendi vim in se habens, officium remedii ac salutis exhibuit: & quæ obesse sanis solet, quasi ministra tunc sanitatis fuit? Dicis itaq; dei hanc tribuisse virtutē, dei præstitisse medicinam: & omnia hæc quæ diximus, omnipotentiam penitus effecisse diuinam: qui potens sit vtique ex solitis noua condere, & ex contrariis salubria constituere: & ea quæ in impossibilitatibus atque inefficientiis sitæ sint, in rerum possibilitates effectusque mutare. Idem ergo de ortu ipsius domini, quod de rebus omnibus confitere. Crede deum natum vt voluit, quem non negas potuisse quod voluit: nisi forte virtutem quæ ei ad alia omnia adfuit, ad seipsum æstimas defuisse: & ipsi ad

natiuitatem suam omnipotentia sua defuit, quæ ab eo procedens vniuersa penetrauit. Tu mihi in natiuitate domini obiicis: nemo anteriorem se parit:& in partu quo omnipotens deus natus est, dicis: hominibus parienti debet esse natiuitas: quasi vero cum quolibet hominum humanis legibus agas, cui impossibilitatem suam obiicias, quem terrena infirmitate concludas. Communem omnium dicis conditionem esse nascendi, eandem legem esse generandi: non potuisse penitus in vniuersitate generis humani vni tantum homini cōtingere, quod vetuerit deus omnibus prouenire. Non intelligis de quo dicas, non vides de quo loquaris: quia vetus vtique omnium conditio, & cunctarum lex naturarum est, per quem est & quicquid homo potest: quia ipse vtriusque rei penitus modum statuit, & vsque quo accederet facultas, & quod vltius non progrediretur infirmitas. Quàm insanè ergo tu ei impossibilitatem humanā obiicis, cui possibilitas ipsa debetur. Si personā domini terrenis infirmitatibus æstimes, & omnipotentiam dei humanis rationibus metiaris: nihil vtique quod secūdum corporeas ipsius passionibus deo congruum videatur inuenies. Si enim verisimile videri potest, vt Maria anteriorem se deum parere non quiuerit: quomodo verisimile erit quod crucifixus ab hominib⁹ deus fuerit? & tamen idem qui crucifixus est deus ipse prædixit: Si adfiget homo deum suū, quia Mala. 3.

vos adfigitis me? Si ideo natus ex virgine dominus non putabitur, quia anterior parienti fuerit qui nascebatur: quomodo deus sanguinem habuisse creditur? & tamen ad presbyteros Ephesiorum dicitur: Regite ecclesiam dei, quam acquisiuit sanguine suo. Postremo quomodo autor vitæ priuatus vita existimabitur? Et tamen Petrus: Autorem, inquit, vitæ interfecistis. Nemo in terris sit⁹, in cælis esse potest: & quomodo dominus ipse dicit: Filius hominis qui est in cælo? Si denique ideo natum ex virgine deum non putas, quia hominifios parienti debet esse natiuitas: quomodo res dissimiles ex dissimilibus crediturus es substituisse naturis? Ergo apud te nec coturnices subito ventus intulit, nec manna decedit, nec vinum ex aqua prodiit, nec multa milia hominum exiguo cibo pasta sunt, nec post lutum cæco lumen apparuit. Quod si hæc omnia incredibilia utique & contra rationem videntur, nisi à deo facta credantur: cur in natiuitate eius denegas quod in operibus confiteris? Aut nunquid præstare ortui suo aduentuique non potuit, quod humanis remediis atque vtilitatibus non negauit? Longum est de hac re & propè fabulosum amplius dicere. Sed tamen ad confutandam ineptiam atque insaniam tuam, qua ais quod hominifios parienti natiuitas esse debeat: id est quod dissimilia sibi quolibet parere non possint: etiam terrenarum rerum exempla proferam, quo ex dissimilibus

nasci multa conuincam. Non quòd in tali re
 comparatio vlla aut fieri possit, aut esse de-
 beat: sed vt non dubites in sacro ortu existere
 id potuisse, quod etiam in terrenis his & ca-
 ducis videas prouenire: Apes sicut minima
 admodum, ita prudentissima ac solertissima
 animalia, ex diuersissimis ædi legibus atque
 exire naturis. Cum enim sint miri Ingenii a-
 nimantia, & non solum sensu; sed etiam pru-
 dentia abundant, excerptis quibusdam her-
 barum floribus procreatur. Quod maius exē-
 plum adhibendum, aut assumendum putas? ex
 atomis animalia nascuntur. Qui opifex illic,
 qui fabricator est, qui formator corporum, qui
 inspirator animarū? Sonum deniq; ipsum quo
 inter se quasi loquūtur, quis dedit? Concinnit-
 tatem pedum, artem oriū, elegantiamque pin-
 narum quis finxit, atque cōposuit? Ingenium,
 iram, prouisionem, motū, placiditatem, cōcor-
 diam, dissensionem, bella, pacem, ordinationē,
 dispositionem, officia, principatus, omnia de-
 nique quæ sunt illis quasi cū humano gene-
 re communia, cuius doctrinā, aut cuius mune-
 re, quo imbuente, aut quo instituyente sumpse-
 runt? Nunquid hoc à paterno semine indeptæ
 sunt? aut in genitali vtero, atq; in materna car-
 ne didicerunt? Nec vterum vtiq; norunt, nec
 semen sciunt: depasti tantummodo flores in
 aluearia congeruntur: ex quibus inæstimabili
 opificio apes exeunt. Nihil illic genitricū vi-
 scera prolibus cōferunt: neque apes ex apibus

æduntur: operariæ sunt tantum, non procreatrices: ex herbarum flosculis animantia prodeunt: quid simile herbis & animantibus? quis fabricator igitur rerum istarum sit credo intelligis. Nunc & ambige an potuerit natiuitati suæ dominus id tribuere, quod vides eum etiam facturis minimis præstitisse. Superfluū fortè sit post hæc talia addi aliquid: sed tamen etiam non necessaria ad exemplum addantur ad cumulum. Locustis repente subtexi aera, impleri terras videmus. Prode earum semina, prode ortus, prode generatrices. Inde enim, vt vides, exeunt vnde nascuntur. Præscribe his rebus omnibus, quod homousios parienti esse natiuitas sua debeat. Et tam inuenieris in præscriptionibus his ridiculus, quàm nunc es in neganda domini natiuitate furiosus. Et quid post hæc? Nunquid progredi nos debere vltra vel tu ipse existimas? Adhuc addimus tamen aliquid: ex ouis volucrū, quas in Aegypto ibes vocant, basiliscos serpentes gigni indubitabile est. Quid cognatum & consentaneum aui atque serpenti? Cur homousios parienti natiuitas sua non est? Et tamen hæc omnia nec gignentes agūt, nec nascentes sciūt: sed fiunt latentibus causis inexplicabili quadam atque multiplici gignentis lege naturæ. Et tu eius natiuitati terrenarum opinionum præscriptiunculas obiicis, qui ne earum quidem natiuitatum rationem reddere potes, quæ nutu ipsius ac præceptione nascūtur: cu-

ius arbitrium totum agit: cuius imperium totum efficit: cui nihil contraire, nihil obsistere potuit: & ad totum quod possibilitate agendum erat, velle sufficit. Sed tempus tādē est vt reliquas etiam occultiores atque insidiosiores blasphemias tuas, quia quod maluissimus, iam ignorare non possumus, saltem ne ignorantes capiant, detegamus. Posuisti in quodam pestifero tractatu tuo dicens: Quoniam diuinæ naturæ imago est homo: hāc autem proiecit diabolus in corruptionem: doluit sicut pro imagine sua deus, sicut pro statua sua imperator, & corruptam reparat imaginem, & sine semine formauit de virgine naturam, secundum illum qui sine semine nascitur Adam, & per hominem humanam naturā suscitāt: quoniam per hominem mors, ideo & 1. cor. 15 per hominem resurrectio mortuorum. Venericorum quorundam, vt aiunt, consuetudo est: vt in poculis quæ conficiunt, venenis mella permisceant: vt dulcibus nocitura celentur: & dum quis mellis dulcedine capitur, veneni peste perimatur. Ita ergo & tu dicens: diuinæ naturæ imago est homo: hanc autem proiecit diabolus in corruptionē: doluit sicut pro imagine sua deus, sicut pro statua sua imperator: ora quodammodo poculi pestilentis dulcedine quadam, & quasi melle circumlinis: vt haurientes ingestum poculum homines, dum illecebrosa degustant, perniciofa non sentiant. Dei nomen obiicis, vt religionis nomine mē-

tiaris: sancta permittis, vt peruersa persuadeas,
& confitendo deum id efficias, vt eum ipsum
neges quem confiteris. Quis enim non videt
quo eas, quid moliaris? Dicis quippe: doluit si-
cut pro imagine sua deus, sicut pro statua sua
imperator, & corruptam reparat imaginem, &
sine semine formauit de virgine naturam: se-
cundum illum qui sine semine nascitur Adam,
& per hominem humanam naturam suscitatur: quo-
niam enim per hominem mors, ideo & per homi-
nem resurrectio mortuorum. Hoc ergo tanto stu-
dio, hoc tanto actu praelocationibus blandis
fallax insidiator egisti: vt deum in praecedentibus
nominans, ad hominem in consequentibus perue-
nires: & eum ipsum solitarii hominis contume-
lia post afficeret, cui subdolae humilitatis offi-
cio honorem dei antea detulisses. Dicis ergo quod
imaginem dei, quam diabolus proiecerit in cor-
ruptionem, pietas diuina repararit. Corruptam,
enim inquis, reparat imaginem. Iam hoc quam
subdole quod ais, corruptam reparat imaginem:
scilicet vt persuadeas nihil plus fuisse in eo in
quo imago reparatur, quam in ea ipsa imagi-
ne fuerit cui reparatio prestabatur. Ac per hoc
idem tantummodo vis esse dominum quod Adae:
nihil plus imaginis reparatorem, quam ipsam
imaginem corruentem. Denique quid agas, quid
moliaris, sequentibus probas, dicens: Sine se-
mine formauit naturam secundum illum qui
sine semine nascitur Adam: & per hominem
humanam naturam suscitatur, Similem in om-

nibus & parem Adæ dominū Iesum fuisse as-
 feris: illū vtique sine semine, & hūc sine semi-
 ne: illum hominem solum, hunc hominem so-
 litarium. Ac per hoc vides te diligenter cauif-
 se ac prospexisse, ne dominus Iesus Christus
 aut maior in aliquo Adamo, aut fortè melior
 putaretur: cum ita eos sibi mensuris paribus
 comparaueris, vt derogaturum te quodāmodo
 Adæ aliquid crederes, si ei deū quippiam præ-
 tulisses. Quoniam enim inquis, per hominem
 mors, & ideo & per hominē resurrectio mor-
 tuorum. Etiam apostolico testimonio peruer-
 sitatem tuam ac scelus probare niteris, & cō-
 tagione impietatis tuæ vas electionis infā-
 mas: videlicet vt quia à te autor salutis tuæ
 nō intelligitur, idcirco etiam apostolus deum
 negasse videatur. Et tamen si apostolicis te-
 stimoniis vti placebat, cur vno eius contentus
 cuncta siluisti? & hoc non subdidisti statim:
 Paulus apostolus non ab hominibus neque *Gal. 1.*
 per hominem, sed per Iesum Christum. Aut il- *1. cor. 2.*
 lud: Sapientiam loquimur inter perfectos. Et
 post alia: Quā nemo, inquit, principum seculi
 huius cognouit. Si enim cognouissent, nun-
 quam dōminum maiestatis crucifixissent. Vel
 illud: Quoniam in ipso habitat omnis ple- *colos. 2.*
 nitudo diuinitatis corporaliter. Et: Vnus do- *1. cor. 8.*
 minus Iesus Christus, per quem omnia. An in
 parte apostolū probans, in parte reprobans, in
 eo tātum cum recipis, in quo pro dispēfatione
 hominem Christum nominat: in eo repudias,

in quo deum? Paulus enim hominē Iesum non negat: sed deum tamen eundem hominem cōfitemur: & ita humano generi per hominem resurrectionem venisse prædicat, vt in homine tamen ipso deum resurrexisse confirmet. Vide enim an eum qui resurrexerit, deum prædicet: qui eum qui crucifixus est, deum maiestatis esse testatur. Sed tamē ne dominum Iesum quasi vnum de plebe crederes, dedisti ei aliquid dignitatis, tribuens ei honorem vt sancto homini, nō diuinitatē vt vero homini ac vero deo. Quid enim dicis? Formauit deus dominicam incarnationem: theotoci formam honoremus cum deo, sicut vnam formam deitatis, sicut diuinę voluntatis inseparabilem statuam, sicut imaginem latentis dei. Superius imaginē dei Adam esse dixisti, hic Christum imaginem dicis: illum statuam, & hunc statuam. Sed gratię videlicet tibi pro honore dei agēde sunt, quod theotoci formam honorandam cum deo esse concedis: in quo non tam honor est quā in iuria. Neque enim in hoc ipso tribuis domino Iesu Christo honorem diuinitatis: sed negas subtili quidem impietatis arte. Honorandum cum deo dicis, ne deum esse fatearis: & hoc ipso quo videris eum fallaciter coniunxisse, disiungas. Nam cum vtique eum non vt deum colendum, sed quasi cum deo honorandum esse blasphemēs: ideo ei tribuis diuinę vicinitatis coniunctionem, vt deitatis auferas veritatem. Impiissime & callidissime hostis dei, peragere

vis scelus negantis, quasi sub nomine confiten-
tis. Honoremus, inquis, sicut diuinæ volunta-
tis inseparabilem statuam, sicut imaginem la-
tentis dei. Profecit videlicet apud nos per be-
neficia sua honor creatoris, ac redemptoris no-
stri domini Iesu Christi. Si ideo ab eo de æter-
no interitu redempti sumus, vt redemptorem
nostrum statuam diceremus: digno videlicet
obsequio, digno cultu respondere benignita-
ti ac pietati illi^o nitimur, si maiestatem quam
ille propter nos humiliare nō renuit, nos etiā
auferre conemur. Sed excusas videlicet illatā
domino contumeliam subditi honoris officio,
dicens, tanquam imaginem latētis dei. In hoc
quod imaginem dicis, humanę eum comparas
conditioni. In hoc quod latentes dei, certissi-
mæ derogas trinitati. Deus enim, inquit Da- Ps. 49.
uid, manifestē veniet, deus noster & non sile-
bit. Et venit utique, & non siluit, qui priusquā
ipse quippiam post ortum suum diceret, aduē-
tum suum & terrenis pariter, & diuinis testi-
bus declarauit: dum stella indicat, dum magi
adorant, dum angeli adnuntiant. Quid quæris
amplius? adhuc vox illius silebat in terris, &
honor illius iam clamabat in cælo. Latuisse er-
go in cælo, ac latere tu deum dicis? at non hoc
prophetæ, non patriarchæ, nō denique lex vni-
uersa prædixit. Non dicebant enim latitatu-
rum, qui venturum omnibus prædicabant. Er-
ras infœlix cæcitas, causas blasphemandi quæ-
rens, & non inueniens. Tu cum latuisse etiam

post aduentum suum dicis: ego eum nec prius quidem latuisse approbo quàm veniret. Nunquid enim patriarcham illum eximiũ, cui vocabulum visio dei præsens imposuit, quæ ex supplantatoris nomine in Israël nomen ascēdit: nunquid sacramentum nascituri ex virgine dei latuit? qui cū mysterium futurę incarnationis ex concertatione luctantis secum hominis agnouisset: Vidi, inquit, deum facie ad faciē, & salua facta est anima mea. Quid quęso viderat vt vidisse se deum crederet? nunquid inter fulgura se ei & tonitrua deus protulit? aut referato intrinsecus cælo coruscans se ei & facies diuinitatis ostendit? Nihil vtique eorum, sed ediuerso magis vidit hominem, & agnouit deum. O verè dignus indepto nomine, & qui interioribus magis quàm exterioribus oculis vocabuli à deo dati meruit dignitatem. Luctantem secum humanam speciem videbat, & videre se deum protestabatur. Sciebat vtique quòd illa hominis species, dei veritas erat: quia in qua tunc erat specie deus visus, in ea erat speciei ipsius postea veritate venturus. Quanquā quid miremur, si tantus patriarcha indubitanter credidit, quod ei ipse per se deus tam euidenter ostendit, dicente ipso: Quia vidi deum facie ad faciem, & salua facta est anima mea? Quid ei tantum deus præsens diuinitatis ostenderat, vt demonstratam sibi faciem dei diceret? Homo enim ei vt videbatur tantummodo apparuerat, quem in concertatione

superauerat. Sed hoc utique per præcurrentia
 rerum indicia deus agebat: ut nemo esset qui
 deum natum ex homine non crederet; cum in
 humana specie deum iam patriarcha antè vi-
 disset. Sed quid ego in vno exemplo tamdiu
 commoror, quasi multa desint? Nunquid enim
 latere homines iam tum poterat in carne ven-
 turus deus? cum de eo quasi ad omne huma-
 num genus palàm propheta diceret: Ecce de- *Psa. 40*
 us vester. Et alibi: Ecce deus noster. Et illud: *Esa. 25.*
 Deus fortis, pater futuri seculi, princeps pa- *Esa. 9*
 cis, & regni eius non erit finis. Sed & cum
 iam venisset, nunquid latebat eos quòd ve-
 nerat, qui venisse eum palàm confitebantur?
 nunquid ignorabat dei aduentum Petrus, di-
 cens: Tu es Christus filius dei viui? Nunquid *Mat. 16*
 Maria quid loqueretur, aut quem crederet ne-
 sciebat? Utique, inquit, domine, ego credidi *Ioã. 11.*
 quia tu es Christus filius dei viui, qui in hunc
 mundum venisti. Omnes denique qui ab eo vel
 morborum remedia, vel membrorum restitu-
 tiones, vel mortuorum vitam petebant, ab ho-
 minis id infirmitate, an à dei omnipotètia po-
 stulabant? Diabolus denique ipse, cum eum om-
 ni illecebrarum ambitu, omni nequitie sue
 arte tentaret, quid aut nesciens suspicabatur,
 aut tentans scire cupiebat? aut quid tantope-
 re eum mouerat, quòd deum humana in humilita-
 te quærebat? Nunquid documentis prioribus id
 didicerat? Aut què vero in humano corpore deum
 venisse cognouerat? Non utique, sed magnis

signorum indiciiis, magnis rerum experimen-
tis, & veritatis ipsius vocibus ad suspicionem
& inquisitionem rei huius compellebatur: vt-

Ioan. 1.
Mat. 3 pote & qui semel iam à Ioanne audierat: Ecce
agnus dei, ecce qui tollit peccatum mundi. Et
iterum ab eodem: Ego à te debeo baptizari, &
tu venis ad me? Descendens quoque de cælo, &
stans supra caput domini columba, euidentem
se ac manifestandæ claritatî dei indicem dede-
rat. Vox quoque cum non per ænigmata, nec
per figuras à deo missa permouerat, dicens: Tu
es filius me⁹ dilectus, in te complacui. Et ideo
licet hominem extrinsec⁹ in Iesu videret, filiũ

Luc. 4. dei inuestigabat, dicens: Si filius dei es, dic vt
lapides isti panes fiant. Nunquid diabolo con-
templatio hominis suspicionẽ diuinitatis eri-
puit: vt per hoc quòd hominem videbat, crede-
ret deum esse non posse? Non vtique: sed quid
ait? Si filius dei es, dic vt lapides isti panes fiãt.
Non ambigebat vtique esse posse quod an es-
set perscrutabatur: de veritate ei erat sollicitu-
do, non de impossibilitate securitas. Atqui scie-
bat vtique dominum Iesum Christum ex Ma-
ria natum esse, sciebat pannis obuolutum, in
præsepio positum, pauperem eius inter huma-
na exordia paruitatem fuisse, & egenam etiam
legitimis incunabulorũ ministeriis infantiã:
non dubitat quoque cum veram carnem ha-
bere, verè hominem natum esse. Et cur ei hoc
ad securitatem parum visum est? cur eum quẽ
verè hominem esse nouerat, deũ posse esse cre-

debat? Disce ergo infœlix furor, disce infania,
 & crudelis impietas, disce tandem vel à diabo
 lo minoris esse perfidiæ. Ille dixit, si filius dei
 es: tu dicis, filius dei non es. Quod ille inter
 rogauit, tu negas. Nemo adhuc inuēt⁹ est præ
 ter te, qui diabolicam impietatem fuerit su
 pergressus: quod ille in domino confessus est
 esse posse, tu non credis esse potuisse. Sed cessa
 uit postea forsitan ac conquieuit, & cassatis tē
 tationibus suis deposuit suspicionem: quia nō
 inueniebat effectū. Mansit quinimō in eo sem
 per, & vsque ad ipsam domini crucem suspicio
 in eū per formidines proprias cumulata perue
 nit: quid plura? ne tunc quidem opinari de eo
 filium dei desiit, postquam tantum in eū perse
 cutoribus suis licere cognouit. Sed callidus uti
 que hostis, inter ipsas quoque corporeas pas
 siones signa diuinitatis aspiciens, etiam si esse
 eum malebat hominem, suspicari tamen com
 pellebatur deum: quia licet hoc mallet crede
 re quod volebat, coge batur tamen ad id cer
 tis rerum indiciis quod timebat. Nec mirum:
 quamuis enim eum & consputum, & flagella
 tum, & contumeliis affectum, & in crucē actū
 videret: cernebat tamē inter ipsas iniuriarum
 dignitates diuinas exabundare virtutes: dum
 velum templi scinditur, dum sol refugit, dum
 dies obscuratur, dum passionis virtutē omnia
 sentiunt. Cuncta etiam quæ deum nesciunt, o
 pus diuinitatis agnoscunt. Et ideo videns hoc
 diabolus ac tremens, omnimodo peruenire

ad dei agnitionem, etiam in ipsa hominis consummatione tentauit, dicens per eos qui crucifixerant: Si filius dei est, descendat nunc de cruce, & credimus ei. Sensit utique dominum deum nostrum passionem corporis redemptionem humanæ salutis operari, simulque ea & se destitui ac subiugari, & nos redimi atque saluari. Et ideo hostis generis humani omni modo & omni dolo cassari ea voluit, quæ agi pro omnium redemptione cognouit. Si filius, inquit, dei est, descendat nunc de cruce, & credimus ei: scilicet ut motus verborum contumelia, domini defereret sacramentum, dum vlcisceretur iniuriam. Vides ergo dominum etiam in cruce positum filium dei appellari: vides eos id quod nominant suspicari. Disce itaque, ut superius dixi, vel à persecutoribus ipsis, vel à diabolo filium dei credere. Quis unquam æquauit. dæmoniacam infidelitatem? quis supergressus est? Ille eum filium dei esse suspicatus est, etiam cum mortem pertulit: tu negas etiam cum resurrexit. Ille eum deum suspicatus est, cui se occulit: tu negas, cui probauit. Vteris ergo aduersus deum scripturis sacris, & suos in ipsum testes agere conaris. Sed quomodo? verè ut non solum dei, sed etiam testimoniorum ipsorum præuicator sis. Nec mirum utique si quia id quod vis nos potes, id facis solum quod potes: quia vertere in deum testimonia sacra non vales, quod vales ipsa peruertis. Dicis enim: Ergo &

Mar. 15. Heb. 7. Paulus mentitur de Christo dicens: Sine ma-

tre, sine genealogia. Interrogo te, de quo hoc velis dixisse Paulum? de filio & verbo dei, an de Christo, quem tu à filio dei separas, & hominem tantum esse blasphemas? Si de Christo utique quem hominem solitarium dicis: quomodo nasci homo sine matre & sine genealogia maternæ originis potuit? Sin autem de dei verbo ac dei filio: quid facimus quod apostolus, ut tu sacrilege æstimas, testis tuus eodem loco atque eodem testimonio eum quem tu sine matre asseris, etiam sine patre esse testatur, dicens: sine patre, sine matre, sine genealogia? Ergo superest ut apostoli testimonio uteremur, quia filium dei sine matre asseris, etiam sine patre esse blasphememus. Vides ergo peruersitatis ac nequitiae tuæ studio in quod te impietatis præruptum ieceris: ut quod nemo adhuc à seculis nisi insanus fortasse dixit, dum filium dei matrem non habuisse dicis, etiam patrem ipsius deneges. Et hoc tamen nescio impietate maiori an ineptia: quia quid stultius, quid ineptius, quam filii nomen ponere, & patris nomen vellet reticere? Sed dicis: non reticeo, non nego. Et quis ergo te furor compulit testimonium illud ponere? ubi dum matrem eum non habuisse dicis, etiam patrem eius negasse videaris. Nam cum in eodem testimonio, sicut sine matre, ita etiam sine patre esse dicatur: necesse est ut sine matre ibi intelligi potest eodem modo quo sine matre esse ibi intelligitur, etiam sine patre esse credatur, Sed hoc prærupta illa ad negandum

deum infania non intellexit: quæ cum id truncatum poneret, quod integrum scriptum est, non vidit reſerata ſacra voluminis ſerie redargui impudens atque apertum poſſe mendaciũ. O ſtulta blaſphemia & amentia: quæ dum ipſa non videt quid ſequi debeat, etiam illud nõ ſapuit quid legi poſſit: quaſi vero quia auferbat ſibi intelligentiam, auferre poſſet omnibus lectionem: aut ideo perdituri omnes ad legendum oculos capitis ſui eſſent, quia ipſe iam mentis oculos perdidiffet. Audi ergo hæretice quod furatus es: audi plena & integra, quæ debilia ac truncata poſuiſti. Apoſtolus duplicem dei natiuitatem inſinuare in omnibus cupiens: vt & in deitate natum dominum, & in carne monſtraret, ait, ſine patre, ſine matre: alterum enim proprium eſt diuinitatis natiuitati, alterum carnis. Quia ſicut in deitate eſt ſine matre generatus, ita in corpore eſt ſine patre: ac ſic cum nec ſine patre, nec ſine matre ſit, & ſine patre tamen & ſine matre credendus eſt. Quia ſi dum ex patre naſcitur reſpicias, ſine matre eſſe: ſi dum ex matre, ſine patre. Ac ſic in ſingulis natiuitatibus alterum habens, alterum in vtroque non habuit: quia nec diuinitatis natiuitas matre eguit, & ad natiuitatẽ corporis ſibi ipſe ſuffecit ſine patre. Ergo, inquit apoſtol⁹, ſine matre, ſine genealogia. Quomodo ſine genealogia dominum fuiſſe dicit: cum euangelium Matthei euangelifte à genealogia cœperit ſaluatoris, dicens: Liber generatio-

nis Iesu Christi, filii David, filii Abraham.
 Ergo & iuxta euangelistam habet genealogi-
 am, & iuxta apostolum non habet: quia iuxta
 euangelium ex matre habet, iuxta apostolum
 ex patre non habet. Et ideo bene apostolus di-
 cēs, sine patre, sine matre, sine genealogia: ubi
 eum sine matre genitum esse posuit, ibi etiam
 sine genealogia esse memorauit. Ac per hoc in
 vtraque domini natiuitate, & euangelica sibi
 & apostolica simul scripta conueniunt. Quia
 & iuxta euangelistam habet genealogiam, si-
 ne patre in carne natus: & iuxta apostolum nō
 habet, sine matre dominus in deitate genera-
 tus, Esaia dicente: Generationem autem eius *Esa. 53.*
 quis enarrabit? Cur ergo hæretice nō hoc mo-
 do quæ legeras, integra & incorrupta posuisti?
 Vides itaque apostolum hac ratione qua natū
 dominum sine patre posuit, hac etiam sine ma-
 tre posuisse: vt & qua ratiōe intelligeretur esse
 sine patre, hac nosceretur esse sine matre. Et si-
 cut non possit vtique sine patre credi, ita sine
 matre quoque non possit intelligi. Cur ergo
 hæretice non hoc modo quæ in apostolo lege-
 ras, incolumia & inuiolata posuisti? sed partē
 ingeris, partem subtrahis: & vt adstruere falsi-
 tatem per scelus possis, veritatis verba fura-
 ris. Video à quo doctus es. Illius enim habe-
 re credendus es institutionem, cuius sequeris
 exemplum. Sic enim diabolus in euangelio *Luc. 4.*
 tentans deum, Si filius, inquit, dei es: mitte *psal. 99*
 te deorsum. Scriptum est enim: quia angelis

fuis mandauit de te, vt custodiant te in omnibus viis tuis. Et cū hoc dixisset, cohærentia & subiecta subtraxit, id est: Super aspidem & basiliscum ambulabis, & conculcabis leonem & draconem. Callidè vtique superiora posuit, inferiora subtraxit. Illud enim posuit vt circūscriberet: hoc reticuit ne se ipse dānaret. Sciebat enim se aspidem & basiliscum, se leonem & draconem prophetica voce signari. Ita ergo & tu partem obiiiciens, partem subtrahens, illud scilicet ponis vt circumuenias: hoc subtrahis, ne si totum vtique posueris, circūscriptionem tuam ipse condemnes. Sed tempus tandē est ad vltiora transire: nimis enim diu in singulis cōmmorantes, dum affectu copiosæ responsionis ducimur, modum libri etiam longioris excedimus. Ais ergo in alia disputatione, imò in alia blasphemia tua, & spiritum de diuina natura separans: Qui humanitatem

Matt. 1. eius creauit. Ait enim: Quia quod ex Maria natū est, de spiritu sancto est. Qui & iustitia repleuit quod creatum est. Ait enim: Apparuit in carne, iustificatus est in spiritu. Item qui etī fecit & dæmoniis metuendum. Ego, enim ait in spū dei eiicio dēmonia. Qui & carnem eius fecit templum. Vidi enim spiritum eius descendentem quasi columbam, & manentem super eum. Item qui ei donauit eleuationem in cēlū.

Act. 1. Ait enim: Dans mandatum apostolis quos elegit, per spiritum sanctum eleuatus est.

Gal. 1. Hunc denique qui tantam gloriam Christo do

nauit. Omnis ergo in his blasphemia tua hæc est: vt nihil Christus per se habuerit: sed nec ipse vt tu ais, solitarius homo aliquid à verbo, id est, à filio dei cœperit, sed totum in eo donum spiritus fuerit. Si ergo omne id quod tu ad spiritum refers, esse ipsius demonstrabimus: quid reliquum est, nisi vt quem tu ideo hominem vis intelligi, quia, vt ais, totum habuerit alienum: nos ideo probemus deum, quia habuerit totum suum? Et quidem hoc nõ disputationibus tantum aut argumentis, sed voce ipsius diuinitatis probauimus: quia nulla de deo rectius q̃ diuina testantur. Et quia nulla se melius q̃ ipsa maiestas dei nouit, nullis de deo dignius creditur q̃ his in quibus deus ipse est testis suus. Primũ ergo quod ais, quia humanitatẽ eius spiritus sanctus creauit: possemus id nos simpliciter intelligere, si agnosceremus te id nõ infideliter protulisse. Neque enim nos cõceptã ex spiritu sancto domini carnẽ negamus: sed ita tamen conceptũ corpus cõoperante spiritu dicimus, vt creatũ tamẽ sibi à filio dei hominẽ suũ esse dicamus: dicente ipso in scriptis sacris spiritu sancto, atque testãte: Sapiẽtia q̃dī *Prou. 9* ficauit sibi domum. Vides ergo quod id quod conceptũ est à spiritu sancto, ædificatũ à filio dei atq; perfectũ est? nõ quia aliud opus filii dei, aliud spūs sancti sit: sed quia p vnitatẽ diuinitatis æ maiestatis, & opatio spūs, ædificatio filii dei sit, & ædificatio filii dei coopatio spūs sancti. Et ideo nõ solũ spiritus sanctus in virginẽ

superuenisse, sed etiam virtus altissimi obumbrasse virginem legitur: vt quia sapientia ipsa plenitudo diuinitatis est, sapientiæ sibi domum ædificanti omnem diuinitatis plenitudinem nemo ambigeret affuisse. Sed infœlix blasphemandi amentia, dum separare Christum à filio dei nititur, non videt seipsam à se diuinitatis penitus separare naturam. Nisi forte credit quoddam ideo ædificata ei à spiritu sancto domus sit, quia idoneus ac potens ædificare sibi domum ipse non fuerit. Sed hoc quàm insanum est, tam ridiculum: vt qui nutu omnem cælestium ac terrestrium vniuersitatem creasse creditur, ædificare sibi corpus non potuisse credatur? Præsertim cum virtus sancti spiritus, virtus eius sit: & ita vnita sibi atque inseparabilis diuinitas sit trinitatis atque maiestas, vt nihil omnino in vna deitatis persona possit intelligi, quod à plenitudine diuinitatis valeat separari. Ergo hoc posito & intellecto, quod iuxta fidem scripturæ sacræ spiritu sancto superueniente, & virtute altissimi obumbrante, sapientia sibi domum ædificauerit: reliquæ calumniarum blasphemiarum nihil sunt. Neque enim dubium est, quod ipse per se vniuersa fecerit, in cuius nomine ac fide etiã credentium fides nulla non potuit. Neque enim ille auxilio alterius eguisse credendus est, cum ne illi quidem eguerint, qui in virtute ipsius crediderunt. Atque ideo & illud quod ais, quia à spiritu iustificatus sit, & quod metuendum

cum dæmonibus spiritus fecerit, & quod caro
 eius à spiritu facta sit templum: & quod à spi-
 ritu eleuatus sit in cælum: sacrilega & furiosa
 sunt omnia: non quia in his omnibus quæ ipse
 fecit, vñitas & cooperatio spiritus defuisse cre-
 denda sit: vtpote cū nunquam deitas à se desit,
 & in operibus saluatoris semper virtus fuerit
 trinitatis: sed quia tu in domino Iesu Christo
 quasi inopi & imbecillo opitulatum vis spiri-
 tum sanctum, qui ea illi vtique tribuerit quæ
 præstare sibi ipsi non quiuerit. Disce itaque ex
 sacris testimoniis deum credere, & falsitatem
 veritati non admiscere: quia res non recipit, &
 ratio perhorrescit, vt diuinis testimoniis dæ-
 moniaci spiritus intelligentia misceatur. Iam
 primum enim hoc quod ais, quia iustitia reple-
 uerit quod creatum est: & hoc apostolico vis
 testimonio comprobare, quod dicat: Apparuit
 in carne, iustificatus est in spiritu: vtrūque in-
 sano sensu & furioso spiritu loqueris. Quia &
 hoc quod à spiritu vis eum repletum esse iusti-
 tia, ideo ponis, vt ostendas eius vacuitatem,
 cui præstitam esse asseras iustitiæ adimpletio-
 nem. Et hoc quod super hac re apostolico testi-
 monio vteris, diuini testimonii ordinē ratio-
 nemq; furaris. Non enim ita ab apostolo posi-
 tum est vt tu id truncatū vitiatumq; posuisti.
 Quid enim apostolus ait? Et manifestè magnū
 est pietatis sacramentū, quod manifestatū est
 in carne, iustificatum est in spiritu. Vides ergo
 quod mysterium pietatis, vel sacramentū iusti-

1. Ti. 3.

neas: Sanet te, inquit, dominus Iesus Christus, Act. 16
 surge & sterne tibi. Paulus quoque: Præcipio, Act. 9.
 inquit, tibi, per spiritum pythonem, in nomi-
 ne Iesu Christi exire ab ea: & exiit ab ea dæmo-
 nium. Sed quàm longe hæc imbecillitas à do-
 mino nostro fuerit, hinc intellige: quòd ego ne
 illos quidem imbecillos fuisse dico, quos ille
 per nomen suum potentes fecerit. Siquidem
 nulli vnquam apostolorum post domini resur-
 rectionem vel dæmonem, vel vllam infirmita-
 tē obstitisse agnouimus. Quomodo ergo me-
 tuendum eum spiritus reddidit, qui alios fe-
 cit esse metuendos? aut in seipso infirmus fu-
 it, cuius fides etiam per alios super vniuersa
 regnavit? Postremo qui potestatem à deo ac-
 ceperunt, nunquam potestatem ipsam ad eum
 quo acceperant retulerunt: quia nec potestas
 ipsa vim vllam vnquam habere potuit, nisi per
 nomē ipsius qui dedit. Ideoque & apostoli, &
 omnes ministri dei nihil in suo vnquam, sed in
 Christi nomine atque inuocatione fecerunt:
 quia potestas ipsa inde accipiebat virtutem,
 vnde habebat exordium: & dari per ministros
 nequaquā poterat, nisi ab autore venisset. Tu
 ergo qui idem vis dominum fuisse quod vnum
 ex seruis suis: quia sicut apostoli nihil vtiq; ha-
 buerant, nisi à domino suo accepissent: ita tu
 nihil vis dominum ipsum habuisse, nisi quod
 à spiritu acceperit. Ac per hoc & ipsum quod
 habuit, non vt dominum vis habuisse, sed vt
 seruum accepisse. Dic mihi ergo, quomodo

- ille potestate ipsa ut sua, non ut accepta uteba-
Mat. 9. tur? quid enim de eo legimus? Surge, inquit pa-
 ralytico, tolle grabatum tuum, & vade in do-
 mum tuam. Et iterum supplicanti pro filio pa-
Ioan. 4. tri: Vade, inquit, filius tuus vivit. Et illud ubi
Luc. 7. vnicus matris ad sepulchrū deferebatur: Adu-
 lescent, inquit, tibi dico, surge. Nunquid ergo,
 ut mos erat eorum qui potestatem à deo acci-
 piebant, potestatem quoque ille dari sibi ad ef-
 ficiendum inuocatione diuini nominis postu-
 labat? Cur nō sicut apostoli, in nomine ipsius,
 ita ipse quoque, in nomine spiritus operabatur?
 Denique quid de ipso euāgelium protestatur?
Mat. 7. Erat, inquit, docens eos sicut potestatem ha-
 bens, non sicut scribæ & pharisæi. Aut super-
 bum & arrogantem forsitan vis fuisse: qui po-
 testatem quam à deo, ut ais, accepisset, suæ po-
 tentiæ deputaret. Sed quid facimus? quod po-
 testas nunquam est obsecuta famulis, nisi per
 nomen auctoris: nec habere efficiētiam potuit,
 si aliquid sibi ex ea faciens deputauit. Sed quid
 tādū euidētibz quidem, sed tamen minori-
 bus argumentis contra furentem blasphemiam
 agimus? Audiamus ipsum ad discipulos lo-
Mat. 10 quentem deum: Infirmos curate, mortuos su-
 scitate, leprosos mundate, dæmones eiicite. Et
Mar. 16 iterum: In nomine, inquit, meo dæmonia ei-
 cietis. Nunquid ad potestatem extendendam
 alterius nomine eguit, qui ipsum nomen su-
 um potestatem esse fecit? Sed quid adhuc ad-
Luc. 10 dicitur? Ecce, inquit, dedi vobis potestatem

calcandi super serpentes & scorpiones, & super omnem virtutem inimici. Ipse certè *Matt. 5.* tem, vt verè erat, & humilem corde se esse dicit. Et quomodo pro summa vtique potestate in nomine suo operari alios præcipit, si ipse in nomine operabatur alieno? Aut aliis dabat quasi suum, quod ipse, vt tu ais, non habuerat, nisi accepisset alienum? Dic mihi autem qui sanctorum potestatem à deo accipientes, sic operati sunt? Aut nunquid non insanus Petrus creditus fuerat, aut furiosus Ioannes, aut amēs Paulus, si quibuscunque aut ægris dixisset, in nomine nostro surgite: aut claudis, in nomine nostro ambulate: aut mortuis, in nomine nostro viuite: aut illud ad aliquos, damus vobis potestatem calcandi super serpentes & scorpiones, & super omnem potestatem inimici? Intellige ergo ex hoc ipso insaniam tuam: quia sicut hæc verba insana sunt, si sint humanæ præsumptionis: ita tu insanissimus, qui diuinæ hæc non intelligis potestatis. Ex duobus enim alterum confitearis necesse est: aut posse hominem diuinam potestatem & habere & dare: aut certè si nullus omnino hominum id potest, deum fuisse qui potuit. Nemo enim diuinam virtutem potest tribuere in munificentia, nisi qui habuerit in natura. Sequitur autem in blasphemia tua, quòd caro eius templum à spiritu facta sit, ideo quia Ioānes dixerit: Vidi enim spiritum descendētem de cælo, *Ioan. 1.* & manentem super eum. Quia furiosam as-

fertionem tuam etiam diuinis testimoniis confirmare conaris: quam ob causam videamus an hoc quod tu ais, testimonium sacrum dixerit. Vidi enim, inquit, spiritum descendentem sicut columbam, & manentem super eum. Discerne hic si potes, quis potior, quis maior sit, quis honoratior? is qui descendebat, an is ad quem descendebatur? is qui deferebat honorem, an is cui deferebatur honor? Vbi hic in testimonio sonat, quod carnem eius templum spiritus fecerit? aut in quo honorem dei minuit, si ad demonstrandum humano generi deum deus ipse descendit? Cum utique non minor intelligi debeat cuius indicata sit dignitas, quam is qui index fuerit dignitatis. Sed absit vllam credere aut fieri in diuinitate distantiam: quia eadem vna deitas, & æqualis potestas opinionem penitus impiæ inæqualitatis excludit. Et ideo in hoc negocio, cum & patris persona & filii & spiritus sancti sit, & cum filius dei sit ad quem descenditur, spiritus qui descendit, pater qui testimonium dicit: nullus plus habuit honoris, nullus quicquam accepit iniuriæ: sed equaliter ad plenitudinem deitatis totum redundat: quia quæuis in trinitate persona honorem in se totius continet trinitatis. Et ideo dici hinc amplius non necesse est, nisi ad manifestandam tantum impietatis tuæ causam atque originem. Quia spinæ utique ac tribuli ex radicibus emergentes, qualitate sui stirpem suam produnt, ex eo

ipſo quod ſunt, indicant vnde naſcantur. Ita ergo & tu Pelagianę hęreſeos ſpinofam fabuli fidem oſtendis in germine, quod pater tuus habuiſſe traditur in radice. Leporius ille enim, vt Leporius diſcipulus ſuus dixit, dominũ noſtrum aſſerebat Chriſtum factum eſſe per baptiſmum: tu in baptiſmo tẽplum dicis factum eſſe per ſpiritum. Non quidem ad plenum eadẽ verba ſunt, ſed ad plenum vna peruerſitas. Ad-diſ autem etiam hoc prædictis impietatibus tuis, q̃ eleuationem domino in cẽlum ſpiritus condonarit: oſtendens ſcilicet ſacrilego ſenſu tuo, quod tam imbecillũ ac tam egenũ dominũ Ieſum Chriſtũ fuiſſe credis, quod niſi eum ſpiritus eleuaſſet in cẽlum, adhuc hodie forſitan futurum æſtimares in terrã. Ad probationem autem dicti etiam testimoniũ ſacrũ adhibens: ait, inquis enim: Dans mãdata apoſtoliſ quos elegit, per ſpiritum ſanctum eleuatus eſt. Quid te appellem? quid te exiſtimem? qui corrupendo diuinas literas, id agis ne testimonia ſacra habeant vim testimoniorum. Nouũ audacię genus, quod id efficere argumentis nequitie ſuę nititur, vt falſitatẽ veritas cõfirmare videatur. Non enim ita in apoſtolicis actib⁹ dictum eſt, vt tu ais. Quid enim ſcriptura dicit? Quæ cœpit Ieſus facere & docere vſque in diem qua præcipient apoſtoliſ, per ſpiritũ ſanctum quos elegit, aſſumptus eſt. Quod vtique hyperbaton eſt, & ita intelligendum: quæ cœpit Ieſus facere & docere vſque in diem qua

Act. 1.

assumptus est, præcipiens apostolis quos elegit per spiritum sanctum: ut responderi tibi forsitan amplius quam testimonio ipso in hac parte non debeat: quia sufficere utique ad plenum veritati debeat integritas testimonii, si falsitati poterat satis esse correptio. Sed tamen tu qui putas dominum nostrum Iesum Christum non potuisse cælum ascendere, nisi eleuatus esset à spiritu: dic mihi quomodo ipse ait:

Ioan. 3. Nemo ascendit in cælum, nisi qui de cælo descendit filius hominis, qui est in cælo? Agnosce ergo quam ridiculè & stultè putas non potuisse eum cælum ascendere, qui cum descendisset in terras, nunquam abfuisse dicatur è cælo: & an possibile ei fuerit linquenti inferos cælum ascendere, cui promptum fuerit etiam in terris sito, semper in cælestibus permanere. Quid

Ioã. 20. autem illud quod ipse ait: ascendo ad patrem meum? nunquid in ascensione hac intercessuram opem indiguit alterius: qui in hoc ipso quo ascensurum se esse dixit, virtutem proprię potestatis ostendit? Dauid quoque de ipsa domini ascensione: Ascendit, inquit, deus in iubilo, dominus in voce tubæ. Evidenter maiestatem ascendentis per potestatem ascensionis explicuit. Sed videamus tamen qua tandem præcedentes blasphemias tuas adiectione concludas. Qui tãtam, inquis, gloriã Christo donauit. Gloriam nominas, ut contumeliam facias. Nam in eo quod donatum dominum gloria asseris, dum accepisse dicis, indi-

Ps. 46.

guisse blasphemias . Hoc enim ait impius sensus suus , vt largitas munerantis indigentiam accipientis ostendat . O infœlicem impietatem tuam , & vbi illud est quod de ascendente in cœlum domino Iesu Christo ipsa olim diuinitas prænuntiauit ? Attollite , inquit , portas vestras , & introibit rex gloriæ . Cumque ipse sibi , vt solet sermo diuinus , quasi sub inquirentis nomine respondisset , quis est iste rex gloriæ ? statim subdidit : dominus fortis & potens , dominus potens in prælio : sub prælii vtique gesti nomine , victoriam domini triumphantis ostendens . Deinde cum ad complendam rei expositionem , textum supradicti sermonis iterasset , hac maiestatem domini cœlū introeuntis conclusione monstrauit , dicens : Dominus virtutum , ipse est rex gloriæ . Scilicet ne susceptio corporis honorē summæ imminueret diuinitatis , eundem hic dominum virtutum , & regem cœlestis gloriæ esse docuit , quem superius victorem inferni prælii prædicauit . Nunc & donatam domino gloriam esse dicito : cum & prophetia eum regem gloriæ esse dixerit , & ipse de se ita testificatus sit : Cū venerit filius hominis in gloria sua . Repugna *Mat. 25.* si potes , & contradicito : vt cum ille se habere testetur gloriam suam , tu accepisse eum dicas alienam . Quamuis nos ita dicamus eum gloriam habere propriam , vt nō negemus tamen hanc ipsam gloriæ proprietatem ei cum spiritu ac patre esse communem . Quia quicquid

deus possidet, deitatis est: & regnum glorię ita est filio dei proprium, quod non est tamen à totius deitatis proprietate diuisum. Sed tempus tandem est finem libro, imò vniuerso operi imponere, si paucorum tamē sanctorum virorum atque illustrium sacerdotum dicta subdidero: vt id quod autoritate testimoniorum sacrorum iam adprobauimus, etiam fide præ-

Hilari⁹ sentis temporis roboremus. Hilarius vir virtutum omnium atque ornamentorum, & sicut vita, ita eloquētia insignis: qui & magister ecclesiarum & sacerdos, non per sua tantum merita, sed etiam per profectus creuit aliorum: & inter procellas persecutionum ita immobilis perstitit, vt per inuictę fidei fortitudinem etiā confessoris cœperit dignitatem: in libro fidei primo, deum verū ex deo vero dominum Iesum Christum, & ante secula natum, & postea hominem genitum esse testatur. Item in secundo libro: Vnus vnigenitus deus in corpusculi humani formam sanctę virginis vtero insertus adcrescit: qui omnia continet, & intra quem cuncta sunt, humani partus lege profertur. Itē in eodem libro: Angelus testis est, deus nobiscum est, ille qui nascitur. Item in libro decimo: Nati quoque in hominem ex partu virginis dei sacramentum docuimus. Item in eodē: Nanque cum in hominem natus deus sit, non idcirco natus est, ne deus non maneret. Item eiusdem in proœmio expositionis euangelii secundum Matthæum: Erat nanque pri-

mum necessarium nobis, ut vnigenitus deus nostri causa homo natus cognosceretur. Item in consequentibus: Ad id quod deus erat, homo id quod tum non erat gigneretur. Item in eodem: Tertium deinceps illud congruū fuit, ut quia deus homo genitus in mundo, & cætera. Hæc quidem pauca sunt de satis multis. Sed tamen vides etiam ex his quæ diximus, quod palam & euidenter natum ex Maria deū prædicat. Et vbi illud tuum: Non potuit creatura parere creatorem: quod natum est ex carne, caro est? Longum est de singulis personis cōuenientia dicere. Enumeratio magis quàm executio dictorum agēda est: quia sibi ad executionem sui ipsa sufficiunt. Ambrosius ex- *Ambro*
 mius dei sacerdos: qui à manu domini non re- *sus.*
 cedens, in dei semper digito quasi gemma rutilauit: in libro qui est ad virgines, ita memorat: Frater meus candidus & rubicundus. Candidus, quia patris splendor est: rubeus, quia partus est virginis. Memento tamen antiquiora in eo diuinitatis insignia, quàm corporis sacramenta. Non enim cœpit ex virgine, sed qui erat, venit in virginem. Item ipsius in natali domini: Videte miraculum matris dominicæ: virgo concepit, virgo peperit: virgo cum parturit, virgo grauida, virgo post partum. Sicut in Ezechiele dicitur: Et porta *Eze. 44*
 erat clausa, & non est aperta: quia dominus transiit per eam. Gloriosa virginitas, & præclara fœcunditas. Dominus mundi nascitur, &

nullus est gemitus parientis: vacuatur vterus,
 & verus infans excipitur, nec tamen virgini-
 tas violatur. Fas erat, vt deo nascēte meritum
 cresceret castitatis: nec per eius egressum vio-
 larentur integra, qui venerat sanare corrupta.
 Item in expositione euangelii secundum Lu-
 cam: Quod ea potissimum lecta est vt deum
 pareret, quæ erat desponsata viro, natum certe
 ex virgine deum prædicat, Mariam matrem
 dei nominat. Et vbi illa est prodigiosa atque
 execrabilis vox tua, qua ais: quomodo mater
 potest esse alieni à natura sua? si autem mater
 ab ipsis vocatur, humanitas est quod natū est,
 non deus. Ecce eximius magister fidei, & ho-
 minem dicit eam esse quæ genuit, & deum es-
 se qui natus est: & tamen hoc non infidelita-
 tis causam, sed fidei esse miraculum. Hierony-
 mus catholicorum magister, cuius scripta per
 vniuersum mundum quasi diuinæ lampades
 rutilant, in libro ad Eustochium: Dei, inquit,
 filius pro nostra salute hominis factus est fi-
 lius: decem mensibus in vtero vt nascatur ex-
 pectat: & ille cuius pugillo mundus includi-
 tur, præsepīi continetur angustiis. Item ipsius
 in commentario Esaïæ: Dominus enim virtu-
 tum, qui est rex gloriæ, ipse descendit in vte-
 rum virginalem, & ingressus est & egressus
 orientalem portam, quæ semper clausa est. De
 quo Gabriel dicit ad virginem: Spiritus san-
 ctus superueniet in te, & virtus altissimi obū-
 brabit tibi. Propterea quod nascetur in te san-

Hiero-
nymus.

Mat. 1.

Etum, vocabitur filius dei. Et in prouerbiis:
 Sapientia ædificauit sibi domum. Compara *Prou. 9.*
 hoc, si placet, doctrinæ tuæ, imò blasphemix,
 qua ais: Deus enim mensium creator est, &
 non mensium partus. Ecce enim Hieronymus
 vir sicut maximæ scientiæ, ita probatissimæ
 puræque doctrinæ, iisdem propè verbis, qui-
 bus tu dei filium mensium partum negas, ille
 partum mensium esse testatur. Decem enim,
 inquit, mensibus in utero ut nascatur expe-
 ctat. Sed parua tibi forsitan viri huius videtur
 autoritas: idem omnes atque iisdem verbis pu-
 tato dicere: quia quicumque dei filium partum
 esse virginis non negat, partum esse mensium
 confitetur. Rufinus quoque Christianæ phi- *Rufinus*
 losophiæ vir, haud contemnenda ecclesiasti-
 corum dictorū portio, ita in expositione sym-
 boli de domini natiuitate testatur: Filius e-
 nim, inquit, dei nascitur ex virgine, non prin-
 cipaliter soli carni sociatus, sed animā inter
 carnem deumque mediante generatus. Nun-
 quid obscure deum ex homine natum testifi-
 catus est? Augustinus Hipponæ Regienfis op- *Augu-*
 pidi magnus sacerdos: Ut autem homines, in- *stinus.*
 quit, nascerentur ex deo, primū ex ipsis na-
 tus est deus. Christus enim deus, & Christus
 natus ex hominibus, non quæsiuit nisi matrem
 in terra: quia iam patrem habebat in cælo. Na-
 tus est ex deo, per quem efficimur: & natus ex
 fœmina, per quem reficeremur. Item illic: Et
 verbum caro factum est, & habitauit in nobis.

Quid ergo miraris, quia homines ex deo nascuntur? Attende ipsum deum natum ex hominibus. Item eiusdem in epistola ad Volusianum: Sed & ipse Moyses & cæteri prophetæ veracissime dominum Christum prophetauerunt, & ei gloriam magnam dederunt. Hunc non tanquam parem sibi, nec in eadem miraculorum potentia superiorem, sed planè dominum deum omnium, & hominem propter homines factum venturum pronuntiauerunt. Qui propterea & ipse talia facere voluit, ne esset absurdum quæ per illos fecerat, si ipse non faceret. Sed tamen & aliquid proprium facere debuit, nasci de virgine, à mortuis resurgere, in cælum ascendere. Hoc deo qui parum putat, quid plus expectet ignoro. Sed fortè quia hi quos numerauimus viri in diuersis mundi partibus fuerunt, minus probabiles tibi auctoritate videantur. Ridiculum id quidè: quia loco fides non imminuitur: & quid sit quis, non vbi sit considerandum: præsertim cum religio omnes vniat: & hi qui in fide vna sunt, in corpore quoque vno esse noscantur. Sed tamen aliquos non despicias, etiam de orientalibus proferimus. Gregorius splendidissimum scientiæ ac doctrinæ iubar: qui cum olim vita functus sit, etiam nunc tamen auctoritate ac fide viuit: & cum olim iam corpore absit ab ecclesiis, tamen voce ac magisterio nō recedit. Cum ergo, inquit, processisset ex virgine deus, in ea quam assumpserat humana

Gregorius.

natura, vnum è duobus sibi inuicem cōtrariis
 existens, carne ac spiritu: aliud in deum assu-
 mitur, aliud deitatis gratia præstat. O noua &
 inaudita permixtio. O mira & inexcelsa cō-
 pago. Qui erat fit, & creator creatur: & qui
 immensus est, capitur mediante anima deo &
 carne: & ille qui omnes diuites facit, pauper
 efficitur. Item rursus de Epiphania: Sed quid
 fit? quid de nobis agitur vel pro nobis? noua
 quædam & inaudita efficitur permutatio na-
 turarū: & deus homo fit. Item illic: Et dei fi-
 lius cœpit esse etiam hominis: dei filius non
 cōuersus ex eo quod erat, inconuertibilis nan-
 que est, sed assumens quod nō erat, misericors
 enim est, vt capi possit qui capi non poterat.
 Vides quàm præclare atque magnifice ita ma-
 iestatem deitatis prædicat, vt dignationem in-
 carnationis insinuet. Sciens utiq; admirabilis
 fidei doctor, ex his omnibus quæ nobis in mū-
 dum veniens deus tribuit, beneficiorum esse
 cumulum, non honoris imminutionem: quia
 quicquid homini deus præstitit, augeri eius in
 nobis debet affectum, non minuere dignitatē.
 Athanasius quoq; Alexādrinæ vrbis sacerdos, *Athanasius.*
 eximium cōstantiæ & virtutis exemplū: quem
 hæreticæ persecutionis procella non cōtriuuit,
 sed probauit: quique similem semper splendēti
 speculo vitam habens, prius penè indeptus est
 martyris meritum quàm confessoris caperet
 dignitatem. Videamus quid de domino Iesu
 Christo, vel de domini matre senserit. Hæc

ergo intentio est & character sanctæ scripturæ, quod sæpe diximus, duplicem esse in eodem saluatore significationē: quod & semper deus fuit, & est filius, verbum & lumen, & sapientia patris, & quod postea propter nos carnem sumpsit ex Maria virgine theotoco, & homo factus est. Item post alia: Multi ergo sancti fuerunt & mundi à peccato: Hieremias & ab utero sanctificatus est: & Ioannes cum esset in utero, exultauit in gaudio voce Mariæ theotoci. Deum utique dei filium, qui ut verbis ipsius fidem vniuersorum loquar, verbum est, & lumen, & sapientia patris, propter nos carnem sumpsisse dicit: & ideo theotocon virginem Mariam, quia sit mater, appellat. Ioannes

Chryso-
stomus. Constantinopolitanorum antistitum decus: cuius sanctitas absque vlla gentilitiæ persecutionis procella, ad martyrii merita peruenit, quid de filii dei incarnatione senserit ac prædicarit ausculta. Et illum, inquit, quem si nuda deitate venisset, non cælum, non terra, non maria, non vlla creatura sustinere potuisset, illæsa virginis viscera portauerunt. Huius ergo fidem atque doctrinam, etiam si aliorum ignorabas, sequi ac tenere debueras: cuius utique amore ac desiderio te antistitem sibi plebs religiosa delegit. Quia cum de Antiochena ecclesia te sibi sumeret sacerdotem, ex quo illum ante prælegerat, recepturam se in te credidit quicquid in illo habere desuisset. Nōne quæso hi omnes quasi prophetico olim spiritu ad cō-

fundendas blasphemias tuas cuncta dixerunt? Tu enim dominum saluatorémque nostrum Christum esse clamas, non deum: illi autem Christum dominum verum deum. Tu Mariã Christotocon, nõ theotocon esse blasphemias: illi ita Christotocõ non negant, vt theotocõ esse cognoscant. Non res tantum blasphemias tuis sunt oppositæ, sed & verba rerum: vt apertè intelligamus, olim aduersus blasphemias tuas munimen à deo inexpugnabile præparatum: quod venturam quandoque vim hæreticæ impugnationis parato iam muro franget veritatis. Et tu ô impiissime atq; impudentissime, præclarę vrbis contaminator, catholicę ac sanctę plebis grauis & exitiosa contagio, stare in ecclesia dei ac loqui audes: & blasphemias ac furiosis vocibus tuis, sacerdotes semper illæse fidei & catholicę confessionis infamas, magistrorum priorum vitio, plebem Constantinopolitanę vrbis errare? Tu ergo emendator priorum antistitum, tu cõdemnator veterum sacerdotum, tu Gregorio excellentior, tu Nestario probatior, tu Ioanne præstantior, omnibusque orientalium vrbium sacerdotibus? qui etsi non eiusdem nominis, cuius hi quos nominaui, eius tamẽ fidei fuerunt. Quod quidem, quantum ad hanc causam pertinet, sufficit: quia cum fide agatur, omnes in eo idẽ sunt quod optimi, in quo consortes sunt optimorum. Vnde ego quoque ipse humilis atque obscurus nomine, sicut merito, licet mihi in-

ter eximios Constantinopolitanæ vrbis antistites locum magistri vsurpare non possim: studium tamen discipuli affectumque præsumo. Adoptatus enim à beatissimæ memoriæ Ioāne episcopo in ministerium sacrum, atque oblatus deo, & si corpore absum, affectu illic sum: & illi dilectissimo mihi ac venerandissimo dei populo & si nunc præsentia non admisceor, tamen mente coniungor. Et hinc est quod cōdolens ei atque compatiens, in vocem nūc tristitiæ communis ac doloris erupi: & quod vnū potui, per opusculorum nostrorum flebilem querimoniam, quasi pro membrorum atque artuum meorum infirmitate clamaui. Etenim si iuxta apostolum, dolente quidem minore corporis parte, condolet maior atque compatitur: quanto magis dolente maiore minor cōpati oportet? Inhumanissimum quippe est, vt in vno atque eodem corpore maiorum infirmitatem minora non sentiant: cum minorum maiora patiantur. Vnde obsecro ac deprecor omnes vos, qui intra Constantinopolitanæ vrbis ambitum siti, & per affectum patriæ ciues mei, & per vnitatē fidei fratres mei estis, vt. *1. cor. 5.* separetis vos ab illo, vt scriptum est, lupo rapaci, qui deuorat dei populum, sicut cibum panis. Ne tetigeritis, neque gustaueritis quicquā illius: quia sunt omnia in interitū. Exite de medio eius, ac separamini, & immundum ne tetigeritis. Mementote magistrorum veterum sacerdotumque vestrorum: Gregorii no-

bilis per orbem, Nectarii sanctimonia insignis, Ioannis fide ac puritate mirabilis. Ioannis inquam Ioannis illius, qui vere ad similitudinem Ioānis euāgelistæ, & discipulus Iesu, & apostolus, quasi super pectus domini semper affectumque discubuit. Illius inquam mementote: illum sequimini: illius puritatem: illius fidem, illius doctrinam ac sanctimoniam cogitate. Illius memētote semper doctoris vestri ac nutritoris, in cuius quasi gremio quodammodo amplexuque creuistis. Qui communis mihi ac vobis magister fuit: cuius discipuli atque institutio sumus. Illius scripta legite: illius informationem tenete: illius fidem ac meritum amplexamini. Quod etsi assequi grande est ac difficile, sequi tamen pulchrum atque sublime. Quoniam in summa rerum, non adeptio tantum, sed etiā imitatio ipsa laudanda est. Quia nunquam ferè aliquis eius rei portione ad plenum caret, ad quam scandere ac peruenire contenderit. Ille ergo vobis in sensu semper, & quasi in conspectu sit: ille in animo atque in cogitatione versetur. Ille denique ipse vobis etiam hæc quæ à me sunt scripta cōmendet: quia hæc quæ ego scripsi, ille me docuit: ac per hoc non tam meam hæc quam illius esse credite. Quia riuus ex fonte constat: & quicquid putatur esse discipuli, totum ad honorem referri conuenit magistri. Te autem præter omnia ac super omnia deus pater domini nostri Iesu Christi, æquè voce ac mente

supplici obsecro : vt hæc quæ ex largitate tui
muneris scripsimus , tu dono tui amoris infi-
nues. Et quia, vt ipse nos dominus deus noster
vnigenitus tuus docuit, ita dilexisti hunc mū-
dum, vt pro salute mundi vnigenitum tuū mit-
teres: donec hoc plebi tuæ, quā redemisti, vt in
incarnatione vnigeniti filii tui, & tuum donū,
& affectum illius sapiat : & hoc quod pro no-
bis vnigenitus tuus dominus deus noster &
natus, & passus est, & resurrexit: ita omnes &
intelligant & ament, vt dignatio suæ maiesta-
tis profectus sit nostri amoris : nec in animis
vniuersorum humilitas illius imminutionem
habeat honoris , sed augmētum semper pariat
charitatis: ac beneficia sacræ misericordiæ ita
omnes pie ac sapienter intelligamus , vt tanto
plus debere nouerimus nos deo nostro, quan-
to humilior propter nos factus est à se deus.

IOANNIS CASSIANI
de incarnatione Christi libri
septimi & vltimi
finis.

BEATI CYRILLI SER-
mo, de eo quòd verbum dei
factum sit homo, ~~Interpretatio~~

~~Interpretatio~~ in-
terprete,



Profundum quidem & ma-
gnum, verèque admiratione
dignum est hoc religionis sa-
cramentum, atque adeò an-
gelis beatis desideratissimū.
Dicebat enim aliquando ser-
uatoris discipulus de his quæ à sanctis prophe-
tis dicta super Iesu omnium nostrum seruato-
re: quæ nunc reuelata sunt nobis per eos, qui eu-
angelizant nobis in spiritu sancto è cælis mis-
so. In quæ desiderant angeli prospicere. Sanè *1. Pet. 1.*
omnes prospexerūt, qui intellexerunt magnū
hoc religionis sacramentum: quoniam natus
est secundum carnem Christus: gratiarum a-
ctiones pro nobis offerentes, dicebant: Glo-
ria in excelsis, & in terra pax, in hominibus
bona voluntas. Quomodo enim lætitiis im-
plendi non erant, mundi saluatorem & redem-
ptorem videntes natum è sancta virgine, qui
etiam vno peccatore pœnitentiam agente, fe-
stum agunt: sicut dicit saluator. Tripudiet igi- *Luc. 15.*
tur propter nos sanctorum spirituum multitu

do. Et quod hic argumentum? Vnigenitus homo factus est, natus est secundum carnem, innotuit dominicæ erga nos benignitatis latitudo, & incomparabilis misericordiæ magnitudo. Nam beatus propheta Esaïas inquit: Absorpsit mors valida. Et iterum: Abstulit deus omnem lachrymam ab omni facie. Abstulit autem quodammodo omnis faciei lachrymam. Vel quo pacto veterē illā maledictionem vt inefficacem declarauit, & aduersantissimū mortis destruxit imperium, docebit iterum sapientissimus Paulus: Nam quia paruuli participes fuerunt sanguinis & carnis, & ipse similiter particeps fuit eorum, vt per mortem eum qui mortis potestatem habet, aboleat, hoc est diabolum, & liberet eos qui metu mortis per omnem vitam seruituti obnoxii erant. Quid igitur est hoc, similiter particeps fuit eorum? Vel illud nimirum quod factus est sicut nos, ex sancta & dei genitrice Maria in sanguine & carne. Nam cū verbum dei sit deus natura, & verus, consubstantialis & coæternus patri, & suæ sublimitatis excellentia honorificentissimus, & in forma & similitudine eius qui genuit: non est rapinam arbitratus quod esset equalis deo, sed semetipsum exinaniuit forma serui assumpta è sancta Maria, in similitudine hominum factus, & figura inuentus vt homo, humiliavit semetipsum, factus obediens vsque ad mortem, mortem autem crucis. Ita-

*Esa. 25.
Ibidem.*

Heb. 2

que sponte vsque adeo se humiliavit, qui de sua plenitudine dat omnibus. Demisit autem sese propter nos, à nullo coactus, sed vltroneus propter nos serui formam accepit, qui secundum naturam suam liber. Inter eos qui nobis similes, qui super omnem creaturam est. Inter eos qui sub morte, qui omnes viuificat. Ipse enim est panis viuus, & vitam dedit mundo, factus nobiscum sub lege, qui super legem & legislator, vtpote deus. Inter eos qui initium & natiuitatē habent, qui ante omne seculum & tempus, imò seculorum conditor & factor. Quomodo igitur fuit sicut nos? corpore assumpto ex sancta virgine: corpore autem non inanimato, sicut visum est quibusdam hæreticis, sed animato, atque adeo anima rationali. Sic prodiiit perfectus homo ex muliere absque peccato, verè & non opinione vel phantasia.

Non contemptior fuit in hoc quod erat deus, neque id abiecit quod erat: semper est & erit deus. Sic dei genitricem dicimus sanctam virginem. Nam sic beatus Paulus dicit: Vnus deus & pater, ex quo omnia: & vnus dominus Iesus Christus, per quem omnia. Non enim diuidimus vnum dominum & deum & saluatorem nostrum in duos filios; eum qui homo fuit, & incarnatum dei verbum.

Neque, sicut opinantur quidam hæretici & imprudentes, quod humanitas & deitas mutuum confusæ sunt, ita quod verbum dei in

1. cor. 8


naturam carnis concefferit, & natura carnis in naturam deitatis cōuerſa ſit: inuertibile enim & immutabile omnibus modis eſt verbū dei: ſed quòd carnem animatam anima rationali ſibi ex ſancta virgine verè vniuerit verbū dei, ineffabiliter incarnatum, & factum homo dicitur. Sufficiat igitur ad rectam & ad irreprehenſibilem fidei noſtræ confeſſionem, dei genitricem dicere & confiteri ſanctam virginem: id autem adducere, quòd & hominis genitrix ſit, non eſt neceſſe neque vtile. Edocti enim ſumus confiteri vnum deum, & credere eum, etiam poſtquam homo factus eſt, ſicut Paulus dicit: Vnus deus, vnus & mediator dei & hominum. Nam hominem quidem dicimus factum eſſe inuertibiliter dei verbum, & quantum quidem ad naturam carnis pertingit, peperit beata virgo corpus conſubſtantiale ſuo & noſtro: ſed in hoc quòd dicitur dei genitrix, ſimul colligitur & hominis manifeſtatio. Non enim nudā peperit deitatem ſancta virgo, ſed vnitum carni dei verbum. Et non aliter intelligitur dei genitrix, niſi hoc modo. Nam omnino præintelligitur confeſſio incarnationis. Et ſic vltra verum erit quòd dei genitrix fuerit ſancta virgo, quæ peperit mirabiliter vnum Chriſtum, ſimiliter carnis nobiſcum participem & ſanguinis, & conſubſtantialem ei & nobis ſecundum humanitatem, ita vt caro ſit ex dei genitrice Maria. Non enim ſimilis ſub-

1. Ti. 2.

stantiæ, vt quibusdam videtur hæreticis, sed
 ὁμοῦς, hoc est cōsubstantialis, id est ex no^{ὁμοῦς}
 stra substantia. Dicit enim: Semen Abrahæ ^{Heb. 1.}
 apprehendit. Qui autem dicit ὁμοῖος, hoc
 est similem substantia, non dicit verum homi-
 nem, sed similitudinem filii hominis, sicut Da^{Dan. 10}
 niel dicit. Apostolus autem nō similitudinem
 nos docuit, sed inquit: Homo Christus Iesus, ^{1. Ti. 2.}
 qui dedit semetipsum redemptionem pro om-
 nibus. Consubstantialē autem qui dicit, di-
 cit eundem esse cum patre & deo secundum di-
 uinitatem, sicut & patres nostri confessi sunt,
 dicentes ὁμοῦς, hoc est consubstantialē pa-
 tri, & non ὁμοῖος, hoc est similem substan-
 tia. Proinde cū dicamus dei genitricem, su-
 perfluē & non necessariō superaddimus homi-
 nis genitricem. Sufficit enim, vt dixi, prima
 vox totius sacramenti nostri confessionem cō-
 tinens, & nullam loquacitatis occasionem vo-
 lentibus veritatem calumniari suppeditans.
 Mos enim hæreticorum est etiam ea que rectē
 dicta sunt, in adulterinum sensum peruertere.
 Abducimur autem nullo modo intelligentes
 quōd errarint, & ipsas diuinas scripturas cor-
 ruperint. Proinde nostrum fuerit, digna & sen-
 tentiæ congrua proferre verba. At si isti non
 rectē intelligunt, nihil ad nos. Ipsi audient
 per prophetam dicentem: Væ his qui dicunt ^{Esa. 5}
 malum bonum, & bonum malum. Atqui nul-
 la communio est lucis & tenebrarum: nulla

conspiratio Christi & Belial. Nam nos ingredimur viam rectam, & nihil adulterini habentem, hoc est semitam regiam, & non obliquam: atque sic occurremus ad præmium supernæ vocationis, per quem & cum quo deo & patri gloria cum sancto spiritu in secula seculorum. Amen.

FINIS.



Excusum Parisijs per Petrum
Galterum, pro Ioãne Barbeo
& Claudio Garamontio.

I 5 4 5

